

ՅՐԱԶ ԲԵԳԼԱՐՅԱՆ

ՅՐԱՃԱՊԱՏՈՒՄ

ԿԱՍ

**ՉԱՐՄԱՆԱԼԻ
ՊԱՏՄՈՒԹՅՈՒՆՆԵՐ**

Լ Հ Օ Ւ Հ Ա Ծ - 2 0 0 9

Ի ՀԱՅՐԱՊԵՏՈՒԹԵԱՆ
Ն.Ս.Օ.Տ.Տ. ԳԱՐԵԳԻՆ Բ
ՎԵՀԱՓԱՌ ԵԻ ՍՐԲԱԶՆԱԳՈՅՆ ԿԱԹՈՂԻԿՈՍԻ
ԱՄԵՆԱՅՆ ՀԱՅՈՑ

ՀՐԱՄԱՆԱԻ
ԿՈՏԱՅՔԻ ԹԵՄԻ ԱՌԱՋՆՈՐԴ
Տ. ԱՌԱՔԵԼ ԵՊԻՍԿՈՊՈՍԻ

Գիրքը լոյս է տեսնում
Ժիրայր Եւ Անահիտ Նշանեան
Շիմնադրամի մեկնասութեամբ

Նվիրում եմ մորս՝ Նադեժդա Բեգլարյանի հիշատակին:
Աղաչեմ՝ ողորմի ասեք:

ՕՐՎՆՈՒԹՅԱՆ ԽՈՍՔ

Իր սկզբնավորման պահից իսկ քրիստոնեությանը հատուկ են եղել հրաշքները: Այսինքն այն երևույթները, որոնք դուրս են սովորականի ոլորտից:

Ինքը՝ մեր Տեր Յիսուս Քրիստոսը, հաճախ էր դիմում հրաշքների: Դրանք Նրա համար սովորական էին, իսկ Երկրի վրա ապրող մահկանացուներիս համար՝ անսովոր: Ի՞նչը կարելի է հրաշք համարել: Այն, որ տեղի է ունենում՝ բացառելով Երկրի վրա գործող օրենքնե՞րը, թե՝ այն, երբ այս կամ այն երևույթը մեր աչքին հրաշք է համարվում միայն այն պատճառով, որ մարդկությունը դեռևս չի հայտնագործել այդ օրենքները: Կամ մարդիկ, որոնք պնդում են, թե կանցնեն տարիներ, գուցե և դարեր, և այսօր հրաշք թվացող այս կամ այն երևույթը բնավ էլ հրաշք չի համարվի:

Դա հետագայի ուսումնասիրության գործ է, և դժվար է այսօր ժամանակից առաջ անցնելով՝ խոսել այն բաների մասին, որոնք մենք ոչ բացատրել կարող ենք, ոչ հասկանալ: Սակայն չնոռանք չեշտել, թե հրաշքը միշտ բնազանցական է: Ասենք, ինչպես բացատրես, երբ մարդը մահանում է, անցնում է չորս ժամ, մարդիկ պատրաստվում են հանգուցյալին դնել դագաղի մեջ... և նա վերակենդանանում է: Կամ ինչպե՞ս կարելի է Երկրային օրենքներով բացատրել այն երևույթը, երբ կինը մահացել է, բժիշկները հաստատել են մահը, գնում են, որպեսզի հերձում կատարեն և նա իր դստեր աղոքից հետո հանկարծ կենդանանում է:

Կամ, ասենք, մեքենան անդունդի եզրին կանգնել է ու չի ընկնում ծորը: Կամ կարկուտը խփում, վերացնում է շրջակա բոլոր արտերը, իսկ այն արտը, որի համար Անդաստանի արարողություն էր կատարվել, մնում է կարկուտից պաշտպանված....

Ելի կարելի է շարունակել դեպքերի թվարկումը, որոնք կասկածամիտը գուցե թե փորձի մեկնաբանել բնության այս կամ այն

Երևույթով, սակայն ֆիզիկայի ոչ մի օրենք, բնության օրենքների ոչ մի շիմացություն չի կարող բացատրել այն փաստը, թե ինչպես քաղցկեղով հիվանդ մարդը կարող է բժշկվել՝ հույսը միայն Աստծոն վրա դնելով և աղոթելով:

Յրաշքը չի կարող լինել առանց հավատքի: Պատահական չէ, որ մեր Տեր Յիսուս Քրիստոսը բժշկելուց առաջ մարդկանցից հավատ էր պահանջում: Այո, հավատ, քանի որ հավատով կարելի է ամեն ինչի հասնել, և այն, ինչ անհնարին է մարդկանց, հնարավոր է Աստծոն համար:

Չժխտենք, որ գերբնական Երևույթների հեղինակը կարող է նաև սատանան լինել: Սուրբ գրքին ծանոթ յուրաքանչյուր մարդ կարող է հիշել, թե ինչպես էր Սիմոն մոգը թռչում օդով (Գործք: 8): Սակայն նրա հրաշագործությունների վերջնական արդյունքը Երբեք բարի չի լինում և միշտ կործանարար է լինում մարդկանց համար: Ահա այդ է պատճառը, որ մարդիկ, հաճախ հրապուրվելով սատանայական այս կամ այն գուշակության Երևութական ծշմարտությանք, հետագայում ավելի մեծ ցավի կամ առավել մեծ փորձանքի են հանդիպում:

Չփորձենք խորանալ հրաշքների և նրանց բացատրության հարցի մեջ, սակայն ասենք, որ առանց հրաշքների մարդկային կյանքը շատ միագիծ կլիներ և առանց հավատի շատ տարօրինակ կլինեին հրաշքները: Դրանք հիմնականում տրվում են հավատավոր մարդկանց: Թեև չենք բացառում նաև անհավատներին պատահած հրաշքները: Դրաշքները միշտ տրվում են որոշակի նպատակով: Սակայն գլխավորն այն է, որ հրաշքը ոչ թե տեղի է ունենում մարդու, այլ՝ Աստծո կամքով: Դրաշքը ոչ թե ինքնանպատակ է, այլ անպայման ունի որոշակի նպատակ: Բացի այդ, ճիշտ չէ բնական միջոցները բողած՝ ամեն հասարակ բանի համար սպասել հրաշքի, ասել է՝ Բարձրյալի միջամտությանը: Աստված Ինքը գիտե, թե ինչպես, երբ և ինչ միջոցներով օգնի իր զավակներին:

Սակայն անդրադառնանք «Դրաշապատում» գրքին և ասենք,

որ նրա մեջ անփոփված է մեր Եկեղեցում ամեն օր տեղի ունեցող բազում հրաշքների միայն մի փոքր նասը:

Գրքի հեղինակը Վազգենյան հոգևոր դպրանոցի դասախոս, պատմագիտության թեկնածու Յրաչ Բեգլարյանն է, որը ջանասիրաբար հավաքել է հրաշքները կամ արտառոց երևույթները, դրանք Ենթարկել որոշակի գեղարվեստական մշակման, սակայն չի խաթարել դրանց եռթյունը, այլ աշխատել է ամբողջությամբ հասցնել ընթերցողին:

Կատարված է դժվար, մանրանասն աշխատանք: Յուրաքանչյուր դեպքում (բացառությամբ մեկ - երկուսի, երբ մարդիկ ցանկացել են գաղտնի պահել իրենց անունները) նշված են պատմողների անունները և այն տեղը, որտեղ տեղի է ունեցել այդ հրաշալի դեպքը և այն վայրը, որտեղ ապրում է պատմողը:

Պատմողները մեծ մասամբ Յայ Առաքելական սուրբ Եկեղեցու զավակներ են, թեև հանդիպում են նաև մարդիկ, ովքեր այնքան էլ մոտ չեն քրիստոնի լուսին: Այդ դեպքերի ականատեսների մեջ և հոգևորականներ կան, և աշխարհականներ:

Գրքի նախաբանը գրել է Սահակ Վարդապետ Մաշայանը, ով իր վարդապետական թեզը նվիրել է հրաշքների բացատրության և մեկնաբանության հարցին:

Անշուշտ, որոշ դեպքերում կարելի է վիճարկել այս կամ այն դեպքի հրաշք լինելը, սակայն եթե նույնիսկ հրաշք էլ չհամարենք, ապա չենք կարող ժխտել դրա արտառոց լինելու հանգամանքը: Ուստի գրքում գետեղված նյութերի ուսումնասիրությունը ապագա սերունդներին թողնելով՝ մեր օրինության խոսքն ասենք այս օգտակար գրքին և նրա հեղինակին: Վստահ ենք, որ այս գիրքը թեկուզ և մեկ նաքարարիթի չափ կամրապնդի հավատը մեզանում և կնպաստի Յայ Առաքելական Եկեղեցու և նրա հավատացյալների գորացմանը:

ԱՌԱՋԵԼ ԵՊԻՍԿՈՊՈՍ ԶԱՐԱՄՅԱՆ
Կոտայքի թեմի առաջնորդ

ՆԱԽԱԲԱՆ

Հրաշքներն այն բոլոր պատահարներն են, որոնք գերազանցում են բնության բոլոր ընդունված օրենքները, ինչպես նաև մարդկային ուժն ու կարողությունները: Ընդունված է հրաշքները հաճարել գերբնականի արտակարգ միջամտություններ բնականի և մարդկայինի վրա: Աստվածաշնչի մեջ հրաշքն այնպիսի մի դեպք է, որ ստիպում է մեզ ասելու. «Ի Տեառն եղեւ այս, եւ է սքանչելի առաջի աչաց մերոց» (Սաղմ. 118.23):

Տեղի ունեցած հրաշագործությունների մեջ տեսնվում է Աստծոն ձեռքը, հայտնվում Նրա կամքը և հրագործվում է նպատակը Նրա:

Հրաշքները ոչ մի ժամանակ իրենց արժեքն ու հետաքրքրականությունը չեն կորցրել ոչ հավատացյալների, ոչ էլ հասարակ մարդկանց համար: Ֆիշտ է, նրանք քիչ հանդիպող երևույթներ են, սակայն իրական են: Լրատվության միջոցները, մամուլն ու հեռուստատեսությունը ժամանակ առ ժամանակ հասարակության հետաքրքրասիրությունը սնուցում են զգայացունց լուրերով: Լուրեր, որոնք ունկնդիրներին դնում են պատահած դեպքերի մասին կարծիք հայտնելու դժվար երկընտրանքի առաջ: Մանավանդ, որ ամեն մարդ կարող է տեսնել կամ ուրիշներից լսել տարօրինակ երևույթների մասին: Սակայն սխալված չենք լինի, եթե ասենք, որ որևէ մարդու հակազդեցությունը հրաշքներին որոշվում է նրա հավատքի որակի ու մակարդակի չափով: Սակայն մեծամասնության կեցվածքն այս հարցի վերաբերյալ նակերեսային է, եթե չասենք՝ անտարբեր: Թերևս դրա պատճառն այն է, որ այս հարցը հույժ բարդ է և շատերի համար՝ նույնիսկ անլուծելի, դրա համար էլ նրանք չեն ծանրանում դրա վրա:

Հավատացյալի համար հրաշքի գաղափարն անգամ հաճախ իր կրոնական լշուշոտ բաժիններից մեկն է այնքան ժամանակ, մինչև որ որևէ լուրջ ճգնաժամ կամ տագնապ է պատահում, որը

քննության է ենթարկում նրա հավատքը: Կյանքի մեջ անպակաս են հրաշքի կարոտող դժվարալույծ պարագաները, որոնք հրավեր են կարդում հավատացյալին ի գործ դնելու իր հավատքը և պահանջելու այն հրաշալի և հազվագյուտ արդյունքները, որոնք իրագործել է խոստանում կրոնը:

Հուսահատությունը և կասկածները խորանում են, եթե ուշանում է ակնկալածը և կամ երբեք չի կատարվում: Եվ կամ՝ ճիշտ հակառակը. հավատացյալը հրաշքների նկատմամբ անիրապաշտ համոզնունքով տարված՝ կարող է միշրճվել բանականությունն անբողջովին ժխտող կրոնական կույր նախապաշարնունքի մեջ, որին հենված՝ կարող է ժխտել տրամաբանական ցանկացած միջոց հրաշքից բացի: Ասենք, օրինակ, մերժել դեղը, բժշկությունը կամ գիտության առաջարկած այլ լուծում: Կարելի է մոլորվել նաև կախարդության խավարի մեջ՝ հրապուրված գերբնականի նկատմամբ ունեցած անբնական ախտորժակից: Այս պարագաները կարոտ են առողջ հոգևոր ըմբռնումի և առաջնորդության՝ հրաշքների ասպարեզի մեջ, հավատքի նման ճգնաժամերից անվնաս դուրս գալու համար և խուսափելու հոգևոր կյանքի շատ հավանական նավարեկություններից: Ուստի շատ կարևոր է ուսումնասիրել հրաշք համարված երևույթները՝ հասկանալու համար նրանց իսկությունը, հաստատել դրանք Սուլր Գրային և Եկեղեցական մեր հավատքի հիմքերի վրա, պրատել նրանց կարելիության պայմանները և սահմանները, հստակեցնել նրանց իրականացման գործոնները և նաև՝ Աստծո ու հավատացյալի դերը նրանց մեջ: Նաև ցույց տալ սխալ ըմբռնումների ու մոլորությունների բազմապիսի տեսակներն ու ձևերը: Աններելի բացթողում պիտի լիներ, եթե Յայ Առաքելական Եկեղեցին այս ասպարեզը ամբողջովին աղանդավորների սանձարձակ պնդումներին բողներ: Անշուշտ, մեր Եկեղեցին ունի հազարավոր տարիների ընթացքում իր կուտակված խոսքն ու կարծիքն այս նյութի շուրջը, բայց մեր Երկիազարամյա հավատքը շարունակում է հրաշքներ ծնել՝ որպես բարձ Եղելություններ: Այդ հրաշքները կատարվում են հավատացյալների կյանքում:

Սևանի Վազգենյան Հոգևոր դպրանոցի դասախոս պարոն Յրաչ Բեգլարյանի այս գիրքը գալիս է լցնելու այս շատ կարևոր բացը մեր հոգևոր գրականության մեջ՝ մեզ ներկայացնելով կենդանի հավատքի արդյունքները: Յավաքված է այնպիսի նյութ, որը մեզ ստիպում է մեր հայացքը հառել նաև անբնական թվացող շատ երևոյթների վրա:

Մեր արդի աշխարհը հրաշքների վերաբերյալ հետաքրքրական մոտեցումներ ունի. հասարակության կողմից որդեգրված են կեցվածքներ, որոնք մի տեսակ հավատքի և անհավատության խառնուրդ են ներկայացնում:

Աշխարհում հրաշքների ընկալման չորս տեսակի ենք հանդիպում.

ա. Քրիստոնեության տեսակետն է, որ գրեթե անփոփոխ է մնացել Յիսուսի ժամանակներից ի վեր: Այդ տեսակետը, Նրա ուսուցումների և գործերի հիման վրա հաստատված, հրաշքն ընդունում է որպես Աստծո կամքի հայտնության սովորական միջոցներից մեկը:

բ. Բնական նյութապաշտություն (rational materialism), որ նյութական իրականությունն ընդունում է որպես միակ հենարան և աղբյուր, իսկ հոգևոր իրականությունը, բնականաբար, մեկնաբանում է որպես պատրաճ և ցնորդ: Յետևաբար, հիմնովին ժխտում է հրաշքների կարելիությունը:

Յունական փիլիսոփայության ազդեցության գոտուց ներս միշտ էլ գտնվել են այս ուղղությամբ մտածողներ վաղեմի ժամանակներից ի վեր: Ինչպես 5-րդ դարի փիլիսոփա Եզնիկ Կողբացին է ակնարկում. «Ուղեղը դատարկվելիս մարդը թօցնում է խելքը և սկսում է խոսել պատերի և կովում է քամիների հետ: Ուստի բժիշկները պնդում են, թե բնավ դև չկա, որ մտնի մարդու մեջ, այլ դրանք ցավեր են, որ մենք կարող ենք դարձանելով բժշկել: Բայց մենք դա չենք ասում, քանզի մեզ համար ծշմարիտ է Ավետարանի խոսքը, թե բազմաթիվ դևեր, երբ տեսնում էին Յիսուսին, աղաղակում և դուրս

էին ելնում մարդու միջից. և Նա սաստում էր նրանց և չէր թողնում, որ խոսեին» (Եզմկայ, Եղծ աղանդոց, ի Զատագովութիւն Աստուծոյ Շշմարտի. Եղծ Քեշին Պարսից, ԻԱ. Պուէնոս Այրէս, Այրարատ, 1951, էջ 88):

Գրաշքները, հակառակ նյութապաշտության, արժանացել են ժխտական կեցվածքի, գիտական կամ կես-գիտական ուսումնասիրությունների, հոգեբանական կամ հարահոգեբանական (parapsychology) շահագրգությունների ոլորտում, որոնք մեծապես նպաստել են, որպեսզի գիտական աշխարհը հետզիետե դրական դիրք գրավի սրանց ուսումնասիրության նկատմամբ:

Դ. Հնդկական, բուդդայական և սրանցից ազդված արևմտյան նոր-գնոստիկական շարժումներն ընդունում են, որ նյութական իրականությունը պատրամք է: Եվ եթե որևէ մեկն անհատապես հասնի այս Շշմարտությանը, նրա հետ հրաշքներ կսկսեն կատարվել ինքնարերաբար: Այս տեսակետը տարածվում է արևմուտքի մեջ՝ արժանանալով համակրանքի և հետաքրքրության:

Որևէ հրաշք չի կարելի փաստել, եթե չորդեգրվի գերբնականի գոյությունն ընդունող փիլիսոփայություն: Եթե մենք նման փիլիսոփայություն չենք որդեգրել և որևէ արտասովոր դեաք է պատահել, ապա մեծ հավանականությամբ պիտի ասենք, թե զոհ ենք գնացել պատրամքի: Փորձառությամբ մեր ձեռք բերածը կախված է նրանցից, թե ինչ տեսակ փիլիսոփայություն ենք մենք դնում այդ փորձառության մեջ:

Ծատ հավանական է, որ հավատացյալի կողմից որպես հրաշք որակվող դեպքը անհավատի կողմից նույն գնահատականին չարժանանա: Եվ, քանի որ տվյալ դեպքը պատահել է բնության մեջ, անհավատը նրա պատճառները պիտի փնտրի և գտնի բնության մեջ՝ եղածը համարելով մարդկանց դեռևս անծանոթ բնական երևույթների կամ օրենքների գործունեության արդյունք:

Այս առարկությունը մասսամբ ընդունվում է որոշ աստվածաբանների կողմից և կախված է այն քանից, թե ինչպես ենք սահմա-

Առաջ բնությունը: Հավատացյալի կողմից դժվար չէ ընդունել հոգևոր ու բնազանցական այլ աշխարհների և օրենքների գոյությունը, որոնք դեռ անծանոթ են մեզ, և որոնց գյուտը կատարելու պարագային, թերևս, հնարավոր պիտի դառնար հրաշքները բացատրել և մեկնարամել որպես բնական երևույթներ: Այս պարագային բնություն ասելով պիտի հասկանայինք ամբողջ ստեղծվածը, ամեն ինչ, որ գոյություն ունի, ներայալ նաև աննյութական և հրեշտակային աշխարհներն ու այլազան հոգևոր գոյացությունները:

Աստված անպայման բնության օրենքները զանց առնելով կամ խախտելով չեն, որ գործում է իր հրաշքները: Սուրբ Օգոստինոսը մեզ հիշեցնում է, թե «Հրաշքը հակառակ չէ բնությանը, այլ բնության մասին մեր գիտեցածներին է հակառակ» (Աստուծոյ քաղաքը, 21.8):

Հավանական է, որ իր ամենագետ իմաստնությամբ և գորությամբ Աստված կարող է տիրել բնության տարրերին այնպիսի զարմանահրաշ մի կարողությամբ, որ մենք՝ անկատար արարածներս, այլ ասելիք չունենանք, քան այն հրաշը կոչելն է: ճարտարվեստի արդի գյուտերը ըստ բնության օրենքների հրագործված մեկ-մեկ հրաշքներ են, եթե բաղդատվեն անցյալ դարերի տգիտության մակարդակի հետ: Նույնը կարելի է ասել հրեշտակների, մարգարենների և սուրբերի համար: Նրանք հավանաբար գիտեն և գործածում են որոշ հոգևոր օրենքներ ու ուժեր, որոնք գաղտնի և անբահանցելի են մարդկության մեջ մասի համար: Այս կետը հույժ կարևոր է, եթե ցանկանում ենք հասկանալ նաև կախարդության գործընթացը:

Աստծո ազատ կամքը բնության մեջ և բնության վրա, ինքնին տիեզերական հոգևոր օրենք է, և պետք է հրաշքը նկատվի որպես տիեզերական օրինավոր մի իրավունք: Այս տեսակետը շատ հարմար մի բաղդատմամբ զարգացվում է Ռիչարդ Փորթիլի կողմից (Richard L. Purtill, Thinking About Religion, (Englewood Cliffs: Prentice-Hall, 1978), 70): Նա նատնանշում է «Նախագահական ներումի» գործընթացը, որ գործածության մեջ է որպատճեն Միացյալ Նա-

հանգների օրենսդրության մեջ: Նա հրաշքը համեմատում է նախագահական ներումի հետ, որ դուրս է օրինական համակարգից, անգուշակելի է և չի կարելի ծեռք բերել փաստաբանական որևէ ճարպկությամբ: Ներումը դուրս է դատաստանական օրենքների բնականոն գործադրությունից: Բացի այդ, նախագահական ներումը երկրի օրենքների դեմ գործադրած ունաձգություն չի համարվում, որովհետև միայն նախագահինը համարվող այս իրավունքը նաև սահմանադրական նորմ է: Նմանապես, հրաշքը գիտական հետազոտության սահմաններից դուրս է համարվում և կարող է կատարվել միմիայն Աստծոն հատուկ օրենքով, ըստ Երևոյթին՝ բոլոր ֆիզիկական օրենքներին հակառակ, և սակայն առանց որևէ օրենքի խախտում համարվելու:

Բնապաշտի և գերբնապաշտի միջև բուն հարցը կայանում է ոչ թե այն կետում, թե բնության օրենքներն ինչ աստիճանով են նաև նաև կցում հրաշագործությանը, այլ հրաշքի գաղափարն ինքնին ժխտում է բնության հասկացությունը՝ որպես գոյն տիեզերական համակարգի, որի մեջ տեղ չկա անակնկալի կամ Աստծոն համար, որ ըստ կամ կարենա միջամտել բնության սոսկ մեխանիկականությանը: Բնապաշտի խնդիրն է մերժել տիեզերքից դուրս որևէ ազդակի գոյությունը, որ անկախ է բնության օրենքներից և գերազանցուն է նրանց: Ըստ բնապաշտական գիտության հասկացողության, դեպքերը կարելի է բացատրել ուրիշ դեպքերով, հետևաբար ինաստագուրկ է դրանց բացատրության համար դիմել որևէ գերբնական պատճառի կամ ակնարկել որևէ բնազանցական պատճառ:

Ուրեմն հրաշքներն անպայման հավատք չեն ստեղծում, բայց հրաշքների ընկալման համար հավատքը պարտադիր պայման է: Ավետարանները վկայում են, որ անգամ Քրիստոսը չկարողացավ համոզել բոլոր մարդկանց, ովքեր ականատես եղան աչաշլաց հրաշքներին, ինչպես, օրինակ, չորս օրվա մեռածին հարություն տալն էր: Այս հրաշքի ականատեսներից ոնանք նույնիսկ որոշեցին Հիսուսի հետ նաև Ղազարոսին սպանել (Հովի., 11:46 և 12:10):

Յայտնի է, որ հրաշքը չի տալիս հավատքի բոլոր խնդիրների պատասխանը: Մարդու հոգին ումի Ենթագիտակցական հասուլք բարդությներ, որոնք պատճառ են դառնում, որ անձը երբեմն շատ դյուրությամբ մի կողմ շպրտի բոլոր այն փաստերը, որոնք հակասում են իր նախասիրություններին: «Եթե Մովսեսին և մարդարեներին չեն լսում, մեռելներից մեկն էլ եթե հարություն առնի, չպիտի հանոգվեն» (Ղուկ., 16: 31):

Եթե անհավատ մեկը փոխի իր մեկնակետը և ընդունի աներևույթ էությունների և Աստծո գոյությունը, ապա այդ դեպքում միայն հրաշքներն ընդունելի ու իմաստալի կդառնան նրա համար: Սակայն չնոռանանք հակադարձը. նման հավատադարձ տեղի է ունենում, եթի մարդիկ ականատես են լինում հրաշքի: Այնպիսի անբացատրելի, խորհրդավոր և արտասովոր դեպքեր, որոնք ժամանակ առ ժամանակ պատահում են մարդկանց, ստիպում են, որ նրանք վերստին քննեն իրենց աշխարհայացքը և տեղ բանան գերբնականի համար:

Պարոն Յրազ Բեգլարյանի աշխատանքն այս առումով խիստ կարևոր է, որովհետև այն մեզ է ներկայացնում բազմաթիվ գերբնական դեպքեր, զարմանալի պատմություններ, հոգնոր ապրումներ և փորձառություններ, որոնք պատահել են մեզ նման մարդկանց հետ: Դեպքեր, որոնք աստվածային միջամտության դրոշմ ունեն և կրկին ու կրկին փաստում են մեր հավատքի շոշափելի ու իրական լինելը:

Որքան էլ որ զանազան ձևերով հանդես գան, հրաշքներն ի վերջո ընկերային դեպքեր են, որոնք կարոտ են դրանք որպես «հրաշք» ընկալող ականատեսների վկայության: Յրաշքների վկայությունը, դրանք արձանագրելը, տարածելը, քարոզելն ու դրանց ջատագովությունը հավատքի արձարձման համար էական դեր են կատարում: Իզուր չէ, որ Աստվածաշնչի մեջ այդքան մեծ տեղ է տրված հրաշքների պատմությանը: Սակայն միայն անցյալը չէ, որ գալիս է փաստելու հրաշքների իրական լինելը, այլ ներկայումս

պատահած նմանօրինակ դեպքերը, որոնք ստիպում են հրաշքներն ընդունել որպես կյանքի երևույթ: ճիշտ է, դրանք միշտ և ամենուրեք չեն, որ պատահում են, սակայն պատահում են: Այս համեստ հատորի մեջ տեղ գտած հավատացյալ վկաների մի խումբ դարձյալ գալիս է փաստելու, որ «Աստծո համար անկարելի բան չկա»:

ՍԱՐԱԿ ԵՊԻՍԿՈՊՈՍ ՄԱՇԱԼՅԱՆ

ԻՄ ԿՅԱՆՔԻ ԱՄԵԼԱՄԵԾ ԴՐԱՇՔԸ

Ախալված չենք լինի, եթե ասենք, որ հրաշքներ կատարվում են եթե ոչ բոլոր մարդկանց, ապա նրանցից շատերի հետ: Բոլորովին այլ հարց է՝ արդյոք մարդը խորանու՞մ է եղելության մեջ և իր հետ կատարվածը որպես հրաշք ընկալու՞մ է, թե՞ ոչ:

Ինչեւ, չխճճվենք հրաշքների մեկնաբանման բարդ լարի-րինթոսի մեջ և ասենք, որ դրանց բնութագրումն ընկալման հարց լինելուց բացի մեր աշխարհի հայտնի օրենքները ժխտող կամ շրջանցող երևույթների հետ գործ ունենալ է նշանակում: Ազելի կոնկրետանալով ասենք, որ դպրոցում իմ ամենասիրած առարկան պատմությունն էր: Հաճախ, երբ ուսուցիչն անդրադառնում էր կաթոլիկ եկեղեցուն, մեզ պատմում էր նաև ինկվիզիցիայի մասին: Գույները խտացնելով՝ խոսում էր Խաչակրաց արշավանքների, դրանց ժամանակ գործադրված դաժանությունների մասին:

Ուսուցիչս կամ չգիտեր, կամ էլ դիտմամբ չէր ասում, որ Հայ Առաքելական եկեղեցին երեւէ որևէ կապ չի ունեցել ինկվիզիցիայի հետ: Եվ ոչ միայն ես, այլև իմ դասընկերները մի կարգին չէինք էլ հասկանում, թե որն է այդ երկու եկեղեցիների տարբերությունը: Հիմա համոզված եմ, որ այդ մասին չգիտեին նաև խորհրդային դպրոցների ուսուցիչները ևս:

Գալով ինձ՝ ասեմ, որ կարդալով ինկվիզիցիայի մասին՝ օրսպուր ցասումով, արհամարհանքով և վրեժով էի լցվում Քրիստոսի, քրիստոնեության, Խաչի ու Խաչյալի նկատմամբ՝ վերածվելով յուրատեսակ Սողոսի:

Բայց այն, ինչ ինձ հետ կատարվեց 10-րդ դասարանում, փոխեց կյանքիս ընթացքը: Ավարտական քննությունների շրջանում էր: Շատ էի պարապում քննությունները հաջող հանձնելու համար: Մի երեկո շատ հոգնած էի. կարդացել էի ամբողջ օրը:

Զգիտեմ՝ ննջե՞լ էի, թե՞ արթուն էի, հանկարծ ինձ հայտնվեց Քրիստոսը։ Սպիտակ շորերով էր, ժպիտը դեմքին։ Նա չասաց իր ով լինելը, բայց ես հասկացա, որ նա է։ Եկավ, կանգնեց և ասաց.

- Գնա եկեղեցի։

Չնայած տեսիլքից ազդված էի՝ բայց ինձ նման անաստված մարդը միանգամից եկեղեցի չէր գնա։ Փորձեցի նշանակություն չտալ զրան՝ այն համարելով իմ հոգնածության արդյունքը։ Ավարտեցի դպրոցը, ընդունվեցի Երևանի Մանկավարժական ինստիտուտի պատմության Փակուլտետը։ Թվում էր՝ մոռացել էի կատարվածը, բայց նա հայտնվեց դարձյալ։ Վեց ամսվա ընթացքում հայտնվեց երեք անգամ, և ամեն անգամ նույն բանն էր ասում։

- Գնա եկեղեցի։

Սովորում էի Երևանում, բայց ապրում էի Էջմիածնի շրջանի Նորակերտ ավանում։ Մի անգամ էլ (արդեն երրորդ) երբ հայտնվեց, որոշեցի մտնել Սուրբ Սարգիս եկեղեցի։ Ասեմ, որ իմ ավտորուսի կանգառը եկեղեցու մոտ էր։

Մտա, մոմ վառեցի և չհասկացա, թե ինձ հետ ինչ կատարվեց։ Ասես ամեն ինչ ինձ հետ էր կատարվում ու ինձ հետ չէր կատարվում։ Շուրջս այնպիսի մթնոլորտ էր ստեղծվել, որ այդ մի քանի բոպեի մեջ քննեցի ողջ կյանքս։ Կարծես թե ես չէի ցանկանում, բայց ներսից ինչ-որ մի բան ինձ ստիպում էր աղոթել։ Եվ ցավն այն էր, որ ես աղոթք չգիտեի, աղոթել չգիտեի, բայց աղոթեցի այնպես, ինչպես կարող էի։ Սրտիս խորքից խոսեցի Աստծո հետ և, զարմանալի բան, անկախ ինձանից սկսեցի լաց լինել։ Հանկարծ պարզորոշ հասկացա, որ պիտի փոխեմ կյանքիս ընթացքը։ Եկեղեցուց դուրս եկա հաստատ վճռականությամբ, որ գուրս եմ գալու Մանկավարժական ինստիտուտից ու գնալու եմ հոգեոր ճեմարան։

Իմ անցյալին ու դարձին նայելով՝ այն նմանեցնում եմ Պողոս Առաքյալի ընթացքին ու նրա դարձին, թեև ես Առաքյալի կոշիկների քուղերը կապելու իսկ արժանի չեմ և համեմատության եզրեր չկան: Եվ այդ ժամանակից ի վեր ես, ըստ կարի իմում, փորձում եմ ծառայել Խաչյալին ու Խաչին, Միակ ձշմարիտ Աստծուն ու Եկեղեցուն: Թե որքան է այդ հաջողվում, գիտի Աստված, իսկ ես կատարվածը համարում եմ իմ կյանքի ամենամեծ հրաշքը:

ԱՎԵՏԱՐԱՆԻ ԲՈԼՈՐ ԽՈՍՔԵՐՆ ԵԼ ՍՈՒՐԲ ԵՆ

1988թ. մայիսի 12-ին սարկավագ ձեռնադրվեցի: Վազգեն Վեհափառն այդ առթիվ իր մակագրությամբ մի կտակարան նվիրեց: Երբ կարդում էի այն, ինձ դուք եկած տեղերում նշաններ էի դնում՝ փոքրիկ խաչիկներ: Սակայն մեծ եղագ զարմանքս, երբ որոշ ժամանակ անց անդրադառնալով՝ նկատեցի, որ այդ նշանները չկան: Դարձյալ նշումներ կատարեցի և դարձյալ նույնը կրկնվեց:

Անցավ մի քանի տարի, ասես մոռացվել էր կատարվածը, և կարդալիս նորից սկսեցի նշումներ անել գրքի վրա, բայց որոշ ժամանակ անց, երբ նորից անդրադարձա, նորից տեսա, որ մի անտես ձեռք ջնջել է դրանք:

Եվ ահա մի օր, դարձյալ նինջի՞՝, թե՞ թմրության մեջ ինձ մի լույս հայտնվեց, որի միջից լսվեցի հետևյալ խոսքերը.

-Նոր կտակարանի ամեն բառը սուրբ է: Նշումներ մի՛ արա և մի բառից մյուսին նախապատվություն մի՛ տուր:

Մի տեսակ սթափվեցի թմրությունից և հասկացա, որ դա նույնպես Տիրոջ հրաշալի հայտնությունն էր ինձ:

ԻՆՉՊԵՍ ԿԱՆԱՉԵՑ ԶՈՐԱՑԱԾ ԾԱՌԸ

Սիրում եմ ծառ ու թուփ, երբ ժամանակ եմ ունենում, սիրում եմ ծառեր տնկել և խնամել: Ամեն բույսի, ամեն ծառի միջից կարծես Աստծո աչքն է նայում մեզ: Եվ ես չգիտեմ աշխարհում ավելի մեծ գեղեցկություն, քան ծաղկած ծառն է: Ինչեւ, 2006թ. գարնանը, երբ փորձում էի ջրել այգին, ուստինե փողը կը կպավ և մատղաշ տանձենիներից մեկը ջարդեց: Ցավ ապրեցի: Վերցրեցի խնձորենու մի չորացած ճյուղ, հենակ սարքեցի ջարդված ծառի համար, կապեցի ջարդված ճյուղը: Խնձորենու ճյուղը վաղուց չորացած, դեն էր նետված և ծառայելու էր որպես վառելափայտ: Եվ քանի որ այդպես էր, ճյուղը բարակ կողմով խփեցի հողի մեջ: Մտքումս աղոթեցի, որ ջարդված տանձենին վերակենդանանա, կանաչի: Անցավ մոտ քսան օր, և հանկարծ զարմանքով նկատեցի, որ ոչ միայն ջարդված տանձենին է կանաչել, այլև... կողքին տնկած խնձորենու չոր ճյուղը, որ ծառայում էր որպես հենակ: Եվ քանի որ բարակ կողմով եմ խփել հողի մեջ, ճյուղը կանաչել է, բայց ոստերը հակառակ կողմից են աճել: Կանաչել է չոր, արդեն վաղուց մեռած ճյուղը:

Ի՞նչ է սա, եթե ոչ Աստծո հրաշք: Ում պատմես՝ չի հավատա, որ լրիվ չորացած ճյուղը կարող է կանաչել: Ով գիտե, Աստված իմ սրտի տիրությունը տեսավ և ինձ խղճաց, թե՞ ինչ... Հիմա ծառն այդ աճում է հորս տնամերձում, իսկ ես չեմ դադարում զարմանալ և հիանալ Տիրոջ ողորմածության ու ամենակարող զորության համար:

ԱՌԱՋԵԼ ԵՊԻՍԿՈՊՈՍ ՔԱՐԱՄՅԱՆ
Կոտայքի թեմի առաջնորդ

«ՆԱՐԵԿԻ» ԲԺՇԿՈՂ ՈՒԺԸ

-Մինչ օրս էլ Մոռկվայում ապրում են ոռւս երկու եղբայրներ, որոնք ականատեսն են եղել «Նարեկի» բժշկող հրաշալի ուժի: Նրանք տարիներ առաջ դժբախտ պատահարի զոհ էին դարձել,- այսպես սկսեց իր պատմությունը Արցախի թեմի առաջնորդ Պարգև եպիսկոպոս Մարտիրոսյանը,- նրանց տունը հրդեհվել էր: Ու թեև իրենք մի կերպ փրկվել էին, բայց այնքան խոր այրվածքներ էին ստացել, որ նրանց սպիները երկար ժամանակ չէին վերանում: Ոչ մի պլաստիկ վիրահատություն չէր կարող վերացնել այրվածքների սարսափելի հետքերը:

Նրանք Ռուս Ռւզգափառ եկեղեցու հետեւորդներ էին: Հաճախ էին եկեղեցի գնում, աղոթում, ապրում հոգեսոր կյանքով: Մի անգամ նրանք հանդիպում են իրենց հայ ընկերոջը, որը նրանց խորհուրդ է տալիս կարգալ «Նարեկը»: Պատմում է Գրիգոր Նարեկացու մասին, նրանց է տալիս «Մատեանի» ռուսերեն թարգմանությունը:

Տղաներն սկսում են «Նարեկ» կարգալ և որոշ ժամանակ անց նկատում են փոփոխությունը, իսկ մի տարի անց վերանում են բոլոր սպիները, և նրանց այրված մաշկը վերածվում է ասես նորածին երեխայի մաշկի:

Զարմացած «Նարեկի» ամենաբոլյժ ուժից՝ նրանք ստեղծում են «Նարեկի» բարեկամների ակումբը», որտեղ մինչև հիմա էլ հավաքվում և «Նարեկ» են կարգում Աստծո և նրա սրբերի զորությանը հավատացող մարդիկ: Լինում են նաև տարբեր բժշկություններ Սուրբ Գրիգոր Նարեկացու բարեխոսությամբ:

Հ 2 հեռուստավիքի «Հոգևոր անվտանգություն» հաղորդաշար 2005թ. նոյեմբերի 1-ի հաղորդում

ՅՐԱԾՔ ԱՇԽԱՌԴ

Եվ Աստված ասաց. «Եղիցի լոյս, և եղեւ լոյս»:

Եվ այդ օրվանից ի վեր Աստված աշխարհը լցրեց հրաշքնեռով:

Մեզ շրջապատող բնությունը, բացվող ու մթնող օրը՝ արեկ լույսով ու վերջալույսով, դեպի ծովերի անհունը շտապող գետերը, թռչունների ճռվողյունը սովորական իրողություններ են: Փոքրիկ մի ծիլ ճեղքել է ասֆալտի կարծրությունը և գլուխը մեկնել է դեպի արեւ: Հողի ջերմությունից հատիկը ճաք է տալիս, ու աշխարհը լցվում է բարիքով: Եվ քանի՞ - քանի աղոթաձայն մրմունջ է առաքվում առ Աստված, որ նա պահպանի հողը ճեղքող ծիլը:

Կամ գոռող մազերով մի մանչուկ, տակավին անտեղյակ քերականական օրենքներին ու լեզվական օրինաչափություններին, նորովի է հնչեցնում հինգհազարամյա մի լեզու: Արիացու չգիտեմ քանի հազարերորդ այս հյուլեն ինչպե՞ս է այսպես վարժ ու ճիշտ թոթովում հայերեն... Եթե հեռու դարերից ինչ-որ մեկը հայտնվեր այսօր, անշուշտ պիտի խենթանար՝ այս հրաշքները տեսնելով և իրեն կարծեր հաքիաթների աշխարհում, իսկ մենք անտարբեր ենք այս հրաշք-աշխարհի նկատմամբ: Յուրաքանչյուր Աստծո օր արթնանում ենք նոր հրաշքների որոնումներով և կյանքի խելահեղ վազքի մեջ չտեսնելու ենք տալիս աշխարհն էլ, հրաշքն էլ...

Աշխարհում միշտ էլ հրաշքներ կատարվում են, սակայն մենք միայն հիշում ենք նրանք, որոնք արտառոց են կամ զարմանալի: Ահա դրանցից մեկը.

1999 թվականի սեպտեմբերյան մի օր եկա երեան՝ մորս այցելության: Հեռախոսը զանգեց: Սանահայրս էր՝ Բժշկական համալսարանի դոկտոր, պրոֆեսոր Էդվարդ Նազարեթյանը, որը

միաժամանակ նաև Պաշտպանության նախարարության բժշկական վարչության պետն էր:

-Վազգեն Սարգսյանի թիկնապահի տղան՝ փոքրիկ նժղեհը, ավտովթարի է ենթարկվել ու մահամերձ է: Վիճակն անհուսալի է: Ծնողները ցանկանում են անհապաղ մկրտել երեխային: Սրբազն հայր, խնդրում ենք ընդառաջել,- խոսափողի մեջ լսվեց նրա ձայնը:

«Ինչպե՞ս մկրտեմ,- մտածեցի ես,- Հոգեորականի հագուստ և մկրտությն ծեսի համար անհրաժեշտ պարագաներն Օշականում են...»: Սակայն...

Զանգահարեցի ՀԲՄ մասնաճյուղի տնօրեն Աշոտ Ղազարյանին: Նրա հայրը Տեր Մովսեսն է, որ մի ժամանակ ծառայում էր սուրբ Գեղարդի վանքում, իսկ հիմա վաստակած հանգստի էր կոչվել: «Նա անպայման տանը հագուստ և անհրաժեշտ պարագաներ կունենա», - անցավ մտքովս:

Գնացի նրանց տուն, հագա տեր հոր քահանայական զգեստը, որը վրաս չափազանց կարճ ու նեղ էր և հիվանդանոց շտապեցի:

Երեխան Մալաթիայի Սուրբ Աստվածածին հիվանդանոցի վերակենդանացման բաժանմունքում էր: Պետերը որդից ժամանած նյարդավիրաբույժ Վիլյամ Խաչատրյանը կատարել էր չափազանց բարդ մի վիրահատություն:

-Բժշկությունն արել է հնարավոր ամեն ինչ, - ասաց բժիշկը, - սակայն երեխային կարող է փրկել միայն Աստվածային հրաշքը:

Հիվանդասենյակում ճնշող լուսվթյուն էր: Վիշտն ու արցունքները քարացել էին ամբողջովին վիրակապված երեխայի շուրջը հավաքվածների աչքերում: Այդտեղ էին նաև Վազգեն Սարգսյանը, նրա եղբայր Արամը, Գագիկ Զհանգիրյանը, հի-

վանդանոցի գլխավոր բժիշկ Նիկոլայ Դալլաքյանը, Վիլյամ Խաչատրյանը...

Բոլորը քարացած սպասում էին: Մահճակալի վրա անգիտակից, փակ աչքերով, ամբողջովին վիրակապված երեխան էր: Նրա կապտակարմիր գույնը անիրական ու երեակայական էր դարձնում փրկությունը:

Ես կատարեցի հոգեորականի իմ պարտքը: «Իւղն անույշ յանուն Յիսուսի Քրիստոսի Հեղեալ ի վերայ քո՝ կնիք երկնաւոր պարգևացն անապականութեան...», - ասելուս պահին, երբ մյուռնված մատով դրոշմեցի նրա ճակատը, երեխան ծանրորեն բացեց կոպերը... Բոլորը միանգամից ապշանքի ու ցնծության ձայներ արձակեցին.

-Աստված... հրաշք տեղի ունեցավ...

Այսօր Նժդեհն ապրում է իր առօրյա հոգեբով, սակայն մեզնից ոչ ոք չի մոռացել 1999 թվականի աշնան այն ծանր օրը:

ԴՐԱԶԻ ԹՌԻՉՔԸ

16-17 տարեկան տղաներ էինք: Հաճախ էինք ֆուտբոլ խաղում բակում: Հրաչը, որ սովորում էր ճարտարագիտական համալսարանում և մեզանից ավելի տարիքով էր, հաճախ էր միանում մեզ:

Մի օր էլ, երբ դարձյալ ֆուտբոլ էինք խաղում, տեսանք, թե ինչպես Հրաչը բակ մտավ, բայց քայլում էր գինովցածի քայլերով: Նա տուն բարձրացավ:

Որդուն այդ վիճակում տեսնելով՝ մայրը նեղսրտում է, սկսում հանդիմանել նրան, թույլ չի տալիս, որ իջնի բակ և միանա ֆուտբոլ խաղացողներին: Զկարողանալով դիմադրել որդուն՝ մայրը փակում է դուռը:

- Դուռը փակում ես, հա՞,- հինգերորդ հարկից լսվեց Հրաչի մի քիչ գինով, բայց հումկու ձայնը,- դե որ փակում ես, ես էլ ուղիղ կիջնեմ ներքեւ:

Նա վազելով դուրս եկավ պատշգամբ և այնտեղից ներքեցատկեց: Դրան հաջորդեց մոր անբնական ու սարսափելի ճիչը: Մի քանի վայրկյանում բակը լցվեց տարբեր կողմերից դեպի վայր ընկած տղան վազող մարդկանցով:

Խառնիխուռն ձայների մեջ առանձնանում էր մոր ձայնը.

-Վայ, այս ինչ արեցի... միակս, հույսս,- գոչում էր նա՝ կուրծքը ծեծելով:

Մինչ տեղ կհասներ շտապօգնության մեքեան, հանկարծ Հրաչը ճոճվելով ոտքի կանգնեց ու սկսեց սաստել շրջապատող-ներին.

-Ի՞նչ կա... ի՞նչ եք հավաքվել վրես... կարո՞ղ ա մեղր եմ բաժանում...

Մարդիկ ապշահար նայում էին իրար: Շուտով հայտնվեց շտապօգնության մեքենան: Նրանք զոռով մեքենայի մեջ խցկեցին «Հիվանդին» ու տարան...

...Կես ժամ անց Հրաչը, մի թևը վիրակապած, ամեն օրվա պես հայտնվեց մեր խաղի կենտրոնում:

Ազգային կրթության և սպորտի նախարարություն
Արարատյան Հայրապետական թեմի
առաջնորդական փոխանորդ

ԵՎ ԴԵՎԸ ՀԵՌԱՑՎՎ

1992 թվականին էր: Մի օր Մայր տաճարում ծառայող երիտասարդ վարդապետներից մեկին մոտեցավ մի կին և հայտնեց, որ իրենց մի հարազատի տանն այս էլ քանի ամիս տարօրնակ ու անհասկանալի բաներ են կատարվում: Գիշերային ժամերին

ձայներ են լսվում, իրերն իրենք իրենց տեղափոխում են, կոտրվում են ափսեներն ու բաժակները...

Նրանք դիմել էին զանազան մարդկանց՝ մոգերի, գրքացների, էքստրասենսների, սակայն որևէ արդյունքի չէին հասել: Ամբողջ շենքը տեղյակ էր այս մասին և շենքի բոլոր բնակիչները միահամուռ կերպով հաստատում էին, որ իրենց հարևանի տանն ինչ-որ տարօրինակ բաներ են կատարվում և այնտեղ առկա է ինչ-որ չար ոգի:

Զգիտես ինչու կինը կարծում էր, որ երիտասարդ վարդապետը կարող է քշել չար ոգուն, դրա համար էլ հաստատակամորեն պնդում էր, որ հայր սուրբը գնա և որևէ կարգ կատարի:

Վարդապետն սկզբում փորձեց հրաժարվել՝ զանազան պատճառաբանություններով, սակայն ի վերջո անսալով նրա պնդումին՝ տեղի տվեց, բայց խոստացավ գալ մեկ շաբաթ անց միայն:

Վարդապետը շատ լավ գիտեր տերունական խոսքը, թե. «Այդ տեսակը ուրիշ բանով չի ելնի, եթե ոչ ծոմապահությամբ ու աղոթքով» (Մարկ. 9:28): Եվ, չնայած նրան, որ մինչ այդ այնքան էլ հակված չէր պահեցողության ու աղոթքի, պահք պահեց և աղոթեց երկար ժամանակ:

Իսկ մեկ շաբաթ անց, սպառազինված պահքով, աղոթքով և ծիսական անհրաժեշտ պարագաներով, շաբաթը պահքով ու աղոթքով անցկացրած իր երկու ուսանողների ուղեկցությամբ գնաց նրանց տուն: Հարց ու փորձից պարզվեց, որ այս շաբաթ դեռ իրեն առավել անպատճառ ու հանդուգն է պահել, զանազան սպառնալիքներ է տեղացել տան տերերի գլխին: Հոգեւորականն սկսեց պայքարը ստի թագավորի դեմ:

Նա և աշակերտները «Մաշտոցից» ընթերցեցին դիվահալածության ողջ կարգը, և դա արվեց առավել սրտանց ու հոգով, քան՝ երբեք: Կարգն ավարտելուց հետո հայտնեց նաև, որ կշրունակի գալ այնքան ժամանակ, որքան անհրաժեշտ լինի:

Աղոթքից ու հուզմունքից ուժասպառ՝ նա վերադարձավ իր խուցը և ննջեց։ Առավոտյան, դեռ ժամերգության չէր իջել, երբ դուռը ծեծեցին այդ տան բնակիչները։

-Հայր սուրբ, դեմք հեռացել է,- հայտնեցին նրանք։

-Փառք տվեք Աստծուն,- պատասխանեց երիտասարդ վարդապետը։

ՄԻՋԱՅԵԼ ԵՊԻՍԿՈՊՈՍ ԱԶԱՊԱՐԵԱՆ
Ծիրակի թեմի առաջնորդ

ԱՐՑՈՒՏՔ՝ ԱՎԵՏԱՐԱՆԻ ՎՐԱ

Մեր, ինչպես և ցանկացած քրիստոնյայի կյանքում, շատ հրաշքներ են պատահել, սակայն մեր կարծիքով գրո արժանի են այս երկուսը։

2003 թվականին էր, սուրբ Վարդանանց տոնի ժամանակ։ Պատարագ էր մատուցվում Կրասնոդարի սուրբ Ավետարանաց եկեղեցում։ Պատարագի խորհրդավոր պահերից մեկին զգացի, որ խորանի վրա դրված նկարի մեջ սուրբ Աստվածամոր աչքից արցունքի մի կաթիլ կաթեց Հիսուսի ձեռքին պատկերված Ավետարանի վրա։ Կարծեցի, թե ինձ թվաց, սակայն ժամանակ էր անցնում, իսկ արցունքը չէր չորանում։ Հրավիրեցի ինձ սպասարկող հոգևորականներին, սպասավորներին և Հարցըցի, թե ի՞նչ են տեսնում նկարի վրա։ Նրանք էլ միաբերան հաստատեցին, թե Ավետարանի վրա արցունքի կաթիլ կա։

Պատարագից հետո նույնը հավաստեցին նաև հավատացյալները։ Այդ արցունքի փայլը Տիրոջ ձեռքի վրայի Ավետարանին մնաց ևս մեկ շաբաթ, մինչև որ սարկավագը, հետաքրքրասիրությունից դրդված, մատով փորձեց շոշափել։ Այդ ժամանակ արցունքի կաթիլն անհետացավ։

Մեր կարծիքով դա Աստվածային նշան էր, քանի որ այս դեպքից մեկ շաբաթ անց բարբարոսները ջարդեցին Կրասնոդար քաղաքի հայկական գերեզմանոցի 50 գերեզմանաքար: Կարծես թե այդ արցունքի կաթիլը թափվեց ջարդված շիրմաքարերի ու քրիստոնյաների պղծված շիրիմների համար:

ԽՈՒՆԿԻ ԲՈՒՅՐԸ

2005 թվականի մայիսի 8-ին Դաղստանի հանրապետության հայշատ Կղլար քաղաքում կատարեցինք սուրբ Սարգիս մատուռի բացման արարողությունը, իսկ հաջորդ օրը մեկնեցինք Դաղստանի Դերբենդ քաղաքը, որը հինգ հազար տարվա պատմություն ունի և նրա պատմության մեջ քիչ դեռ չեն խաղացել հայերը: Քաղաքի կենտրոնում վեր է խոյանում հայկական մի գեղեցիկ եկեղեցի, որի վրայից, ցավոք, հանել են խաչերը: Ասենք նաև, որ 120 հազար բնակչություն ունեցող քաղաքում ապրում է 3 հազար հայ, 5 հազար ռուս, իսկ բնակչության մեծ մասը աղբբեջանցիներ ու լեզգիներ են:

Հեռվից նայեցինք փառահեղ եկեղեցուն և տեղի հայ համայնքի ներկայացուցիչներին խնդրեցինք, որ մեզ տանեն այնտեղ: Եվ քանի որ թաղամասն ամբողջովին աղբբեջանաբնակ էր, ազգամիջյան որևէ ընդհարում թույլ չտալու համար հանեցինք հոգևորականի հագուստը և գնացինք որպես սովորական քաղաքցիներ:

Այժմ եկեղեցին վերածվել է Կովկասի ժողովուրդների պատմության թանգարանի: Բավական ցուցանմուշներ կային այնտեղ, որոնցից ոչ մեկը հայկական չէր: Ավելին, եկեղեցու վրայից քերել, հանել էին հայկական արձանագրությունները: Այդ եկեղեցում վերջին անգամ արարողություն էր կատարվել 20-րդ - դարի սկզբին: Լուս ցավ ապրեցինք, մանավանդ այն բանից հետո, երբ աղբբեջանցի բացատրողը ոչ մի հիշատակություն չա-

ըեց ո՞չ հայերի, ո՞չ նրանց կառուցած եկեղեցու մասին: Մենք խնդրեցինք, որ թույլ տան թանգարանում երգել: Նրանք չգիտեին մեր հոգևորական լինելը և չառարկեցին: Սկսեցինք երգել նախ «Հայր մերը», ապա՝ «Տեր ողորմեան»: Եվ երբ վերջացրինք երգը, շինությունը լցվեց խունկի բույրով: Իս զգացինք ոչ միայն մենք՝ հոգևորականներս, այլև համայնքի անդամներն ու անդամ թանգարանի ադրբեջանցի աշխատակիցները:

-Ովքե՞ր եք դուք,- զարմացած հարցրեցին թանգարանի աշխատակիցները և երբ իմացան, որ հայ հոգևորականներ ենք, լուրն անմիջապես տարածեց թաղամասում: Եվ մենք, անվտանգության նկատառումներից ելնելով, ստիպված եղանք չուտափույթ կերպով հեռանալ քաղաքից: Հիմա՝ տարիներ անց, ամեն անգամ Դերենդ քաղաքը հիշելիս այդ օրն եմ հիշում և եկեղեցով մեկ չգիտես որտեղից և ինչ հրաշքով տարածված խունկի բույրը:

ՄՈՎՍԵՍ ԵՊԻՍԿՈՊՈՍ ՄՈՎՍԻՍՅԱՆ
Հարավային Ռուսաստանի թեմի առաջնորդ

ԻՆՉՈՒ ԱՌԱՋ ԶԵՐ ԾԱՐԺՎՈՒՄ ԱՎՏՈՄԵՔԵՆԱՆ

Շուշի քաղաքից պետք է գնայինք Վաղուհաս՝ պսակադրություն կատարելու: Այդ առավոտ իմ մեքենան հնարավոր չեղավ գործարկել: Խնդրեցի, որ Տեր Հովհաննես քահանան իր մեքենան տրամադրի: Վերցրի մեքենան և ճանապարհ ընկա: Ճանապարհն անցնում էր անտառի միջով: Հասա ճանապարհի կեսին և մեքենայի շարժիչը հանգեց: Հետո մի կերպ գործարկեցի, բայց զարմանալի բան էր կատարվում՝ մեքենան առաջ չէր շարժվում, իսկ ետ շարժվում էր: Երեք անգամ փորձեցի անցնել ճանապարհի այդ հատվածը, բայց ինձ չհաջողվեց: Ուացիայով կապվեցի Տեր Հովհաննեսի հետ, ներկայացրեցի իրավիճակը,

խորհուրդ հարցրեցի, սակայն դա էլ չօգնեց: Իջա մեքենայից, նայեցի շրջակայքը և, այ քեզ զարմանք, հենց մեքենայի դիմաց, մի քանի մետր այն կողմ հակատանկային ական էր քողարկված: Երբ նկատեցի ականը և նստեցի ափտոմեքենան, այն աշխատեց: Շրջանցեցի վտանգավոր տեղամասը և առաջ գնացի: Ինչ խոսք, այս դեպքից հետո մի անգամ էլ փառք տվեցի Աստծուն, որ այդպես հրաշալի կերպով պահպանում է իրեն ապավինողներին:

ԱՐՈԹՔԸ ՎԱՐԱՆ Է ՄԱՐԴՈՒ ՀԱՄԱՐ

Արցախյան պատերազմի օրերին էր, ավելի ստույգ՝ 1992 թվականի դեկտեմբերի 30-ին: Հայ Առաքելական եկեղեցու Արցախի թեմի թեմական խորհրդի անդամ Ռոբերտի հետ գնացել էինք Մարտունու շրջանի Ճարտար գյուղ: Երբ առաջադրանքը կատարեցինք, շարժվեցինք դեպի շրջկենտրոն: Հանկարծ աղդրեցանական կողմը սկսեց «Գրադով» հրետակոծել: Դաշտում աշխատող մարդիկ, նրանց հետ էլ՝ մենք, ապաստանեցինք մոտիկ անսամբլումում: Այնտեղ կար մոտ 150-160 մարդ, գոմը լեփ-լեցուն էր անսառուներով: Թշնամին թիրախ էր դարձել այն և հարվածում էր մոտ 40 րոպե: Ես՝ հոգեորականս, ի՞նչ կարող էի անել աղոթելուց բացի: Կանգնեցի մի անկյունում և սկսեցի աղոթել: Բազմաթիվ արկեր կպան գոմին, բայց ոչ մի մարդ չվնասվեց: Իմ, և ոչ միայն իմ կարծիքով, թշնամու «Գրադի» առաջ փահան դարձավ աղոթքը: Այդ դեպքից հետո շատերը դարձի եկան և հավատացին Աստծուն:

ՎՐԹԱՆԵՍ ԵՊԻՍԿՈՊՈՍ ԱԲՐԱՅԱՆՑԱՆ
ՀՀ Պաշտպանության նախարարի
հոգեւոր խորհրդական

ԻՆՉ ՓՐԿՈՂ ԶԵՌՔԸ

Ես ծնվել եմ Կ. Պոլսում: Մեր ընտանիքն աղքատ էր և չէր կարողանում բնակվել քաղաքի կենտրոնում: Տուն էինք շինել մի շրջանում, ուր գրեթե բնակչություն չկար: Չկար նաև ջուր, էլեկտրականություն: Այդ բոլորը հետագայում եղան: Մի խոսքով, մանկությունս այդ թաղամասում եմ անցկացրել: Հիմա ստույգ չեմ կարող ասել, թե այդ ժամանակ քանի տարեկան էի, բայց երկի մի չորս-հինգ տարեկան կլինեի: Հավանաբար 1966 կամ 1967 թվականը պիտի լիներ: Մեր թաղամասում էլեկտրականություն անցկացնելու համար մեծ սյուներ էին տնկելու և խոր փոսեր էին փորել: Մի օր տեղատարափ անձրև սկսվեց, իսկ հետո երկինքը պարզեց: Ես հետաքրքրասեր երեխա էի: Գնացի այդ փոսերի մոտ և տեսա, որ դրանք լի են ջրով կամ ավելի ճիշտ՝ ջրախառն տիղմով: Բոլոր երեխաների նման ես էլ էի սիրում ջուրն ու ցեխը: Մոտեցա ջրափոսին, սկսեցի նայել, հետո չեմ հիշում. ո՞տքս սահեց, թե՞ ինքս մտա փոսի մեջ: Զվախեցա, երբ ցեխաջուրն սկսեց կամաց-կամաց կլանել ինձ: Նախ ընկղմվեցի մինչև գոտկատեղս, հետո՝ մինչև կոկորդս, հետո ցեխաջուրը ծածկեց ինձ: Սկսեցի ինձ փրկելու համար ճիգեր գործադրել, բայց ավելի խորն ընկղմվեցի:

Սակայն հանկարծ զգացի, որ մի ձեռք հետեւի կողմից բռնեց իմ օձիքից, քաշեց, հանեց ցեխաջորի միջից և կանգնեցրեց ջրափոսի կողքին: Ես ձեռքը չտեսա, բայց այն զգացի: Ջուրն ու ցեխը թափվում էին վրայից: Զարմացած նայում էի շուրջս, բայց շուրջըլորն ամայի դաշտ էր, և ոչ ոք չկար:

Գնացի տուն, ծեծ կերա ցեխոտվելու համար... Բայց մինչև օրս չեմ մոռացել ինձ օգնող, ինձ փրկող ձեռքի զգացողությունը:

Հիմա, երբ տարիներ են անցել, մտածում եմ, թե դա Աստծո ողորմությունն էր, որ հասավ ինձ: Դեռևս մեռնելուս ժամանա-

կը չէր, և Աստված այլ ծրագրեր ուներ ինձ հետ կապված, դրա համար էլ միջամտեց ու փրկեց ստույգ մահից:

Նաև հավատացյալ ծնողներ ունեի և մեծ մամիկ, որոնք միշտ աղոթում էին ինձ համար: Ես հիմա հաստատ համոզված եմ, որ դա գերբնական միջամտություն էր իմ կյանքի ընթացքին:

ՅԱՅԱՅԻՍ «ՄԱՅԸ»

Մորս մայրը, որին Յայա էինք ասում, շատ հավատավոր կին էր, և նրա հետ մի քանի անհավատալի դեպքեր են կատարվել, որոնք ես ուզում եմ շարադրել այստեղ: Նա Երկրորդ աշխարհամարտի տարիներին ծանր հիվանդանում է: Այդ ժամանակ նրա ամուսինը ծառայում էր թուրքական բանակում, իսկ մորեղբայրս, որ վեց ամսական երեխա էր, խանձարուրի մեջ էր: Տատիս մյուս գավակները դեռևս ծնված չեն լինում:

Ապրելիս են լինում են մի խուլ գյուղում և ո՛չ բժշկական օգնության ակնկալիք կար, ո՛չ հույս:

Զարմանալի չթվա ասածն: Տատս հիվանդանում է և... մահանում: Մի չորս ժամ մահացած է լինում, դիակը՝ արդեն սկացած: Մարդիկ գալիս են, լաց լինում վրան, թաղման պատրաստություն են տեսնում: Սակայն մահից չորս ժամ անց, ի սարսափ և ի ուրախություն ներկաների, մահացածը վերակենդանանում է:

Հետագայում, մինչև իր կյանքի վերջը, նա մեզ պատմում էր այն ամենը, ինչ ինքը տեսել էր «մահվանից հետո»:

-Ես անկողնում պառկած էի,- ասում էր,- դրսից հարսանիքի ձայներ լսեցի: Նվագում էին, երգում, բացականչում: Հետո վեր կացա անկողնուց, դուռը բացեցի ու տեսա, որ տարօրինակ, բայց տոնական հագուստներ հագած մարդկանց ուրախ թափոր է անցնում:

-Դու էլ արի,- ասացին,- ու ես միացա նրանց: Զարմանալին այն էր, որ այնտեղ մեր ծովափնյա թաշքյովլու գյուղից ոչ ոք չկար: Գնացի նրանց հետ այնքան, մինչև որ հասանք մի մեծ կամըջի: Տարածքը մեր գյուղին կամ մեր տարածքին նման չէր բոլորովին: Անդունդի վրայով էր անցնում այդ կամուրջը: Նրա տակ, որոշ տեղերում կրակներ կային, որոշ տեղերում՝ անամոթ, անպարկեշտ, անպատմելի տեսարաններ: (Դրանց մասին հիշելիս նա ամաչելով փակում էր դեմքը, չէր պատմում):

-Հետո,- ասում էր,- երբ հասա կամըջի մեջտեղը, հիշեցի մանկանս ու հետ դարձա:

-Ո՞ւր ես գնում,- զարմացան թափորի մարդիկ,- առաջ պիտի գնանք:

-Զէ՛,- առարկեցի,- ես մանուկ ունեմ,- ու եկա մեր գյուղ, մտա տուն: Թափորն էլ՝ ինձ հետ: Եկել, քաշում էին, թե՝ արի: Ես սկսեցի լաց լինել և պաղատել, որ ինձ թողնեն:

-Երեխաս որբ կմնա, ամուսինս բանակում է,- լալիս էի...

Եվ հանկարծ այդ լացիս ժամանակ ներս մտավ երկար հասակով, երկար մազերով մեկը: Հասկացա, որ Հիսուսն է, չնայած նրա անունը չտվեցին:

-Ի՞նչ է պատահել,- հարցրեց:

- Զի ուզում գալ,- պատասխանեցին:

Ես ընկա նրա ծնկներին և աղաչեցի.

-Վեց ամսական զավակ ունեմ, ես որ գամ, նա որբ կմնա: Ամուսինս բանակում է...

-Թողեք, թող մնա,- ասաց և նրանք գնացին, իսկ ես վերակենդանացա:

ԵՎ ՊԱՏԻԺ, ԵՎ ՕԳՆՈՒԹՅՈՒՆ

Զնայած նրան, որ եղեռնից բավական ժամանակ էր անցել, թուրքիո մեջ գավառում ապրելը բավական դժվար էր, և մեր ընտանիքը որոշում է գալ քաղաք: Թուրքերը շրջաններում շարունակում էին ճնշել հայերին, իսկ Պոլսում ազգային հալածանքից ու սոցիալական ծանր վիճակից ազատվելը համեմատաբար հեշտ էր:

Սակայն Պոլսում նույնպես նրանց ապրուստը հեշտ չէր, ապրում էին աղքատության մեջ, այս պայմաններում նա հղիանում է: Հղիանում է, բայց չի ցանկանում ծննդաբերել: Եվ քանի որ բժշկի դիմել չէր կարող՝ միջոցներ չկային, փորձում է տնական եղանակներով ազատվել անցանկալի երեխայից:

Երազում նրան մարդիկ են այցելում և զգուշացնում.

-Դու այս զավակը պիտի ծնես, այլապես շատ վատ կլինիքեղ համար:

Բայց ընտանիքն աղքատ է, ապրուստ չկա, և նա չի ցանկանում լսել զգուշացումն ու ազատվում է անցանկալի պտղից:

Որոշ ժամանակ անց, երբ ճաշ պատրաստելիս է լինում, հանկարծակի բռնկվում է նավթավառը: Կրակից բռնկվում է նաև նրա հագուստը, այրում մարմինը, մազերը, աչքերը... Շատ ծանր վերքերի մեջ է լինում, որոնցից թեև մի կերպ ապաքինվում է, սակայն կորցնում է մի աչքը: Սակայն աշխատում էր չտրնջալ, քանի որ դա իր համար պատիժ էր համարում, իրեն արած զգուշացումը չլսելու համար: Զնայած այդ ծանր ֆիզիկական վիճակին, հղիանում է և ունենում է չորրորդ զավակը:

...Հետաքրքիր է նաև թայայիս վախճանը: Կյանքի վերջին շրջանում ինքը շատ էր գիրացել և գրեթե դուրս չէր գալիս տանից:

-Հոգիս ձեր բոլորի հետ շրջում է աղոթքով,- ասում էր:

Իր մահից տասնհինգ տարի առաջ նա կաթված տարավ։ Զէր կարողանում խոսել, և բժիշկները կանխատեսում էին վախճանը։ Պառկած էր անշարժ, և զավակները հերթով հերթապահում էին։ Այդ օրը մայրս է լինում հերթապահ։ Խոհանոցից գալիս է հիվանդին նայելու և ... ով զարմանք, տեսնում է, որ Յայն վեր է կացել ու նստել է անկողնում։

-Այս ի՞նչ եղավ,- զարմանում է մայրս,- ինչպե՞ս նստեցիր։

-Հիսուսը բարձրացրեց,- ասում է նա, որ նաև սկսել էր խոսել,- ես պառկած էի, աղոթում և լաց էի լինում՝ Նրան խնդրելով, որ կամ բժշկի ինձ, կամ՝ տանի։ Հանկարծ զգացի, որ մի զորավոր ձեռք, թիկունքիցս հրելով, ինձ բարձրացնում է։ Բարձրացրեց և նստեցրեց։

Նա ապրեց ևս տասնհինգ տարի, այդպես նստած, ամեն ժամ և ամեն օր աղոթում էր մեզ համար, մինչև որ կնքեց մահկանացուն։

ՍԱՐԱԿ ԵՊԻՍԿՈՊՈՍ ՄԱԾՎԼՅԱՆ

Կ. Պոլսի աթոռի միաբան

ԵԿԵՂԵՑՈՒ

ՅՐԱՃԱԳՈՐԾ ԲԱՆԱԼԻՆ

Այս դեպքն անձամբ ինձ հետ չի կատարվել։ Այն ինձ պատմել են ականատեսները։ Մարդը պատմում էր, որ ինքը զավակ ունեցել, որը երկար ժամանակ չի խոսել։ Հետո լսել է, որ երեխայի լեզուն բացելու համար նրան պետք է տանել Գեղարդավանք, և առավոտ վաղ, դեռևս եկեղեցու դուռը չբացած, բանալիով օրհնել տալ երեխային։ Քանզի շատ են այն դեպքերը, երբ երկար ժամանակ չխոսած երեխան դրանից հետո սկսում է խոսել։

-Առավոտյան կդնանք Գեղարդ, որոշեցինք մենք,- ասաց մարդը,- սակայն առավոտյան վեր կացանք և տեսանք, որ ձյուն է եկել: Մի պահ հուսահատվեցինք, բայց հետո որոշեցինք գնալ և երեխային օրհնել տալ եկեղեցու դռան բանալիով: Մի կերպ, երկար տանջանքներից հետո հասանք Գեղարդ...

Հասել էին, սակայն մի քիչ ուշացել էին, քանի որ արդեն բացվել էր եկեղեցու դուռը: Նորից հուսահատության մեջ էին ընկել, բայց այդ հուսահատությունը փարատել էին հոգևորականները:

-Ոչինչ,- ասել էր քահանան,- թեև եկեղեցու դռներն արդեն բացվել են, բայց բացողները եկեղեցու սպասավորերն են...

Ինչեւ, քահանան եկեղեցու բանալիով օրհնել էր երեխային և նա անմիջապես սկսել էր խոսել:

ՏԻՐԱՄՈՐ ՀՐԱՃԱԼԻ ԵՐԵՎՈՒՄԸ ԶԻՍՎՈՐՆԵՐԻՆ

- Գիտեմ, որ հավաքում եք վերջին ժամանակներս Հայ Առաքելական եկեղեցում տեղի ունեցած հրաշալի դեպքերը,- ասաց Գաբրիել արեղա Սարգսյանը,- նման մի հրաշքի մասին էլ ես գիտեմ: Այն պատմել է Արցախի թեմի առաջնորդ Պարգև եպիսկոպոս Մարտիրոսյանը: Արցախյան պատերազմի տարիներին, երբ ուզմաճակատում մեր վիճակն այնքան էլ լավ չէր, զինվորները մարտի պիտի գնային, և նրանցից յուրաքանչյուրի դեմքին թախիծ ու մտահոգություն կար, երկնքում երևաց սուրբ Աստվածամոր պատկերը:

Սրբազնի ասելով՝ նրա դեմքը մի քիչ տիսուր ու թախծոտ է եղել: «Կարծես նա եկել էր մեզ իր զավակների պես գրկելու և ասելու՝ ոչինչ, դուք թվով քիչ եք, սակայն հարցը քանակի մեջ չէ, այլ՝ ոգու: Զեր գործն արդար է», - ասում էր Պարգև Սրբազնը: Այդ երեսումը ոգևորել է զինվորներին, նրանց նոր հաղ-

թանակների մղել: Բացի այս դեպքից, պատերազմի ժամանակ եղել են Տիրամոր այլ երևումներ ևս:

ԳԱԲՐԻԵԼ ԱԲԵՂԱ ՍԱՐԳՍՅԱՆ

ՕՐՎՈՒԹՅԱՄԲ ԱՍՏԾՈ ՎԵՐԱԴԱՐՁԱ ԵՐԿՐԱՅԻՆ ԿՅԱՆՔ

Այն, ինչի մասին ուզում եմ պատմել, շատերին անիրական, ֆանտաստիկ կթվա: Ինքս էլ, գուցե այնքան էլ չհավատայի, եթե լսեի մեկ ուրիշից, քանզի կարծում էր՝ անհավանական է լինել Արարչի մոտ և այնուհետև վերադառնալ երկիր:

2006թ. նոյեմբերի 9-ը կարծես ոչնչով չէր տարբերվում մյուս օրերից: Սուրբ Գայանե եկեղեցուց, որի վանահայրն եմ, օրվա ծառայությունները կատարելուց հետո, ժամը 18:30-ի սահմաններում իմ մեքենայով ուղևորվեցի Երևան. մի քանի օր առաջ պայմանավորվածություն ունեի համապատասխան գրքեր վերցնելու՝ իմ վարդապետական ատենախոսությունը գրելու համար:

Մեքենան արագ վարելու սովորություն երբեք չեմ ունեցել. կարծում եմ այդ օրն էլ չեմ գերազանցել արագությունը: Երեկի թե հոգնածությանը գումարվել էր աշնանային մռայլ մթնշաղը, այդ պատճառով կոպերս ծանրանում էին և մերթընդմերթ փակվում (միգուցե սրանք դատարկ պատճառաբանություններ են, և ամեն ինչ որոշված էր ի վերուստ): Մուսալեռի կամարն անցնելուց հետո չնկատեցի շրջադարձ կատարել պատրաստվող հսկա բեռնատարը, և տեղի ունեցավ սարսափելի վթարը:

Ականատեսների վկայությամբ՝ իմ ջախջախված մեքենային նայելով՝ ոչ ոք չէր ասի, թե վարորդը ողջ է մնացել: Ուշքի գալուց հետո՝ ամիսներ անց, պիտի հիշեմ, որ վթարի պահին կարծես աներևույթ մի ուժ հետ քաշեց իմ նստատեղը և կոտրեց:

Այն դժոխային տվայտանքները, որ ապրել էին իմ հարացատները, և հատկապես, ծնողներս, մինչև հիմա դրոշմկած են նրանց աչքերում, քանի որ ո՛չ էջմիածնի հիվանդանոցում, և ո՛չ էլ երևանի «Էրեբունի» բժշկական կենտրոնում բժիշկներից ոչ ոք հույսի նշույլ անգամ չի ունեցել, թե ես կյանք կվերադառնամ:

Հիվանդանոց տեղափոխելուց երկու ժամ հետո այնտեղ եկավ նաև Ամենայն Հայոց Հայրապետը՝ Գարեգին Երկրորդը: Վերակենդանացման բաժանմունքի ղեկավարի հետ կարծ առանձնազրույց ունենալուց հետո հուզված դուրս եկավ և ասաց. «Մեզ մնում է աղոթել առ Աստված, որ նա կյանք պարզեի հայր սուրբին»:

Համոզված եմ, որ ծնողներիս, Վեհափառի և իմ եղբայր Հոգևորականների, իմ մյուս քույրերի ու եղբայրների աղոթքներն էին, որ հասու եղան Հայր Աստծուն:

22 օր «Էրեբունի» բժշկական կենտրոնի վերակենդանացման բաժանմունքում անգիտակից վիճակում մնալուց հետո՝ 23-րդ օրվա կեսին, աչքերս բացեցի և առաջինն ավագ եղբորս տեսա, որ այդ ողջ ընթացքում պահապան հրեշտակի նման եղել էր կողքիս:

Այդ սարսափելի դեպքից արդեն ամիսներ են անցել: Օր-օրի, կաթիլ-կաթիլ, Աստծո օրհնությամբ, ծնողներիս, բժիշկների օգնությամբ վերականգնում եմ ուժերս: Կարծում եմ՝ հեռու չէ այն օրը, երբ ի զորու կլինեմ շարունակել իմ առաքելությունը...

Իսկ այժմ թույլ տվեք անցնել այս պատմության ամենակարևոր հատվածին:

Վժարից անմիջապես հետո ես կարծես տեղափոխվեցի մի ուրիշ աշխարհ: Քաղցը նինջը պատեց աչքերս, և ես սկսեցի բարձրանալ: Մարդկային լեզուն ի զորու չէ նկարագրել իմ տեսած գեղեցկությունը: Անծայրածիր կանաչ տարածություններ՝

ծաղկագարդ ու խնկաբույր։ Այդ վայրը թվում էր այնքան սքանչելի, որ կարող էի մի հավիտենություն անհոգ ապրել։

Այս դրախտային վայրում մի մեծ ու գեղեցիկ տուն կար։ Ներս մտնելով՝ տեսա մի սպիտակամորուս, փառահեղ ծերունու, որն ինձ ընդառաջ էր գալիս։ Ես անմիջապես հասկացա, որ ինձ մեծ բախտ է վիճակվել, սեփական աչքով տեսնել ՆՐԱՆ՝ տիեզերքը արարողին, մեր բոլորի Հայր Աստծուն։ Ողջունելուց հետո ինձ ծանոթացրին տան պայմաններին։ Այստեղ ինձ հյուրասիրեցին երկնային ուտելիքներով՝ սուրբ հացով և փլավով։ Ինձ համար ամենազարմանալին այն էր, որ այնտեղ կար ինչ-որ հսկա իր, որը ցույց էր տալիս, թե ինչ է կատարվում երկրում։ Այդ հիասքանչ վայրում շատ մարդիկ կային։ Մարդկանց հոգիներում տիրում էր խաղաղություն և անհոգություն։ Նրանց մեջ ես ճանաչեցի մեր հարեւանուհիներից մեկին (որը, ինչպես հետագայում իմացա, մահացել էր իմ վիթարի ենթարկվելուց մի քանի օր անց)։

Այն, ինչ կատարվում էր այս դրախտային վայրում, պարզապես հրաշք էր։ Այստեղ կարծես չկար ժամանակ, համենայն դեպս, ես այն չեմ զգացել։ Ինքս ինձ զգում էի հավիտենականության ու երանության գրկում։ Ամեն ինչ անեղծ ու անբասիր էր, հետաքրքիր, հիասքանչ։ Մեզ տեղեկացնում էին ամեն բանի մասին, մենք տեսնում էինք ամեն ինչ։

Միաժամանակ հետո, սպիտակափառ ծերունին, ինքը՝ Հայր Աստված, կանչեց ինձ և ասաց, որ պետք է վերադառնամ երկիր՝ ծնողներիս և ինձ սպասող մյուս մարդկանց մոտ։ «Ես քեզ հետ եմ ուղարկում երկիր, - ասաց նա, - Հորդ ու մորդ մոտ, և քեզ տեսնելով՝ շատ մոլորյալներ դարձի են գալու ու հավատալու են ինձ»։

Ես ասացի, որ չեմ կարող վերադառնալ, քանի որ հետդարձի ճանապարհը չգիտեմ։ Նա մի հրեշտակի կարգադրեց ուղեկցել ինձ։

Վայրէջքը նույնքան հուզիչ էր, որքան վերելքը: Իջնելիս աչքս ընկավ խոր գետնախորշերի, որտեղից մարդկային սրտակեղեք ձայներ էին լսվում: Այդ չարագուշակ փոսերում ես տեսահսկյալուխ շներ (կարծեմ՝ Կերպեր էին անվանում): Այդ գաղանների երախն այնքան մեծ էր, որ մարդ առանց դժվարության կարող էր մտնել այնտեղ և դուրս գալ: Հրեշտակն ասաց, որ դրանց մոտ գցում են չար մարդկանց:

Քիչ անց հրեշտակն այլևս ինձ հետ չէր:

Հետդարձս կատարված էր: Ես երկրի վրա էի՝ շրջապատված ինձ հարազատ մարդկանցով:

ՄԱՐԴՈՒՅ ԱԲԵՂԱ ՏԱՇԶՅԱՆ

ԻՆՉՊԵՍ ԲԺՇԿՎԵՑ ԿՈՒՐԱՑԱԾ ԿԻՆԸ

Այս պատմությունն ինձ պատմել է Զարեհ Շայրագույն վարդապետ Պարոնյանը, որ իմ դասընկերն է եղել: Մեր ուսանողության տարիներին՝ անցած դարի վաճառնական թվականներին, մենք ամեն ամառ երկու-երեք ամսով գնում էինք Սուրբ Գեղարդ:

Ամռան մի առավոտ, երբ դեռևս մոմերը վառված էին, և դեռ լույսը չէր բացվել, ծեծեցին վանքի դուռը: Վեր կացա, տեսա՝ ուխտավորներ են:

-Դեռ լույսը չի բացվել,- ասացի:

-Զգիտեմ՝ լույսը բացվե՞լ է, թե՞ ոչ,- տնքաց կինը, որովհետեւ արդեն վեց ամիս է, որ կուրացել եմ ու ոչինչ չեմ տեսնում...

Պարզվեց, որ նա գյուղերից մեկի դպրոցի ուսմասվարն է, կոմունիստ, անհավատ: Ինչ-ինչ պատճառներով կուրացել է:

Շատ բժիշկների է դիմել, բայց ոչ ոք հույս չի տվել: Բոլորի ախ-տորոշումը մեկն է եղել. կուրություն, որ բուժել հնարավոր չէ:

Մի քանի օր առաջ կինը երազ է տեսնում: Երազի մեջ նրան ասում են.

-Գնա Գեղարդա վանք, մատաղ տար, և աչքերդ կբացվեն:

Այս երազ-տեսիլքը կրկնվում է երեք անգամ: Եվ եկեղեցի գալուց առաջ, կեսդիշերին կինն արթնացնում է ամուսնուն.

-Վեր կաց,- ասում է,- ես հավատում եմ, որ Աստված կբժշկի ինձ: Ես հավատում եմ Աստծու զորությանը:

Աղամամութին բացեցին վանքի դռները, և վանահայր Հայր Մուշեղն սկսեց աղոթել: Աղոթքի կեսից կինը ձայն տվեց.

-Տեսնո՞ւմ եմ:

Բոլորը թափվեցին վարդապետի վրա և սկսեցին համբուրել ձեռքերը, փեշերը:

-Ես մեղավոր մարդ եմ,- շշնջաց վարդապետը,- խնդրում եմ Աստծո հրաշքը մի վերադրեք մեղավորիս: Եվ թույլ տվեք, որ աղոթքս ավարտեմ:

Աղոթեց վարդապետը, փառք տվեց Աստծուն իր աղոթքը լսելու և կնոջ տեսողությունը վերադրձնելու համար, իսկ կինը և իր հարազատները մատաղ անելուց և ուխտը կատարելուց հետո վերադրձան տուն:

... Այս մյուս գեպքը ես տեսել եմ իմ սեփական աչքերով: Դարձյալ Գեղարդա վանքում էր, դարձյալ իմ ուսանողության տարիներին (1957-1963թթ.): Ականատես եղա, թե ինչպես հենակներով մի կերպ քայլող մարդը եկավ ուխտ, լվացվեց Գեղարդի վանքի մեջ բխող աղբյուրի ջրով և հենակները նետելով, առանց ցավի տուն վերադրձավ:

ԽԵՆԹԻ ՀՐԱՇՎԼԻ ԲԺՇԿՈՒԹՅՈՒՆԸ

Դարձյալ անցած դարի վաթսունական թվականներին էր: Մի անգամ մտա Մայր տաճար և հանկարծ անսովոր աղմուկ լսեցի: Պարզվեց՝ մի քանի հոգի մի կերպ բերում են կապկպված մի խենթի: Պարաններով ամուր կապել էին ոտքերն ու ձեռքերը, այնպես ամուր էին կապել, որ կարծես գերան բերելիս լինեին: Ես սյունի տակ կանգնած նայում էի: Բերեցին նրան ու դրեցին իջման սեղանի առջև: Տեր Մկրտիչ քահանան սկսեց աղոթել: Անցավ որոշ ժամանակ, հիվանդը բացեց աչքերը, նայեց շուրջը և հարցրեց.

-Ինձ ինչու՞ եք կապել, արձակեցե՞ք:

Հիվանդի տերերը նայեցին քահանային:

-Արձակեցեք,- հանդարտ ասաց նա:

Կապերն արձակեցին, նա վեր կացավ, ծնկեց և ծնկաչոք երեք անգամ պտտվեց իջման սեղանի շուրջը, հետո եկավ, խաչը համբուրեց, ոտքի կանգնեց և հեռացավ՝ Աստծուն փառք տալով:

ԿԱՐԱՊԵՏ ԱՎԱԳ ՋԱՐԱՍԱ ԳԸԼԸՃՅԱՆ

ք. Էջմիածին

ԻՆՉՊԵՍ ԲԺՇԿՎԵՑ ԱՆՂԱՄԱԼՈՒՅԹ ԵՐԵԽԱՆ

Հավանաբար 1956 թվականի վերջն էր կամ 1957 թվականի սկիզբը: Ես այն ժամանակ Մայր տաճարի լուսարարապետի պաշտոնակատար էի: Մի օր եկեղեցի մտավ մի մարդ՝ մի երեխա շալակած: Երեխային դրեց վայր, հետո ձեռքերը երկինք պարզելով՝ բարձր ձայնով սկսեց Աստծուն աղերսել, որ բժշկի խեղճ

անդամալույթին: Իսկապես երեխան թույլ էր: Ամեն ինչից երևում էր, որ նա հիվանդ է փայտացումով կամ պոլիոմելիտով: Հայրն աղաղակում էր՝ խանգարելով եկեղեցու ժամերգությունը, նաև՝ աղոթող մարդկանց: Մոտեցա նրան՝ փորձելով խնդրել, որ մի քիչ ցածրաձայն աղոթի, մտածելով նաև՝ խնդրել եկեղեցու փորձառու հոգեորականներից մեկին, որ բժշկության Ավետարան կարդա երեխայի վրա: Կարծում էի, որ տարեց հոգեորականն ավելի փորձառու է այդ հարցում, իսկ ես հազիվ 24 տարեկան էի... Բայց հետո այնպես ստացվեց, որ ես ստիպված եղա զբաղվել նրանով:

Ժամերգությունից հետո երեխայի հետ ծունկի եկա հջման սեղանի առջև և սկսեցի աղոթել: Կյանքիս մեջ եթե մի քանի տասնյակ անգամ ամեն ինչ մոռացած, վերացած աղոթքի եմ կանգնել, հավատացե՛ք, որ մեկն այդ օրն է եղել: Ամբողջ էությամբ տրված էի աղոթքին և Տիրողը խնդրում էի, որ օգնի թշվառ երեխային: Աղոթքի մի պահի ինձ թվաց, թե լսելի եղավ աղերսանքս, կարծես թե լսեցի Աստծո ձայնը, ներշնչանք եկավ վրաս, որն ասում էր, թե երեխան արդեն պիտի ոտքի կանգնի: Ահա այդ էր պատճառը, որ աղոթքից հետո երեխային դիմելով ստացի.

-Կանգնի՛ր:

-Պապի՛, - չնայած իմ երիտասարդ տարիքին՝ պատասխանեց տղան, - ես ինչպե՞ս ոտքի կանգնեմ, ախր ոտքերս թույլ են:

-Աստված քեզ բուժել է, - ասացի, - Նա քեզ անպայման կօգնի, կանգնի՛ր:

Եվ, ով զարմանք, նա կանգնեց: Այնպիսի տպավորություն էր, ասես ոտքի է կանգնում նորածին գառնուկը: Նա գեռես օրորվում էր անվարժ ոտքերի վրա, բայց կանգնել էր: Երբ սա տեսավ հայրը, գոռոցով թափալվեց հատակին և սկսեց բարձրաձայն փառաբանել Աստծուն:

Վախենալով, որ հոր նման պահվածքը կարող է երեխային սթրեսի մեջ գցել, պաշտօնակիցներիս խնդրեցի նրան դուրս տանել: Հետո դարձա երեխային ու ասացի:

-Հովհաննե՛ս,- այդպես էր նրա անունը, - Աստված պապիկը մեղ կանչում է վերելից:

-Բայց..., - զարմացավ նա:

-Ի՞նչ բայց,- չթողեցի, որ կասկածը նրան խանդարեր,- չէ՞ որ Աստված ամենակարող է և քեզ սիրում է: Ա՛յ, հիմա կանչում է, ասում է՝ բարձրացի՛ր Խորան:

Հետո մի ձեռքով բռնեցի երեխայի ձեռքից, իսկ մյուս ձեռքով պահեցի մեջքից, որ անվարժ քայլքի պատճառով տղան հանկարծ չգայթի: Բարձրացանք Ավագ Խորան: Բարձրացանք աստիճաններով, աղոթեցինք միասին, հետո դուրս եկանք Տաճարից և մի քանի պտույտ կատարեցինք եկեղեցու շուրջը: Ես ցանկանում էի, որ Հովհաննեսն ավելի երկար քայլեր և իր հոգում ամրապնդվեր բուժված լինելու միտքը:

Հետո Հովհաննեսի հետ գնացինք Վազգեն Վեհափառի մոտ:

-Վեհափա՛ռ, - ասացի, - հենց նոր կատարվեց Տիրոջ հրաշքներից մեկը: Այս երեխան, որ ծնված օրվանից անդամալույծ էր, սկսեց քայլել:

Ես և երեխան ծունկի եկանք, ստացանք Վազգեն Վեհափառի օրհնությունը: Վեհը նաև ուկյա խաչ նվիրեց տղային:

Հետո Հովհաննեսի ձեռքը բռնած՝ դուրս եկա Վեհարանից և նրան հորը հանձնելով՝ ասացի.

-Փառք տուր Աստծուն, որ խղճաց քեզ և բուժեց անդամալույծ երեխայիդ:

Որոշ ժամանակ անց նրանք դարձյալ եկան էջմիածին՝ բերելով մի մեծ խոյ:

-Աս քեզ նվեր ենք բերել, - ասաց հայրը:

Ես հորը ինդրեցի, որ խոյը մատաղ անեն և Հովհաննեսն իր ձեռքով մատաղը բաժանի կարույալներին:

Տարիներ շարունակ երեխան ուխտ էր գալիս Էջմիածին, հանդիպում էինք, բայց հանգամանքներն այնպես դասավորվեցին, որ ես երկար ժամանակով բացակայեցի Հայաստանից և կորցրեցի տղայի հետքը: Հիմա չգիտեմ՝ քանի՞ տարեկան է, որտե՞ղ է ապրում, ի՞նչ գործի տեր է, բայց չեմ մոռանում Աստծո մեծ ողորմածությունը նրա և նրա հոր հանդեպ: Դրա համար էլ հաճախ այդ դեպքը հիշելիս հուզվում եմ, բայց նաև միշտ փառք եմ տալիս Տիրոջը, որ երբեք չի զլանում իր ողորմածությունը իրեն հուսացողներին:

ԵՂԻԾԵ ԿՎԱԳ ԶԱՐԱՍԱ ՍԱՐԳՍՅԱՆ
թ. Էջմիածին

ԲՈՒԺԵՑ ՄՅՈՒՌՈՒՆԻ ԿԱԹՍԱՆ

Տղաս մեր բակի շների ու կատուների հետ խաղալիս նրանցից վարակվել էր սնկային հիվանդությամբ: Շատ ծանր հիվանդություն էր, որից մազերը թափվում էին, իսկ գլխի վերքերն այդպես էլ չէին լավանում: Մեկ տարի տարանք-բերեցինք մաշկա-կեներական հիվանդանոց: Այնքան դեղեր սրսկեցին, այնքան քսուքներ քսեցինք, բայց արդյունք չկար: Խեղճ երեխային ոչինչ չէր օգնում: Իսկ հիվանդությունը վերանալու փոխարեն առաջադիմում էր:

1991 թվականին էր, Վազգեն Վեհափառի վերջին մյուռոնորհների ժամանակ: Ընտանյոք հանդերձ գնացինք էջմիածին: Ծովածավալ բազմություն էր և մոտ գնալ չէր լինում: Ես այն ժամանակ վանքում էի աշխատում և սարկավագներից մեկին խնդրեցի ու նա տղայիս թաշկինակը տարավ, քսեց մյուռոնի կաթսային: Հետո թաշկինակը դրեցի երեխայի գլխին: Դրանից հետո հիվանդությունը վերացավ: Մազերը աճեցին: Դրանից

անցել է 15 տարի: Հետքը մի թեթև երևում է, բայց ընդամենը այդքան և ուրիշ ոչինչ: Եվ ես միշտ ասում եմ. Եթե մյուռոնի կաթսային կպչելիս մարդը բուժվում է, հապա մյուռոնի կնիք ստանա՞լն ինչպիսի մեծ վահան է նրա համար:

ՏԻՐԱՄՈՐ ԵՐԵՎՈՒՄ՝ ԱՌԻՆՉԻ ԳԵՏԱՐԳԵԼԻ «ՍՈՒՐԲ ՆՇԱՆ» ԵԿԵՂԵՑՈՒՄ

2005 թվականին Առինջի Սուրբ Նշան եկեղեցու քահանան խորանի հետեւի պատը մաքրելիս պատի վրա տեսնում է մի պատկեր: Ուշադրությամբ զննելիս պարզվում է, որ դա Տիրամոր անձեռակերտ պատկերն է: Այն հաստատ հին որմնանկարի մնացորդ չէ, ոչ էլ՝ մարդու ձեռքի գործ. պարզապես պատի վրա հայտնվել է Տիրամոր պատկերը: Այդ պատկերը պահպանվել է երկար ժամանակ: Եվ բազմաթիվ մարդիկ գնում են այն տեսնելու, աղոթելու, մոմ վառելու:

Ճիշտ է, այն կարծես թե այնքան էլ պարզ չէ, բայց ակնհայտ է, որ դա նույնպես հրաշալի հայտնություն է:

ՏԵՐ ԴԵՎՈՒԴ ԶԱՐԱՆԱ ՄԱՅԻԼՅԱՆ

ԱՍՏՎԱԾԱԾՆԻ ԱՆՁԵՌԱԿԵՐՏ ՊԱՏԿԵՐ՝ ԵԿԵՂԵՑՈՒ ՍՅՈՒՆԻ ՎՐԱ

-Մոտ մեկ ու կես ամիս առաջ հյուրեր էին եկել եկեղեցի: Նրանցից մեկը հանկարծ աջակողմյան սյունաշարի առաջին սյունի վրա նկատեց մորուքավոր տղամարդու պատկեր,- այսպես սկսեց իր պատմությունը Ապարանի «Սուրբ Խաչ» եկեղեցու քահանա տեր Վիրապը և շարունակեց,- հայտնի է, որ այս

Եկեղեցին կառուցվել է դեռևս 4-րդ դարում Գնթունի նախարարական տան իշխանների կողմից:

Վերը նշված երեսումից որոշ ժամանակ անց, իսկ ավելի ստույգ՝ 2005թ. նոյեմբերի 21-ին՝ Ս. Աստվածածնին Տաճարին ընծայման օրը, այդ նույն սյունի վրա, նույն տեղում երեաց Տիրամոր պատկերը։ Նա կանգնած էր՝ Մանուկը գրկում, մարդահասակից մի քիչ ավելի մեծ չափերի։

Պատկերն այնքան պարզ էր և այնքան կենդանի, որ հնարավոր չէր չտեսնել ու անտարբեր անցնել։

Դա մեծ իրարանցում առաջացրեց հավատացյալների շրջանում և օրեր շարունակ Հայաստանի տարբեր կողմերից մարդիկ գալիս էին տեսնելու այդ անձեռակերտ հրաշքը, մոմ վառելու և աղոթելու նրա առաջ։

Հետաքրքրական է նաև, որ գրեթե նույն ժամանակ Սուրբ Սեղանի վերեռում, քարերի վրա առաջացած աղային կուտակումների մեջ, հայտնվել էր մի այլ պատկեր՝ ասես Հրեշտակի նկար լիներ։ Ակնհայտորեն այն աղային կուտակում չէր, ոչ էլ խոնավության հետք կամ որևէ հավատացյալի վառ երեակայության արդյունք։ Յանկացած մարդ, եթե ուշադիր նայեր, անպայման կտեսներ նաև այդ պատկերը։

Իմ կարծիքով այս երեսումը շատ պարզ բացատրություն ունի. Աստված բնակվել և բնակվում է Հայ Առաքելական Սուրբ Եկեղեցու կամարների տակ, և Սուրբ Հոգին միշտ ուղղորդել է և այժմ էլ ուղղորդում է այդ Եկեղեցու ճշմարիտ, աստվածահաճողնթացքը,- այսպես ավարտեց իր պատմությունը Տեր Վիրապ քահանա Ղազարյանը։

ՀԱՅ ՔԱՐԱՍԱՅԻ ԱՂՈԹՔԻ ԶՈՐՈՒԹՅՈՒՆԸ

Տարիներ առաջ, երբ ես Բոստոնի «Առւրբ Հակոբ» եկեղեցու քահանան էի, մի անդամ տեսակցության գնացի հիվանդանոցում գտնվող իմ ծխականներից մեկին: Միսիթարեցի նրան, աղոթեցի: Նա ինձ ասաց.

-Տեր Հայր, աղոթիր այս մարդու համար:

Մարդը նույն հիվանդասենյակում էր և՝ շատ ծանր վիճակում: Բժիշկները նրան ասել էին, թե իր հիվանդությունը բուժում չունի և խորհուրդ չէին տվել տուն գնալ: Ավելի լավ է մնա հիվանդանոցում, բժիշկների հսկողության տակ, մինչև որ մահվան ժամը հասնի:

Գնացի մոտը, մի քիչ նստեցի: Բարի մարդ էր երկում: Ասացի.

-Գիտե՞ք, ես հայ քահանա եմ, ուզում եմ աղոթել Ձեզ համար:

-Տեր Հայր,- պատասխանեց,- ես հրեա եմ, միշտ գնացել եմ սինակող, հավատարիմ եմ եղել իմ կրօնին, բայց հիմա ինձ համար ով էլ որ աղոթի՝ ես սիրով կընդունեմ: Սիրտս սնող հինգ երակներն էլ փակ են, և իմ տարիքի պատճառով ինձ վիրահատել չի կարելի: Ես մահվան եմ դատապարտված, եթե Աստված չօգնի: Այնպես որ, խնդրում եմ աղոթեցեք ինձ համար:

Նախ և առաջ բանավոր ու սրտանց մի աղոթք ասացի, ապա «Փարատեան», հետո՝ «Պահպանիչ», և գնացի տուն:

Մի քանի օր անց դարձյալ եկա իմ հիվանդին այցելության: Տեսա՝ հրեայի անկողինը դատարկ է:

-Այն մարդը մահացա՞վ,- հարցրեցի:

-Ոչ, Տեր Հայր, ի՞նչ եք ասում,- պատասխանեց իմ ծխականը:-Զեր աղոթքից մի քանի ժամ անց բժիշկները եկան, նորից

քննեցին նրան և գարմացան: Հիվանդությունից հետք չէր մնացել: Դարձյալ քննեցին և համոզվեցին, որ սրտի խցանված երակները բացվել են: Փաստորեն հրաշք էր կատարվել: Հիվանդին խորհուրդ տվեցին մի օր էլ սպասել և եթե ոչինչ չպատահի, տուն գնալ, քանի որ իրենց անհայտ ինչ-որ ճանապարհով մարդն առողջացել էր:

Հաջորդ օրը մի վերջին քննություն կատարելով՝ նրան դուրս գրեցին հիվանդանոցից: Հրեան այն կարծիքին էր, որ իրեն բժշկել է հայ քահանայի աղոթքը:

* * *

Վեց ամիս անց՝ 1988թ. դեկտեմբերի 7-ին տեղի ունեցավ Սպիտակի երկրաշարժը, և այդ մարդը մի պատկառելի գումար նվիրեց մեր եկեղեցուն՝ որպես գնահատական և երախտգիտություն հայ քահանայի բժշկող աղոթքի:

ՈՏՆԱԼՎԱՅԻ ՀՐԱՃՔԸ

1965 թվականն էր: Նոր էի քահանա ձեռնադրվել: Ավագ հինգշաբթի օրն էր և Ոտնալվայի արարողություն պիտի անել: Ես ուղեցի չորրորդ դասարանի տղաներին հրավիրել: Նրանց մեջ կար մեկը՝ շատ բարեպաշտ ընտանիքի երեխա: Զանգահարեցի մորը և հայտնեցի իմ ցանկությունը:

-Հնարավոր չէ, տեր հայր, - տիրությամբ պատասխանեց մայրը, - տղաս շատ ծանր մաշկային հիվանդություն ունի, որ տարափոխիկ է: Ոտքերի վրա վերքեր կան: Նրա այդ հիվանդությունը կարող է փոխանցվել ուրիշներին: Արդեն երկու տարի է, որ տղան տառապում է, շատ բժիշկների ենք դիմել, բայց չեն կարողացել բուժել:

-Ոչինչ,- ասացի, չեմ ուզում, որ տղան այդ պատճառով զրկվի այդ կարևոր իրադարձությանը մասնակից լինելուց: Թող

գա, ես նրա ոտքերն ամենավերջինը կլվանամ, որպեսզի մյուս-ներին չվնասեմ:

-Շնորհակալ եմ,- ասաց մայրը,- բայց որ տեսնեք՝ վերքերից չվախենաք:

Եկավ: Զգուշությամբ լվացի ոտքերը, որպեսզի վերքերին վնաս չպատճառեմ:

Մեկ շաբաթ անց մայրը հեռաձայնեց և ուրախությամբ հայտնեց, որ Ոտնալվայից հետո երեխայի վերքերը լավացել են: Տարել էին բժշկի, իսկ այնտեղ զարմացել էին, որ այդքան ծանր մաշկային հիվանդության հետքն անգամ չի մնացել:

-Ուրիշ ինչի՞ն կարելի է վերագրել այդ, եթե ոչ Ոտնալվայի ժամանակ տեղի ունեցած հրաշքին,- ասում էր մայրը:

Իսկ այդ բուժումը կարող էր տեղի ունենալ, քանի որ Ոտնալվայի ժամանակ յուղ է օրհնվում և արարողության ժամանակ աղոթքով խնդրում ենք բժշկություն այդ յուղով օծվածներին:

ԶՈՐԱՎՈՐ Է ՀԱՎԱՏՔՈՎ

ԱՐՎԱԾ ԱՂՈԹՔԸ

2004 թվականին էր: Հայաստանյաց Առաքելական Սուրբ եկեղեցու երիտասարդաց շարժման անդամ երիտասարդ մի կին եկավ մոտ:

-Տեր հայր,- ասաց,- մոտ մեկ ու կես տարի է, ինչ ամուսնացած եմ, սակայն երեխա չենք ունենում:

Շատ տխուր էր ու ջարդված մանկամարդ կինը, մի տեսակ հուսահատություն կար դեմքին: Արդեն երեսուն տարեկանին մոտ էր և վախենում էր, որ անգավակ կմնա:

-Անհոգ եղիր, աղջիկս,- ասացի նրան,- դու վստահիր Աստծուն:

ՄԵՆՔ «ՄԱՀՄՈՑԻ» ՄԵՂ ՄԻ Աղոթք ունենք, որ նախատեսված է դժվարածին կանանց համար։ Ճիշտ է, աղոթքը լրիվ չէր համընկնում կնոջը, քանի որ նա ոչ թե ծննդաբերել չէր կարողանում, այլ՝ հղիանալ, սակայն հավատքով այդ աղոթքն օգտագործեցի։

Աղոթք արեցի, կինը գնաց։ Անցավ երեք ամիս, տեսա իրեն։ Արդեն երկու ամսվա հղի էր։ Զգիտեմ՝ պատճառն այդ աղոթքն էր, թե՞ ուրիշ բան, սակայն կինը հավատում է, որ Աստված իրեն հղիություն է պարգևել այդ աղոթքի շնորհիվ։

ՏԱՅԱՏ ԱՎԱԳ ՋԱՐԱՍԱ ԴԱՎԹՅԱՆ
ԱՄՆ, Բոստոն

ՅԻՍՈՒՍԻ ԱՆՈՒՆԸ ՉՍՊԵՑ ԿԱՏԱՐԱԾ ԾՆԵՐԻՆ

Մի անգամ, կեսգիշերին մոտ երեցկնոջ հետ վերադառնում էինք մեր ծանոթներից մեկի տանից։ Այն վատ, մութ ու խավար տարիներին էր։ Փողոցներն ամայի ու մութ էին, և իրենց տանից մինչ մեր տուն՝ չորս-հինգ հարյուր մետր տարածություն։ Այն ժամանակ թափառող, անտեր շները լիքն էին։ Շրջում էին ոհմակներով, և քանի որ քաղցած էին, նաև կատաղած էին ու հաճախ մարդկանց վրա էին հարձակվում։

Ինչեէ։ Համարյա հասել էինք մեր շենքին, երբ անտեր շների կատաղած ոհմակը հաչելով հարձակվեց մեզ վրա։ Եվս մի երկու-երեք մետր և կհասնեին մեզ։ Ես հազիվ հասցրեցի ասել. «Հիսուս, ողորմեա»։ Միայն այդքանը։ Գիտեմ, գուցե մարդիկ չհավատան, սակայն լսեցի, թե ինչպես շան հաչոցը կիսատ մնաց։ Կարծես դանակով կտրեցին։ Շները քարացան, մեխվեցին տեղներում։ Մենք շրջադարձն անցանք և գնացինք տուն, իսկ շները թողեցին, հեռացան։

ԲԺՇԿՈՒԹՅԱՆ ԱՐՈԹՔ՝ ՇՈՒՐԵԱՌԻ ՏԱԿ

Համայնքի հավատացյալ կանանցից մեկն իր հետ կատարված հրաշալի բժշկության մասին պատմեց միայն երկու տարի անց: Ամեն Պատարագից հետո, նրանք, ովքեր բժշկության աղոթք են խնդրում, հավաքվում են շուրջառի տակ և ես նրանց վրա բժշկության աղոթք եմ կարդում:

Կինը պատմեց, որ ինքը շատ ծանր կանացի հիվանդություն է ունեցել: Երկար տարիներ բժիշկների է դիմել, տարբեր միջոցներ օգտագործել և՝ ոչ մի օգուտ: Սակայն ընդամենը մեկ անգամ բժշկության աղոթքին է մասնակցել և հրաշալի բժշկություն է ստացել:

ՄԿՐՏՈՒԹՅԱՆ ՄԱՔՐԱԳՈՐԾՈՂ ԵՎ ԱՊՐԵՑՆՈՂ ՉՈՐՈՒԹՅՈՒՆԸ

Աւանում իմ ծառայության առաջին տարիներին էր: Ինձ մոտ եկավ բավական բարձր պաշտոն ունեցող մի մարդ և ասաց, որ իր կինը շատ ծանր վիճակում է և կուզենար, որ նրա վրա բժշկության աղոթք կարդայի:

Իսկ կինդ մկրտվա՞ծ է,- հարցրեցի ես:

-Ոչ,- պատասխանեց նա:

Ես խորհուրդ տվեցի նախ մկրտել կնոջը, քանզի մկրտության խորհուրդը կնոջ համար նաև բժշկող ազդեցություն կունենար: Աստվածային շնորհ կիջներ, և հնարավոր է, որ կինը բժշկվեր:

Մարդը ունկ չկախեց իմ ասածին և գնաց: Երևի մտածեց, թե պատրաստություն պիտի տեսնի, հյուրեր հրավիրի, ծախս անի: Մի խոսքով, անցավ մի քանի օր և այդ մարդը կեսպիշերին եկավ մեր տուն:

-Տեր Հայր,- ասաց,- կնոջս այլես ոչինչ չի օգնում: Վիճակն օրհասական է: Ամեն պահ կարող է վերջինը լինել: Խնդրում եմ գնանք, մկրտիր:

-Ասացի՝ կնքահայր է անհրաժեշտ:

-Հարցերը կլուծեմ,- ասաց:

Գնացինք: Կեսդիշերն անց էր, երբ մկրտություն կատարեցի:

Այդ կինն առողջացավ: Այսինքն՝ Աստծո որդեգրության շնորհն ընդունելը և Քրիստոսին ժառանգակից դառնալը նրա համար ոչ միայն հոգեոր, այլ նաև Փիզիկական առումով էլ փրկարար եղավ:

ԹԵ ԻՍԶՊԵՍ ԲՈՒԺՎԵՑ ԿԱՐՃԱՏԵՍՈՒԹՅՈՒՆԸ

2006 թվականի հունիս ամսին էր «Առաքելություն Հայաստան» կազմակերպության աշխատակցուհիներից մեկը՝ Հոփիսիմե Կիրակոսյանը, զանգահարեց և խնդրեց, որ գնամ իրենց տուն և իր ու քրոջ համար բժշկության աղոթք կարդամ: Հիվանդ էին երկուսն էլ և աշխատանքի չէին գնում:

Գնացի, աղոթեցի, զրուցեցինք, ինչպես կարգն է մխիթարեցի, համբերություն մաղթեցի: Դրանից չէր անցել երկու օր, երբ զանգահարեց և զարմացած ու ուրախացած հայտնեց, թե իր հետ հրաշք է կատարվել: Բացի այն տկարությունը, որի համար ինձ կանչել էր, նաև աչքերի տեսողությունն էր լավացել:

-Տեր Հայր,- պատմում էր Հոփիսիմեն,- ես վերջերս վատ էի տեսնում, և երբ աշխատակիցները մանր տառերով գրած թղթեր էին բերում կարդալու կամ ստորագրելու համար, ջղայնանում էի, սակայն աղոթքից հետո կարդում եմ նույնիսկ ամենամանը տառերով գրածը: Ակնհայտ է, որ աչքերիս տեսողությունը շատ է լավացել:

Ճիշտ է, աղոթքը չէր արվել աչքերի համար, բայց Աստված դիտի, թե մեզնից ամեն մեկին ինչ է հարկավոր և երբ է հարկավոր:

ՄԻՆԱՍ ԶԱՐԱՆԱԿ ՄԱՐՏԻՐՈՍՅԱՆ

ՀԱՅ ԱՌԱՋԵԼԱԿԱՆ ԵԿԵՂԵՑՈՒ ՔԱՐԱՆԱՅԻ ԱՂՈԹՔԸ

Այս զարմանալի պատմությունը տեղի է ունեցել նախկին Հոկտեմբերյանի (այժմ՝ Արմավիր) շրջանի գյուղերից մեկում։ Ազգությամբ եղդի ընտանիքը, ամռան մի երեկո դաշտից տուն վերադառնալով, տեսնում է, որ տան պատերը, գույքը, կահույքը, հագուստները վառվում են։ Կրակը մարմանդ էր, կապույտ բոցով և երբեք հրդեհի չէր վերածվում։ Եթե սովորական կրակ լիներ, պարզ է, որ անմիջապես պիտի հրդեհի վերածվեր և կարճ ժամանակում լափեր ամեն ինչ, սակայն այդպես չէր։ Հասկանալի է, որ սա ոչ սովորական, զարմանալի, գուցեև՝ ոչ երկրային ինչ-որ նշան էր։ Տան տերերը դիմում են տարբեր մարդկանց՝ գուշակների, ոգեհմաների, նույնիսկ՝ իրենց համայնքի շեյխին։ Գալիս են նրանք, տարբեր հնարներ բանեցնում, բայց կրակը հանդցնել չեն կարողանում։ Կրակը սկսում է տարածվել և փչացնել հատկապես ծալքը։ Հայտնի է, որ եզդիների համար ծալքը՝ անկողնային պարագաների շքեղ զարդարված և հասուլ ձևով հավաքված, խնամքով պահպող հավաքածուն, սուրբ է։ Բայց այդ անհասկանալի ծագում ունեցող կրակը լափում էր ծալքը։

Համայնքի բնակիչներից մեկը եղդուն խորհուրդ է տալիս հայ քահանա հրավիրել։ Հրավիրում են Արմավիրի շրջանի Բամբակաշատ գյուղի քահանա տեր Գևորգին։ Քահանան գալիս է, ականատես լինում վերը նկարագրված հրաշքին։

-Տեր Հայր, մի ճար արա, էս կրակը չի հանգչում,- լալիս է եղդին:

-Կփորձեմ,- ասում է Տեր Գևորգն ու սկսում է նախ «Պահպանիչ» կարդալ, ապա տնօրհնեքի կարգ է կատարում:

Հենց հաջորդ օրն իսկ կրակը հանգչում, վերանում է, ասես չէր էլ եղել: Հրաշքն ակնհայտ էր: Եզդիները տեսնում են, որ Հիսուս Քրիստոսին հավատացողը պաշտպանված է Նրա կողմից, դարձի են գալիս, հաճախակի եկեղեցի են գալիս, աղոթում:

Հաջորդ տարի նույնպես նրանք Տեր Հորը հրավիրում են տնօրհնեքի, սակայն նրան խնդրում են պահպանել իրենց հյուրասիրության օրենքը. բոլորի նման խոնարհվել ծալքին, քանզի հյուրասիրությանը պետք է ներկա գտնվեր նաև իրենց համայնքի ղեկավարը՝ շեյլը:

Բնականաբար քահանան հրաժարվում է՝ ասելով.

-Եթե նույնիսկ նման հրաշքը դարձի չբերեց ձեզ, ապա ես այլևս այս տանն անելիք չունեմ:

Որպես հավելում ասենք, որ դեպքը տեղի է ունեցել մոտ 10-15 տարի առաջ: Բոլոր մանրամասներն այդ ժամանակ նկարահանվել են սիրողական տեսախցիկով: Տեսաերիզն այժմ պահպանվում է Տեր Վարդանի տանը: Հետագայում այս նյութի հիման վրա տեսափիլմ է պատրաստվել, որը ցուցադրվել է «Կենտրոն» հեռուստատեսությամբ:

ԴԱՐՈՒԹՅՈՒՆ՝ ԱՐՈԹՅԻ ԾՆՈՐՅԻՎ

Այս զարմանալի պատմությանն ականջալուր եմ եղել 6-7 տարի առաջ, երբ Գավառ քաղաքում, Քրիստոնեական դաստիարակության կենտրոնում աշխատում էի ուսուցիչների վերապատրաստման դասընթացներում:

Մի անգամ ուսուցչուհիներից մեկը մոտեցավ ու հայտնեց,
թե իր հետ մի հրաշալի իրողություն է կատարվել, բայց ում որ
պատմում է այդ մասին, քամահրանքով ու կասկածամտությամբ
է վերաբերվում: Ես խնդրեցի և նա պատմեց հետևյալը.

Մի քանի ամիս առաջ իրենց ընտանիքը թունավորվել էր
պահածոյից: Ամենածանրը մոր վիճակն էր: Զնայած բժիշկների
բոլոր ջանքերին՝ նրան փրկել չի հաջողվում, և բժիշկները
գրանցում են կնոջ մահը: Ինքը՝ ուսուցչուհին կուրացել էր, իսկ
մյուս քրոջ վիճակը մի քիչ ավելի թեթև էր: Մորը տեղափոխում
են դիահերձարան և այդ մասին հայտնում արդեն կուրացած
աղջկան: Աղջիկը խնդրում է, որ իրեն տանեն հերձարանի մոտ:
Երբ հերձող բժիշկն արդեն գնում էր իր գործը կատարելու, կու-
րացած աղջիկը ծունկի է գալիս դռան մոտ և ամբողջ սրտով
սկսում է աղոթել, որ Աստված չտանի իր մորը: «Տեր, թող ես
կույր մնամ, բայց մայրս թող չմահանա», - աղոթում էր նա:
Բժիշկները չէին կասկածում, որ կինը մահացել է, իսկ կուրացած
դուստրն իր հույսը չէր կորցրել և շարունակ աղոթում էր: Հան-
կարծ բժիշկների մոտ իրարանցում և աղմուկ է սկսվում: Աղջիկը
չէր տեսնում և չգիտեր, թե ինչ է կատարվում ու շարունակա-
բար աղոթում էր: Հենց այդ պահին նրան մի տեսիլք է երեսում:
«Մի լուսեղեն էակ,- ասում էր նա, -մոտեցավ ինձ, ձեռքը գրեց
գլխիս, օրհնեց և անմիջապես բացվեցին աչքերս ու տեսա, որ
արդեն դիահերձարան տարած մորս սայլակով ետ են բերում: Ով
հրաշք, անկենդան դիակը կենդանության նշաններ էր ցուցաբե-
րել և նրան մեռելների միջից ետ էին բերել: Ես վստահ եմ, - շա-
րունակում էր աղջիկը, - որ լուսեղեն էակը Հիսուսն էր: Բժիշկնե-
րը զարմացել և քարացել էին՝ այս ամենը տեսնելով, քանզի
բժշկական բոլոր կանոններն ասում էին, որ մայրս մահացած էր,
իսկ իմ կուրությունը կասկած չէր կարող հարուցել»:

Ինչ մեղքս թաքցնեմ, այս պատմությանը ես ևս թերահա-
վատությամբ մոտեցա: Աղջիկն ինձ խնդրեց գնալ իրենց տուն և

Հարցնել մորը: Գնացի: Մայրն արդեն 70-նն անց կին էր և հաստատեց իրենց թունավորվելը: Ասաց, որ ինքը հիշում է, որ վատաշել է, ուշագնաց է եղել և մեկ էլ այն է հիշում, որ իրեն օդնում էին, որ սայլակից իջնի:

Թե՛ մայրը, թե՛ աղջիկը հաստատեցին, որ այդ դեպքն այնքան ազդեցիկ է եղել, որ նույնիսկ դիահերձարանի բժիշկը դարձի է եկել և դարձել է հավատացյալ քրիստոնյա: Եվ դա պաթուլոգ-անատոմը, որի համար մարդու մարմին հերձելը սովորական բան էր, իսկ մարդը՝ միայն միս ու աղյուն, միայն ֆիզիկական մարմին ունեցող էակ:

ՏՐԴԱՏ ԶԱՐԱՍԱ ԲՈՉԻԿՅԱՆ

ԱՅՆ ՄԱՍԻՆ, ԹԵ ԻՆՉՊԵՍ ԱՍՏՎԱԾ ՄԻ ԿՆՈԶ ԿՅԱՆՔԸ ԵՐԿԱՐԱՑՐԵՑ ՏԱՍՆՉՈՐՍ ՏԱՐՈՎ

Մի կին մահամերձ պառկած էր անկողնում և հոգեվարքի մեջ էր: Հարազատաներն ու անչափահաս երկու երեխաները կողքին կանգնած՝ աղոթելով լալիս էին և խնդրում Աստծուց, որ փոքրիկներին որբ չթողնի: Այդ նույն պահին աղոթում էր նաև հոգեվարքի մեջ գտնվող կինը՝ խնդրելով իր առջեւ կանգնած և հոգին մարմնից բաժանելու եկած Գաբրիել Հրեշտակապետին՝ ասելով. «Խնդրում եմ ինձ մի քանի տարի կյանք տուր, որ երեխաներիս հասցնեմ իրենց նպատակին և հետո պատրաստ եմ հանձնվելու Տիրոջ կամքին»: Գաբրիելը, անսալով կնոջ թախանձանքին, տեսիլքի մեջ մի թղթի կտորի վրա գրում է «տասնչորս տարի» և դնում նրա ոտքի մեջ:

Անկողնու մոտ գտնվողները, իրենց անզոր զգալով, հույսով աղոթում էին՝ մտածելով, թե կինն արդեն մահացել է, որովհետեւ անշարժ պառկած էր: Բայց մահամերձը հանկարծ բացում է աչքերը, նայում իրեն շրջապատողներին և ուրախացած բա-

ցականչում. «Ես իրավունք ստացա ապրել ևս տասնչորս տարի»:

Այդպես էլ եղավ: Տասնչորս տարին լրանալուն պես, երբ նա արդեն մեծացրել էր իր երեխաներին և ամուսնացրել, այսինքն՝ հասցրել էր իրենց նպատակին, հենց նույն օրը, հոգեպես պատրաստ վիճակում՝ հանգիստ ավանդեց իր հոգին:

ՄԿՐՏՈՒԹՅԱՆ ԿԱՐԵՎՈՐՈՒԹՅՈՒՆԸ

Նորածին երեխան բավական թույլ էր և բժիշկները հույս չէին տալիս, որ նա կապրի: Երեխայի ծնողներին խորհուրդ տվեցին, որ եթե ապրելու հույս չկա և երեխան պիտի մահանա, ապա ավելի լավ կլինի, որ մկրտված հեռանա այս աշխարհից:

Ծնողները, անսալով խորհուրդին, քահանային հրավիրեցին տուն, քանի որ ձմեռ էր, ցուրտ և երեխային դուրս հանել չէր կարելի՝ Մկրտության արարողությունը կատարելու համար: Ասենք, որ քահանային ասվել էր, թե երեխան մահամերձ է, և իրոք այդպես էր, բայց քահանան, տուն մտնելով, հիացումով և ուրախությամբ արձանագրեց, որ այդտեղ մահամերձ երեխա չկա, քանի որ ինքը մթնոլորտի մեջ ոչ մի բացասական բան չի զգում:

Արարողությունն անցավ պատշաճ կերպով, և դրանից հետո երեխան սկսեց մեծանալ ու զարգանալ, ինչպես բոլոր նորմալ մարդիկ եւ ապրեց 75 տարի, որից հետո իր հոգին ավանդեց Տիրող ձեռքը:

ՄԿՐՏՈՒԹՅՈՒՆԸ ԲՈՒԺԵՑ ԶԱՂՑԿԵԴԸ

Տաս տարեկան երեխայի մոտ բժիշկները քաղցկեղ էին հայտնաբերել և նրան ապրելու համար կանխատեսել էին երկու տարի: Ծնողները տարբեր տեսակի բժիշկների դիմելուց հետո,

Հուսահատված դիմեցին բժիշկների Բժշկի՝ Աստծու օգնությանը՝ մտածելով, որ եթե մահանալու է, գոնե մկրտված վիճակում մահանա:

Մկրտության արարողությունից երկու ամիս անց ծնողները երեխային նորից տարան բժշկի մոտ՝ իմանալու համար նրա վիճակը: Հուրախություն ծնողների և առավել ևս երեխայի՝ բժշկներն արձանագրեցին, որ նրա մոտ քաղցկեղի ոչ մի նշան չկա:

Ծնողներն այդ ավետիսը առաջին հերթին հայտնեցին մկրտությունը կատարող քահանային՝ միաժամանակ գոհաբանական աղոթք ու մատաղ կատարելով երեխայի փրկության համար:

Այդ երեխան ապրում է մինչեւ հիմա և շուտով դպրոցը կավարտի:

ԱՅՆ ՄԱՍԻՆ, ԹԵ ԻՆՉՊԵՍ ՓՈՔՐԻԿ ԱՂՋԻԿԸ ՓՐԿՎԵՑ ՎՆԱՍՎԵԼՈՒՑ

Ամառային մի գեղեցիկ օր Հայաստանի հարավային մասում գտնվող Մեղրի քաղաքում մի ընտանիքի երեխաները ուրախ-զվարթ խաղում էին իրենց բակում, որը միաժամանակ հարևանի տանիքն էր: Մեղրիում, հայոց հնավանդ սովորությամբ, տներն այդպես իրար վրա են կառուցված, այնպես, որ մեկի տանիքը մյուսի համար բակի տեղ է ծառայում:

Այդպիսի մի բակ էր նաև «Սուրբ Աստվածածին» եկեղեցու հարևանությամբ գտնվող այդ տան բակը, որի վրա էլ այդ օրը փոքրիկ աղջիկը հեծանիվ էր քշում՝ ինչպես միշտ: Հանկարծ մի ճիչ լսվեց: Այդ ձայնի վրա բոլորը դուրս եկան և տեսան, որ աղջիկը եկեղեցու բակում ընկած է: Երբ մոտեցան նրան՝ օգնություն ցույց տալու, նա վեր կացավ և հանգիստ պատասխանեց. «Ինձ ոչինչ չի եղել. այդքան բարձրից այստեղ հասա, բայց չգի-

տեմ՝ ինչպես: Կարծես ոչ թե հեծանիվ նստած լինեի, այլ՝ ինք-նաթիռ, որը հանգիստ վայրէջք կատարեց»:

Բոլոր հավաքվածները փառք տվեցին Աստծուն, որ երեխան ողջ ու առողջ է և անվնաս է մնացել նման բարձրությունից ընկնելուց հետո:

ՅՈՒՍԻԿ ԹԱՐԱՎԱՆ ՆՈՒՐԻԶԱՎԱՆ
Մեղրիի տարածաշրջանի
հոգևոր հովիվ

ՄԻ ԱՆԳԱՄ, ԴԻՎԱՆԴԱՆՈՅՈՒՄ

2004 թվականին էր: Եկեղեցի եկավ մի մարդ և հայտնեց, թե իր բարեկամի երեխան Արյան փոխներարկման ինստիտուտում է գտնվում և վիճակը խիստ անհուսալի է: Բժիշկներն ամեն ինչ արել էին, սակայն օգուտը շատ քիչ էր եղել: Նրանք Գեղարքունիքի մարզի հեռավոր գյուղերից մեկում էին ապրում, ուր ո՛չ եկեղեցի կար, ո՛չ հոգեորական և ցանկանում էին երեխային մկրտել ու նոր տանել տուն:

-Եթե մահանալու է, թող մկրտված, քրիստոնյայի պես մահանա,- ասաց տղան:

Գնացինք հիվանդավոց: Ակսեցի մկրտության կարգը: Ասեմ, որ ես իմ կյանքում նման ծանր բան չեմ տեսել: Երեխան անընդհատ արյուն էր փախում, և ես հաճախակի ստիպված էի լինում ընդհատել մկրտությունը: Ինչեւ, մի կերպ ավարտեցի...:

Անցան տարիներ: Մի անգամ պսակի արարողությունից հետո մի երիտասարդ մոտեցավ ու Ժպտաց.

-Ինձ չե՞ք ճանաչում:

Ես փորփորեցի հիշողությունս, բայց չկարողացա հիշել, թե որտեղ եմ տեսել նրան:

-Ոչ,- ասացի,- չեմ կարողանում հիշել:

-Հիշո՞ւմ եք՝ ինչպես գնացինք Արյան փոխներարկման ինստիտուտ ...

-Այո,- վերջապես հիշեցի ես,- իսկ այն տղան ի՞նչ եղավ, մահացա՞վ:

-Ոչ, ինչ եք ասում,- ժպտաց նա,- մկրտությունն իր բարերար ազդեցությունն ունեցավ նրա վրա: Այս, տեսնու՞մ եք այն սյունի տակ կանգնած երիտասարդին: Նա է: Հիմա էլ եկել ենք մեր բարեկամի պսակադրությանը:

Ես շատ ուրախացա և փառք տվեցի Աստծուն նման հրաշալի բժշկության համար:

ԵՍԼՅԻ ԶԱՐԱՆԱԿ ԱՐԹԵՆՅԱՆ
Երևանի Սուլք Երրորդություն
եկեղեցու քահանա

ՍՐԲԱՊԱՏԿԵՐԻ ՉՈՐՈՒԹՅՈՒՆԸ

Հորեղբորս ընտանիքը երեանից տեղափոխվեց Էջմիածին: Որոշ ժամանակ անց նրանք որոշեցին վերանորոգել իրենց բնակարանը, իսկ վերանորոգումից հետո պատից հանեցին երկու հին սրբապատկերները: Կարծես թե դրանք չէին սագում նոր վերանորոգված պատին: Բացի այդ, պատը կարող էր փշանալ սրբապատկերները կպցնելու ժամանակ: Ինչևէ, հանեցին սրբապատկերները և... որոշ ժամանակ անց սկսեցին ձախորդություններ գալ այդ ընտանիքի գլխին: Նախ ֆուտբոլ խաղալիս տղայի թևը կոտրվեց, հետո աշխատանքի ժամանակ հորեղբորս ձեռքի մատը վիրավորվեց: Բժիշկները մի կերպ փրկեցին մատը կտրվելուց: «Ու՞մ հետ փորձանք չի պատահում: Ո՞վ է, որ երաշխավորված է նման պատահականություններից», - կհարցնեն շատերը, սակայն այս դեպքը ևս սովորականների թվին կարելի էր

դասել, եթե հորեղորս կինը գիշերը տեսիլք-երազ չտեսներ: Ե-րազի մեջ նրան հայտնվում է Աստծո Հրեշտակը և ասում:

-Զեր ընտանիքի գլխին եկող փորձանքները կանցնեն, եթե նորից իրենց տեղում փակցնեք հին սրբապատկերները:

Նրանք նորից պատին փակցրեցին Հիսուսի և Աստվածածնի պատկերները, և դադարեցին նրանց ընտանիքին պատուհասող փորձությունները:

ԱՆԴԱՍՏԱՆԻ ԱՐԱՐՈՂՈՒԹՅՈՒՆԸ

Մայր աթոռի միաբան Տեր Կորյուն աբեղա Առաքելյանը ի-րենց տուն՝ Վարդենիս էր հրավիրել իր միաբան ընկերներին՝ Հայր Վարդան, Հայր Հովհաննես և Հայր Տաճատ աբեղաներին: Մի օր Հայր Կորյունը ընկերներին առաջարկում է գնալ դաշտե-րը, զբոսնել, նաև տեսնել իր ծնողների ցորենի դաշտերը: Երբ հասնում են դաշտ, տեսնում են ցորենի ծփացող արտերը, աբե-ղաներից մեկն առաջարկում է Հայր Կորյուննենց ցորենի դաշտի վրա Անդաստանի արարողություն կատարել:

Անցնում են ամիսներ և Վարդենիսում ահավոր կարկուտ է գալիս, որը հարվածում է ցորենի դաշտերին: Այնքան սարսափե-լի էր կարկուտը, որ Հայր Կորյունի ծնողները դրանից հետո նույնիսկ հարկ չեն համարում գնալ, տեսնել, թե ցորենի ար-տերն ինչ վիճակում են՝ մտածելով, որ նման արհավիրքից հետո դժվար թե կծած հասկերի վրա ցորեն մնացած լինի: Բայց, այ-նուամենայնիվ, գնում են: Ինչքան էլ չլինի իրենց դաշտն է, քրտինք ու աշխատանք են թափել վրան: Գնում են դաշտ և... այ քեզ զարմանք, շրջակա բոլոր արտերի համապատկերի վրա տեսնում են իրենց արտը, որին կարկուտը ոչ մի վնաս չէր տվել և ամեն տարվա հետ համեմատած՝ այդ տարվա բերքը նույնիսկ շատ էր: Շրջապատի բոլոր արտերը հավասարվել էին գետնին, իսկ իրենցը... Ավելի ուշ, երբ դարձյալ տուն է գալիս և լսում

տանեցիների զարմանալի պատմությունն իրենց փրկված և հարևանների վերացած ցորենի դաշտերի մասին, Հայր սուրբը պատմում է իրենց կատարած Անդաստանի արարողության մասին:

ՀԱԿՈԲ ՍԱՐԿԱՎԱԳ ՄՈՎՍԻՍՅԱՆ
ք. Էջմիածին

ԳՏՆՎԱԾ ԽԱԶՔԱՐԸ

Վերջերս կյանքից հեռացավ Գեղարքունիքի մարզի Լճափ գյուղի բնակչուհի բուժքույր Սոֆիան: Անցած դարի 60-ական թվականներին էր: Նոր էր ամուսնացել, հետո ամուսնու հետ բաժանվել էին ծնողներից և մինչև տնտեսություն դառնալը, տուն կառուցելը ապրում էին գոմի մեջ: Գոմը հին էր, ով գիտե՝ երբ էր կառուցվել և ում կողմից... Հենց առաջին գիշերը երազ տեսավ: Եկավ մի ծերունի ու ասաց:

-Տեղս նեղ է, ազատիր ինձ այստեղից:

Քի՞չ երազ կարող է տեսնել մարդը գիշերը: Երազ էր, եկավ, անցավ: Սակայն հաջորդ գիշեր երազը կրկնվեց: Առավոտյան պատմեց ամուսնուն:

-Քեզ համար քնում ես, ուրիշի մասին երազ ես տեսնում,- ձեռ առափ ամուսինը:-ի՞նչ ծերունի, ի՞նչ տեղ: Իբր մենք տուն ու տեղ ունենք, դու էլ...

Բայց հաջորդ գիշեր ծերունին նորից եկավ, ցույց տվեց, թե ինքը որտեղ է և խնդրեց ու պահանջեց ազատել իրեն:

Ճարահատյալ գնաց սկեսրայրի մոտ, պատմեց նրան իր կրկնվող երազի մասին: Երկուսով եկան, քանդեցին ծերունու մատնանշած տեղն ու... խաչքար դուրս եկավ: Այն դրել էին գոմի պատի մեջ ու շարել:

Խաչքարը մաքրեցին, հանեցին, դրեցին դրսի պատի տակ: Բայց այդ գիշեր ծերունին նորից եկավ ու դժբոհեց:

-Ախր ինձ ավելի վատ տեղ բերեցիք: Տարեք հին տեղը, բայց լուսամուտ բացեք, որ լույս տեսնեմ:

Խաչքարը տեղափոխեցին հին տեղը, մատուռ կառուցեցին: Եվ այդ ժամանակից ի վեր ծերունին դադարեցրեց իր գիշերային այցելությունները:

ՄԿՐՏՈՒԹՅՈՒՆԸ ՓՐԿԵՑ ՍԱՆԿԱՆԸ

Կոստանը տկար ու թույլ էր ծնվել: Սակայն գնալով նրա վիճակը վատանում էր: Երբ լրացավ քառասունքը, մանուկը կապտեց և սևացավ: Զգալով, որ երեխան կարող է շուտով այն աշխարհ գնալ, բարեպաշտ հայրը որոշեց մկրտել տալ նրան: «Գոնե որպես քրիստոնյա մահանա և դրանով փրկվի», - մտածեց նա: Սուրբ Էջմիածնից քահանա հրավիրեց՝ որոշելով երեխային հանձնել Տիրոջ հոգածու ձեռքը:

Քահանան մկրտեց երեխային և, ով հրաշք, կարճ ժամանակ անց անցավ նրա մարմնի կապտությունը, երեխան նորից կյանքի վերադարձավ: Սակայն նախախնամության կամքով թույլ ու հիվանդու ծնվեց նաև Կոստանի երեխաներից մեկը: Թեև տղան արդեն չորս տարեկան էր, բայց ո՛չ խոսել էր կարողանում, ո՛չ - քայլել:

-Քո հայրը ժամանակին մկրտել տալով քեզ փրկեց, ինչու[՞] դու էլ նույնը չես անում: Ինչու[՞] ես մկրտությունը հետաձգում, - նրան հանդիմանեց վանահայրը:

Սակայն Կոստանը պատճառաբանում էր, թե կնունք անելու միջոց ու հնարավորություն չունի, չի կարողանա այդքան մարդ հրավիրել...

-Աստծո համար քո բացած սեղանը ոչ մի նշանակություն չունի, բեր երեխային մկրտենք, զորություն կիջնի վրան, կառողջանա,- իրենն էր պնդում վանահայրը:

Վերջապես հայրը երեխային բերեց մկրտելու: Մկրտելու հենց հաջորդ առավոտյան նախ երեխայի լեզուն բացվեց, հետո ամրացան ոտքերը և նա սկսեց քայլել ու վազել:

ՀԱԾՍԱՆԴԱՄ ՏՂԱՅԻ ԲԺՇԿՈՒԹՅՈՒՆԸ

Մեծ երկրաշարժից հետո էր: Վազգեն Վեհափառն Արցախի թեմի առաջնորդ Պարգև Սրբազնի հետ զրուցում էր վեհարանում, երբ լուր տվեցին, թե՝ Լենինականից (այժմ՝ Գյումրի) մի երեխա են բերել, որի ոտքերը երկրաշարժից հետո թուլացել են: «Զեր աղոթքն են խնդրում»,՝ ասացին:

-Թող ներս բերեն,- ասաց Վեհափառը:

Ծնողները, երեխայի երկու թևերից բռնած, ներս բերեցին: Երեխայի ոտքերը թույլ էին և ասես քարշ էին գալիս հատակին:

Վեհափառն աղոթեց հիվանդի համար, հույս տվեց ծնողներին և ճանապարհեց:

Մեկ շաբաթ անց լուր ստացվեց Գյումրիից, թե երեխայի ոտքերն ամրացել են և նա արդեն քայլում է:

-Փառք քեզ Աստված,- հայացքը երկինք հառելով՝ շշնջաց Վեհափառը,- փառք քեզ, որ լսեցիր տկարիս աղոթքն ու բժշկեցիր երկրաշարժի հասցրած մի վերքը ևս:

ՀԱՅԿ ՉՈՐՎԱԲՅԱՆ

ք. Էջմիածին

ՍԵԴԱ ՏԱՏԻ ԽԱԶԸ

Տատոս գրեթե ուժուուն տարեկան էր: Թե ասեմ՝ ջերմ հավատք ուներ առ Աստված, ճիշտ չի լինի: Նույնիսկ չգիտեր՝ իրեն մանուկ հասակում մկրտե՞լ են, թե՞ ոչ: Սակայն չեմ կարող չպատմել այն արտառոց գեպքը, որ կատարվեց նրա հետ: Ամեն անդամ քնելիս Սեղա տատոս սարսափահար վեր էր թռչում՝ իր տեսած երազից կամ տեսիլքից սահմոկած: Մշտապես նրան այցելում էր մի մղձավա՞նջ ասեմ, թե՞ երազ: Իբրև թե ինչ-որ մարդիկ ինչ-որ երեխայի են գլխատում և նրա կառափը նետում են մոխրների մեջ: Ամեն անդամ նույնը կրկնվում էր և սարսափի էր մատնում խեղճ կնոջը: Տեսնելով, որ նա շատ է տանջվում ու տառապում, ես, որ գեռևս դպրոցական էի, սովորական փայտից մի խաչ սարքեցի, այն տարա «Սուրբ Հակոբ» եկեղեցի և խնդրեցի, որ Տեր Գաբրիել քահանան օրհնի: Հետո խաչը բերեցի և փակցրեցի տատիկիս մահմակալի գլխավերելում: Դրանից հետո տեսիլքները դադարեցին: Մի անդամ, երբ նա քնած էր, փորձի համար վերցրի խաչը և հեռացրի: Եվ, այ քեզ զարմանք, նա սկսեց անհանգիստ շուռումուռ գալ, խոսել երազում, հետո սարսափահար վեր թռավ քնից: Դարձյալ նույն մղձավանջն էր տեսել: Իմանալով, որ հեռացրել եմ խաչը, խնդրեց, որ այն փակցնեմ իր տեղում: Այդ օրվանից ի վեր ոչ ոք չէր համարձակվում ձեռք տալ Սեղա տատի խաչին, քանզի այն պահպանում էր նրա խաղաղ ու հանգիստ քունը:

ՄԵՄՐՈԴ ԱՇՈՒՐՅԱՆ

ԴԱՎԱՏՈՎ ԱՂՈԹՔԸ ԲՈՒԺՈՒՄ Է, ԱՆԴԱՎԱՏՈՒԹՅՈՒՆԸ՝ ՍՊԱՆՈՒՄ

Այս պատմությունը ես լսել եմ մեծերից: Անցած դարի 70-ական թվականներին է եղել գեպքը: Լեռնային Ղարաբաղի Այ-

գեստան գյուղում, խաղողաքաղի ժամանակ ուսուցչուհի էլմիրայի ոտքի վրայի խալը վնասվում է: Արյունահոսությունը դադարեցնելու համար վերքի վրա խաղողի տերեւ են դնում՝ առանց մտածելու, որ տերեւ սրսկած է: Տերեւից թույնը ներծծվում է արյան մեջ և սկսվում է արյան վարակում: Հիվանդությունն այնքան է սրբում, որ ուսուցչուհուն չեն կարողանում բուժել Ղարաբաղում և տեղափոխում են այն ժամանակվա ԽՍՀՄ մայրաքաղաք՝ Մոսկվա: Նրա աղջնակը, որ շատ փոքր էր, մնում է գյուղում: Աղջիկը ոչ մի անգամ չէր տեսել, թե մարդիկ ինչպես են աղոթում, չգիտեր աղոթքի զորության մասին, սակայն մանկական միամիտ սրտով ամեն օր խոսում էր Տիրոջ հետ և նրան խնդրում, որ առողջացնի մորը: Թեև կնոջ վիճակն անհուսալի էր, սակայն նույնիսկ բժիշկները զարմացան, երբ նա առողջացավ:

Երբ մայրը վերադարձավ, աղջնակը գրկեց նրան և ականջին շշնջաց.

-Մայրիկ, գիտե՞ս, ես ամեն օր աղոթում էի Աստծուն, որ նա քեզ բուժեր ու դու առաողջացար:

Ուսուցչուհին, որ անհավատ էր, կամ ինչպես կոմունիստական հասարակարգում էին ասում՝ աթեիստ, զայրացավ դստեր վրա.

-Աստված չկա: Ինձ ոչ թե Աստված է բուժել, այլ՝ բժիշկը:

Դրանից մի քանի օր չանցած՝ նրա վիճակը կրկին վատաշավ, և չնայած բժիշկների բոլոր ջանքերին, լիովին բուժված թվացող հիվանդությունը կրկին գլուխ բարձրացրեց: Եվ դա արդեն անդառնալի էր նրա համար:

Այդպես է. հավատքով արած աղոթքը կարող է բուժել և կենդանություն տալ մարդուն, իսկ անհավատությունը՝ սպանել:

ԴԱՎԻԹ ՊԵՏՐՈՍՅԱՆ
ՀՀ, գլուղ Այգեստան

ՀՐԱԾՔ ԶԵՐ, Ի՞ՆՉ ԵՐ

2003 թվականի գեկտեմբերի 30-նն էր: Մարդկանցով և բեռներով ծանրաբեռնված միկրոավտոբուսը մեր գյուղից՝ Արարատի մարզի Դարակերտից ուղերվում էր Երևան: Մարդիկ գնում էին շուկա, նոր տարվա առևտութիւն: Եվ ահա հանկարծ ճանապարհի կեսին նկատեցինք, որ մեքենան ցնցվեց, և նրա առջևի աջ անիվը տեղից դուրս թռավ ու սլացավ մեքենայից առաջ ընկած: Նույն վայրկյանին բոլորս քարացանք: Վայրկյան-ներ կան, որ շատ երկար են ձգվում: Զգիտեմ վարորդն ինչ արեց, բայց զգացվում էր, որ նա իրեն կորցրել է:

-Տե՛ր Հիսուս Քրիստոս,- հուսահատ ճչաց մի կին, և այդ պահին մեքենան կանգ առավ: Թե չկանգներ, մարդկային գոհերն անխուսափելի էին:

Անշուշտ, կինեն մարդիկ, որ կասեն՝ պատահականություն է, կկապեն ֆիզիկայի այս ու այն օրենքի հետ, սակայն այդ պահին մեքենայի մեջ գտնվող բոլոր մարդիկ հավատում էին, որ Քրիստոսի անունը փրկեց իրենց: Հրաշք չէր, ի՞նչ էր:

ԽԱԶԻԿ ՀՈՎՅԱՆՆԻՍՅԱՆ
Արարատի մարզ, գյուղ Դարակերտ

ԱՆԾՈՒԽ ՀՐԴԵՐ

Մի օր բանակիս ընկերը՝ Միհրանը, որ նախկին Հոկտեմբերյանի շրջանից էր, այսպիսի զարմանալի դեպք պատմեց:

-Պապիս բակում մի մատուռ կար,- ասաց,- իսկ մատուռի կողքին՝ մի եղենի: Մի օր պապս որոշեց կտրել եղենին, որ իր կարծիքով խանգարում էր մատուռին:

Հենց այդ գիշեր սուրբը երազ է գալիս տատին և նրան պատվիրում է պապին ասել, որ ծառը չկտրի: Պապը բանի տեղ չի դնում: «Ով գիտե, պառավն ակսոսում է ծառը, դրա համար

չի ուզում, որ կտրեմ, մեղքը սրբի վրա է գցում», -մտածում է և հաջորդ օրը կտրում է եղանին:

Եվ հենց հաջորդ օրը սկսում են վառվել տան իրերը: Նախ՝ գորգերը: Ճիշտ է, վառվում էին, բայց ծուխ չէր բարձրանում և հրդեհ չէր բռնկում: Դա մի կերպ հանգցնում են, հետո սկսում են այրվել բազմոցի ծածկոցն ու բարձերը: Միայն պատկերացնել կարելի է մարդկանց սարսափը: Բազում օրեր է տեսում հրդեհը: Մարդիկ հանգցնում են, իսկ նա վերսկսվում է այս ու այն տեղում: Մեկ բարձերն են վառվում, մեկ՝ գորգերը, մեկ՝ ծածկոցները, մեկ՝ անկողինը...

Վախեցած պապն սկսում է վերակառուցել մատուռը, կարգի բերել նրա շրջակայքը, նոր ծառ է տնկում, և միայն դրանից հետո է դադարում անծուխ, կապտավուն կրակը:

ԻՆՉՊԵՍ ԲԺՇԿՎԵՑ ՈՏՔԸ

Այս գեղքն ինձ նողա տատու է պատմել: Երբ նա 13 կամ 14 տարեկան աղջիկ է լինում, նրա ոտքը հիվանդանում է: Ոտքը քաշվում էր, և քայլել չէր կարողանում: Եվ դա կարծես թե քիչ էր, անտանելի ցավեր էր ունենում: Այնքան ծանր է լինում վիճակը, որ ոչ մի բժիշկ չի կարողանում բացատրել, թե այդ ցավի պատճառն ինչն է: Նման նոպաներից մեկի ժամանակ մայրը դիմում է Տիրոջը՝ խնդրելով.

-Թող աղջիկս լավանա, ես դռնեղուու ընկած փող կհավաքեմ, մատաղ կանեմ:

Առավոտյան վեր են կենում և, ա'յ քեզ հրաշք, աղջկա ոտքն այլևս չի ցավում: Մայրն ամաչում է դռնեղուու ընկնել, փող հավաքել, մանականդ, որ ժամանակները վատ էին: Կոմունիստական դաժան հալածանքների շրջանն էր, ուր ամեն մի կրոնասիրության փորձի համար դաժանորեն կարող էին պատ-

ԺԵԼ: Սակայն երեկոյան ոտքի ցավն ավելի է ուժեղանում, ոտքի ջիլը ձգվում է սարսափելի կերպով...

Գիշերը սարսափահար ու վշտահար եղած մորը երազ է գալիս: Գալիս է մեկը և հանդիմանում է նրան.

-Ինչու՞ ես խոստանում ու չես կատարում:

Առավոտյան իր այդ երազը պատմում է ամուսնուն:

-Եթե խոստացել ես և գիտես, որ կօգնի երեխային, ուրեմն՝ արա,- ասում է նա:

Կինը դոնեղուռ է ընկնում, դրամ է հավաքում, մի աքաղաղ են գնում և երեխային շալակած էջմիածնից ճանապարհ են ընկնում դեպի Օշական՝ Սուրբ Մեսրոպ Մաշտոց եկեղեցի:

-Հասանք եկեղեցի,- պատմում է տատս,- բայց եկեղեցու դռները փակ էին, քահանա չկար: Կար մի բաց պատուհան, որից մայրս իր հավաքած փողի ավելցուկը ներս գցեց: Ահա այդ ժամանակ ձիերով եկան Օշականի կոմունիստ ղեկավարները և մեղնից պահանջեցին անմիջապես թողնել ու հեռանալ: Մի խոսքով, հնարավոր չեղափ աքաղաղը մորթել: Մայրս ճարահատված նայեց ու տեսավ, որ եկեղեցու կողքին մի ծեր կին է նստած: Աքաղաղը տվեց նրան ու մենք արագ հեռացանք:

Օշականից հետո մինչև հիմա ոտքս չի ցավում, և մինչև հիմա իմ սեփական ոտքերով եմ քայլում,- ամեն անգամ ասում էր տատս:

ՎՐԵԺ ՍԱՐԳՍՅԱՆ
Ք. Էջմիածին

ՅՐԱՅՐ ԲԱՇԵՒ ՈՒԽՏԸ

Երբ առաջին անգամ Հայաստան եկա, գնացի Արցախ, այնտեղ բազմաթիվ եկեղեցիներ լուսանկարեցի, բայց երբ վերադարձա կանադա, առողջությունս վատացավ: Բժշկական հետա-

զոտությունը ցույց տվեց, որ զույգ թռքերս հիվանդ են քաղցկեղով: Ինձ ապրելու համար տվեցին տաս օր: Հասկանալի է, թե ինչ կմտածի մարդը, որին ապրելու համար մնացել է ընդամենը այդքան ժամանակ: Հազար ու մի բան է անցնում մտքովդ, նորից արժեվորում ես կյանքդ:

Եվ ահա այդ օրերին ինձ քիմիական բուժում նշանակեցին: Ապրիլի 23-ին՝ իմ ծննդյան օրը, «քիմիա» ընդունեցի: Հասկանում էի, որ ես փրկություն չունեմ և հույսս միայն Աստված էր: Հենց այդ ժամանակ էլ պալատիս պատին գամած խաչի առաջ ուժուարեցի. «Եթե ես այս նեղ տեղից դուրս գամ, ուխտ եմ անում լուսանկարել աշխարհի բոլոր երկրներում տարածված հայկական եկեղեցիները»: Եվ Աստված լսեց ինձ:

Դժվար բուժում տարա, շատ ցավեր քաշեցի, բայց ի զարմանս բժիշկների, բուժվեցի: Արդեն քանի տարի է, որ բժիշկների տված «10 օրը» շարունակվում է: Ես եղել եմ աշխարհի 43 երկրներում, Արցախում, Արևմտյան Հայաստանում, լուսանկարել եմ հայկական բազմաթիվ եկեղեցիներ, հրատարակել լուսանկարների ալբոմներ: Հույս ունեմ, որ Խաչի ու Խաչյալի գորությամբ կկարողանամ լուսանկարել մնացած եկեղեցիները նույնպես:

ՀՐԱՅՐ ԲԱՇԵ (ԽԱՎԱՏՏՐԱՎԱՆ)

Կանադա, Մոնրեալ
Հայաստանի Համբային հեռուստատեսության
2005թ. ապրիլի 19-ի առավոտյան հաղորդումից

ՀԻՍՈՒՄԻ

ԱՐՈԹՔԻ ՉՈՐՈՒԹՅՈՒՆԸ

-Իմ կյանքում առաջին անգամ այդ ձմռանը ես տեսա մարդու սարսափը և հրճվանքը նրա: Ես շատ էի տեսել, թե ինչպես են վախենում մարդիկ, վախեցել էի նաև ինքս, բայց այդպիսի սարսափ, որ գրված լինի մարդու աչքերի մեջ և բռնած լինի նրա

ողջ էռթյունը, ես չէի տեսել: - Իր պատմությունն այսպես սկսեց Հայոց բանակի ավագը: - Ծառայում էինք Հայաստանի հյուսիս-արևելյան սահմանում: Մեր դիրքերը գտնվում էին թշնամուց մոտ 300 մետր հեռավորության վրա: Բլրի ստորոտին հողատնակն էր, իսկ մի քիչ վերև՝ խրամատը, որտեղ երկու ժամը մեկ հերթափոխի էին կանգնում զինվորները: Բայց պատմությունս թշնամու մասին չէ, այլ ուրիշ բանի:

Տղան էջմիածնի շրջանից էր, վեց ամսվա ծառայող: Վերջացրել էր հերթափոխը խրամատում, մեկ ժամ էլ ժամապահ պիտի կանգներ հողատնակի մոտ, հետո գար հանգստանալու: Կանգնած էր հողատնակի մոտ, մենք ներսում նստած զրուցում էինք, մեկ էլ լսեցինք, որ նա դրսում ինչ-որ մեկի հետ խոսում է.

-Գնա, - ասում է, - թե չէ կլրակեմ...

«Ո՞վ պիտի լինի», - անհանգստացա ես, և քանի որ դիրքի պատասխանատուն էի, անմիջապես ելա հողատնակից:

Ոչ ոք չկար, բայց զինվորը խոսում ու առաջ էր գնում, մեկ սպառնում էր, զենքն ինչ-որ մեկի վրա պահում, մեկ ինքն էր նահանջում... Հաստատ ինչ-որ բան կատարվում էր հետը և հաստատ ինչ-որ անտեսանելի բանի կամ անտեսանելի մեկի հետ կովում էր: Մոտեցա նրան, բռնեցի թեկից, իսկ նա ասես այս աշխարհում չէր, շարունակում էր սարսափած նայել ինչ-որ մեկի ուղղությամբ: Թափահարեցի նրան .

-Ի՞նչ է պատահել, արթնացիր, ի՞նչ եղավ քեզ:

-Հը՞-, - վերջապես սթափվեց նա, - տե՛ս, էլի եկել է:

-Ո՞վ:

-Մի ծերունի կա՝ սև շորերով, կնճուտ ճակատով, հաճախ գալիս է իմ հետեւից: Հիմա էլ կանգնած է, չե՞ս տեսնում:

Ես նայեցի շուրջս և ոչ մի ծերունու չտեսա:

-Ու՞ր է:

-Ահա՛, - մատն առաջ մեկնեց նա, - չե՞ս տեսնում:

-Լավ, ի՞նչ է ուզում, - հասկանալով, որ ինչ-որ անտեսանելի բանից վախեցել է՝ հարցաքննեցի ես:

-Ասում է՝ ինչ ես կանգնել էստեղ, արի տանեմ աշխարհի ամենալավ տեղերը ման տամ: Տանեմ քեզ ծնողներիդ մոտ: Զե՞ս ուզում:

-Զե՞մ գալիս, - ասում եմ, - վախենում եմ, - իսկ նա առաջ է գալիս, ուզում է բռնել: Մի քիչ առաջ նույնիսկ ինքնաձիգը վրան պահեցի, ասացի՝ կկրակեմ, գնա, իսկ նա միայն հռհռաց վրաս: Ա՛յ, տե՛ս, կանգնած մեզ է նայում, - դարձյալ մատը առաջ մեկնեց նա, - չե՞ս տեսնում:

Զինվորի աչքերի մեջ սարսափ կար, անտանելի սարսափ: Նրան նայողը չէր կարող կասկածել, որ աչքին ինչ-որ բան է երևում, և այդ «ինչ-որը» մաղու տեսք ունի: Տղան սարսափելի վախենում էր, նույնիսկ՝ իրեն կորցնելու աստիճանի:

-Դու մկրտվա՞ծ ես, - հարցրեցի նրան:

-Հա՛, - գլխով արեց նա:

-Տերունական աղոթքը գիտե՞ս:

-Ըզը:

-Այդ մարդը մենակ ժամապահ եղած ժամանա՞կդ է գալիս, թե...

-Այս էլ որքան ժամանակ է, հաճախ հայտնվում է: Ուրիշ ժամանակ էլ...

-Դե որ կգա, սկսիր աղոթել: «Հայր մերն» ասա, կամ Հիսուսի անունը տուր, խաչակնքիր և կամ Հիսուսական աղոթքն ասա:

-Էդ ո՞րն է:

-Տեր Հիսուս Քրիստոս, Որդի Բարձրյալ Աստծո, ողորմա ինձ՝ բազմամեղիս:

-Լավ, - գլխով արեց զինվորը:

Անցավ մի որոշ ժամանակ: Հաջորդ անգամ դարձյալ լսվեց նրա ձայնը, կովում էր ինչ-որ մեկի հետ, զայրացած սպառնում: Ակնհայտորեն կորցրել էր իրեն: Դարձյալ դուրս նայեցի հողատնակից:

-Հը[՝], - Հարցրեցի:

-Էլի եկել էր:

-Մոռացե[՝] ևս ասած: Աղոթիր, հենց որ աչքիդ կերևա:

Չանցած մի որոշ ժամանակ, լսեցինք, որ բարձր ձայնով աղոթում էր. «Հայր մեր, որ յերկինս ես...», հետո՝ «Տեր Հիսուս Քրիստոս, Որդի Բարձրյալ Աստծո...»: Ահագին ժամանակ աղոթում էր:

Ես սաստեցի հողատնակում նստած տղաներին.

-Ձայն չհանեք, թող աղոթի, թող ինքը հաղթահարի իր վախը: Վրան չծիծաղեք:

Երբ հերթափոխ եղավ, և նա եկավ հողատնակ, աչքերը փայլում էին:

-Հը[՝], - Ժպտացի ես:

-Բա չե՞ս ասի, ավագ ջան, - Ժպտաց պայծառ, - Հենց էդ ծերունին եկավ ու սկսեց ինձ համոզել, որ իր հետ գնամ, սկսեցի աղոթել: Երբ սկսեցի աղոթել, նա սկսեց հետ-հետ գնալ, հետո, երբ «Հիսուսական» աղոթքն սկսեցի, մի տեսակ վախեցած կուչ եկավ: Երկու ձեռքով բռնեց գլուխը ու սկսեց խնդրել.

-Մի բոպե լոիր: Դրա անունը մի տուր: (Քրիստոսին ի նկատի ուներ):

Իսկ ես հո գիծ չէի[՝], որ դադարեցնեի: Ավելի բարձր էի ասում ու գնում էի դեպի նա: Թե առաջ ես էի փախչում, հիմա ինքն սկսեց փախչել, բայց անընդհատ ասում էր, որ դադարեցնեմ, լսեմ իրեն, որ այդ աղոթքն էլ, Հիսուսն էլ ինձ փրկել չեն կարողանա: Բայց ես աղոթում էի, և նա վախեցած կուչ էր գալիս ու հեռանում էր ինձանից: Հա՛, քո դեմ էլ էր խոսում: «Էդ

տղան ո՞վ է, - ասում էր, - որ քեզ սովորեցնում է: Դու նրան մի՛ լսիր»: Բայց այնքան աղոթեցի, մինչև գնաց, կորավ:

Ես գիտեի աղոթքի, Քրիստոսի զորավոր ուժի մասին, բայց այս դեպքն ինձ ավելի համոզեց դրանում:

Դիրքերից իջանք: Զորամասում դարձյալ հանդիպեցի զինվորին:

-Հը՞, Էլի գալի՞ս է, - հարցրեցի նրան:

-Հա, մեկ-մեկ գալիս է, բայց երբ Հիսուսի անունը տալիս եմ կամ հենց «Հիսուսական» աղոթքն ասում եմ, չքանում է: Բայց չի դադարում սպառնալուց, թե ինքն Էլի կգա, որ ես իրենից պրծում չունեմ: Բայց հիմա արդեն չեմ վախենում նրանից, - ժառաց զինվորը:

-Երբ արձակուրդ գնաս, մտիր եկեղեցի, պատմիր քահանային և թող նա գլխիդ համապատասխան աղոթքը կարդա, - նրան խորհուրդ տվեցի ես, - ասաց ավագը, հետո հարցական նայեց ինձ, - ճի՞շտ եմ վարվել:

-Այո՛, - ասացի ես:

ԱՍՏՎԱԾ ԲՈՒԺԵՑ ԵՐԱԿՆԵՐԻՍ ԽՑԱՆՈՒՄԸ

Ես Մասիսից նոր էի Սևան տեղափոխվել: Դեռևս չգիտեի, որ Սևանում գործող եկեղեցի կա, և չնայած նրան, որ հավատացյալ էի, եկեղեցի չէի գնում: Մի օր հարևանուհիս պատմեց, որ Սևանա վանքը վերաբացվել է, որ համայնք կա, որ ամեն կիրակի եկեղեցում Ա. Պատարագ է մատուցվում:

-Արի այս կիրակի գնանք Պատարագի, - ասաց:

-Կգամ, - պատասխանեցի, - բայց ոտքի երակների լայնացում ունեմ, չգիտեմ՝ կկարողնա՞մ բարձրանալ եկեղեցի, չգիտեմ՝ ի վիճակի կլինե՞մ այդքան ժամանակ ոտքի վրա կանգնելու:

-Արի, գուցե Աստված խղճա և քեզ բժշկություն տա,- իրենը պնդեց Հարևանուհիս:

Մի կերպ իջա իններորդ Հարկից, մեծ դժվարությամբ բարձրացա եկեղեցի: Պատարագի ողջ ընթացքում ոտքս ցավում էր: Առանց այն էլ ուռել էր և, չնայած օգտագործած բազում դեղերին, որևէ կերպ չէր անցնում ցավը: Մտածում էի, թե Պատարագից հետո վիճակս ավելի կվատանա:

Մի կերպ դիմացա մինչև Պատարագն ավարտվեց, հետո քահանան շուրջառի տակ բժշկության աղոթք կարդաց, որին նաև ես մասնակցեցի: Վերադարձա տուն: Զգգացի, թե ինչպես իջա Աւեանի թերակղզու աստիճաններով: Հասա շենք, հանգիստ բարձրացա իններորդ Հարկ և հանկարծ գլխի ընկա, որ ոտքս այլևս չի ցավում:

Զմոռանամ ասել, որ գեպքը տեղի է ունեցել 2001թ., Խաչվերացի Պատարագից հետո:

Հիմա ես այլևս ո՛չ երակների լայնացում ունեմ, ո՛չ խցանում: Փառք Աստծուն իր հրաշալի բուժման և ամեն ինչի համար:

ԱՆԱՐԻՍ ԽԱՂԱՏՐՅԱՆ

Ք. Աւեան

ՓՐԿԵՑ ԱՍՏԾՈ ԱՆՈՒՆԸ

Դեպքը կատարվել է Գեղարքունիքի մարզի Լճաշեն գյուղում, 2004 թվականի աշնանը: Որոշել էի խեցգետին բուծել: Հասկանալի է, թե որքան աշխատատար գործ է դա: Հաճախ ինքս էի աշխատում բանվորների հետ, փորձում վերացնել այս կամ այն անսարքությունը, լրացնել այս կամ այն կիսատ գործը: Այդ օրը փչացել էր լուսավորության լամպը: Որոշեցի ինքս փոխել: Աստիճանը հարմարեցրի ավագանի վրա դրված տախտակ-

ների վրա, բարձրացա, տեսա՝ անսարքությունը լամպից չէ: Քանդեցի կոթառը, և այդ պահին չհասկացա՝ ինչ կատարվեց: Զգացի, որ հոսանքը խփեց, և ես, ձեռքով բաց լարը բռնած, ընկա ջրավազանը:

Հաստատ և հստակ զգացի, որ մեռնում եմ: Աչքիս առջեկից անցավ փոքր երեխաս և ուրիշ ոչինչ: Վայրկյանի մեկ տասներորդական մասում հասցրեցի ասել «Աստված»:

Զգացի, որ մահացած եմ, հայտնվել եմ մի այլ աշխարհում: Մի տեղում, որ երկրի վրա չէ: Հիմա այդ ամենը պատմել կամ նկարագրել չեմ կարողանում:

Հետո, երբ արթնացա, առաջին հարցս այն էր, թե. «Ախր ես մեռած էի, ո՞նց կենդանացա»:

Մինչև հիմա էլ չեմ կարողանում հասկանալ, թե ո՞նց այդպիս եղավ: Նախ, որ ձեռքով բռնած էլեկտրական հոսանքի լիցքերը դուրս եկան ոչ թե ոտքերիցս, այլ մի ձեռքի միջով մտան և մյուսով դուրս եկան: Ախր բոլորին է հայտնի, թե էլեկտրականությունը ջրի մեջ որքան վտանգավոր է: Մյուս զարմանքը. ինձ հետ կատարված տեսնելով՝ հորեղբորս տղան իրեն նետել է ավագանը, բայց հոսանքահար չի եղել:

Հիմա, երբ հետադարձ հայացքով նայում ենք, ասում ենք պատճառն այն է եղել, որ նա ինձ ջրից հանելիս ուսերիցս չի բռնել, այլ՝ ոտքերիցս ու գոտկատեղիցս: Ես հասկանում եմ՝ կարելի է գիտական տարրեր բացատրություններ տալ կատարվածին, բայց մի դեպքի համար թվացյալ պատահականությունները շատ չե՞ն արդյոք:

Ինչ էլ որ լինի, իմ «մահացած» ժամանակս տեսածն ու ինձ հետ կատարվածը, իմ հրաշալի փրկությունը ես վերագրում եմ իմ մտքում Աստծո անունը տալուն և նրա ողորմածությանը:

Նախքան այս դեպքը ես հավատում էի, բայց ոչ այնքան խորը: Հավատս ավելի շատ մակերեսային էր, ինչ թաքցնեմ,

նաև՝ կասկածանքով շաղախված, բայց հիմա ես գիտեմ, որ նա է տնօրինում բոլորիս կյանքը և դժբախտության պահին միայն Նրա անվան հիշատակությունն էլ բավական է փրկվելու համար:

ԱՐՎԱԾ ՆԱՎԱԱՐԴՅԱՆ
Գեղարքումիքի մարզ, գյուղ Լճաշեն

ՔԱՐԱՆԱՅԻ ՆԵՐԿԱՅՈՒԹՅՈՒՆԸ

1994 թվականին էր: Մեր սեփական մեքենայով գալիս էինք Ապարանից: Գնացել էինք Արարատյան դաշտի շոգից մի քիչ հանգստանալու, ժամանակ անցկացնելու: Էջմիածնի ճանապարհին ավտովթար տեղի ունեցավ: Սակայն վթարը սովորական չէր: «Զիլ» մակնիշի բեռնատարը անցավ մեր «Ժիգուլու» թափքի վրայով:

Դեպքն արտառոց էր: Մեքենան ճիլվել, գրեթե հավասարվել էր գետնին, սակայն հրաշքն այն էր, որ մեզնից ոչ մեկին ոչինչ չէր պատահել: Միայն հորս շրթունքն էր մի քիչ ճղվել:

Մեր մեքենան այլևս անպետք էր օգտագործելու համար: Այն թողեցինք հենց ճանապարհի վրա և մի այլ մեքենայով հասնք տուն:

Ոչ միայն ես ու մեքենայի մեջ գտնվող մեր ընտանիքի անդամները, այլև գեպքին ականատես մարդիկ նման հրաշքի պատճառ համարում էին այն, որ մեքենայի մեջ էր նաև մեր ընտանիքի քավորը՝ Տ. Ստեփանոս քահանա Մելիքյանը: Ես չգիտեմ՝ նա ի՞նչ աղոթք էր շշնջացել ճանապարհ ընկնելուց առաջ կամ վթարի պահին, բայց հավատացած եմ, որ Տերը պահպանեց նրան և նրա հետ էլ մեր ընտանիքը՝ վերահաս մահից:

ԱՐՏԱԿ ԳԱԲՐԻԵԼՅԱՆ
ք. Էջմիածին

ԻՄ ԱՂՈԹՔԸ ՓՐԿԵՑ ԻՆՉ

Ծառայում էի Հայոց բանակում՝ Տավուշի Մարզի Շամշադինի տարածաշրջանի թոռուզի գորամասում։ 2006 թվականի օգոստոսի 2-ին էր։ Ամեն ինչ հանգիստ էր ու խաղաղ, կարծես թե անհանգստացնող բան չկար, բայց կարծես մեկն ինձ ասելիս լիներ՝ աղոթիր։ Հիանալի բնություն էր, գունագեղ ծաղիկների ծով, թռչունների դայլայլ։ Ընկերոջս հետ նստած էինք ծառերի հովանու տակ։

-Շատ խաղաղ է ամեն ինչ, արի աղոթենք,- առաջարկեց ընկերու։

Աղոթեցինք երկուսով, հետո նա գնաց։ Ես մնացի մենակ, բայց իմ ջերմ ու գաղտնի աղոթքը կարծես թե չէր դադարում։ Աղոթեցի երկար։ Եղավ մի պահ, որ մարմինս սկսեց փշաքաղվել ու մի անսովոր ուրախություն պարուրեց ինձ։ Ես աղոթում էի իմ անվտանգ ծառայության համար, խնդրում էի, որ Աստված ինձ անփորձանք տանի, հասցնի իմ ծնողներին ու հարազատներին։ Ասենք, ո՞վ չգիտի, թե ինչ կխնդրի զինվորն Աստծուց։

Հետո գնացինք հերթապահության։ Եկավ գիշերը, ժամապահը մնաց իր գիրքում, իսկ մենք քննեցինք։ Առավոտյան արթնացա կրակոցների ձայնից։ Առաջին պահ գլխի չընկա, թե ինչ է տեղի ունեցել, իսկ հետո արդեն հասկացա եղելությունը։ Ժամապահը, Աստված գիտե, թե ինչու, հոգեկան անհավասարակշիռ վիճակում կրակ էր բացել սեփական գիրքերի ու իր ընկերների վրա։ Իմ կողքին պառկած երկու զինվոր մահացել էին, իսկ երրորդը ծանր վիրավորվել էր։ Երբ ուշադիր նայեցի, տեսա, որ իմ վարտիքը մի քանի տեղից ծակվել է։ Գնդակները ծակել, մաղէին դարձրել շորերս, բայց ինձ չէին վնասել։ Ում պատմես՝ չի հավատա, իսկ ես վստահ եմ, որ նախորդ օրվա իմ ջերմ աղոթքը փրկեց ինձ։ Մի տաս օր անց ես վերջացրի իմ ծառայության

ժամկետը և տուն գնացի: Իմանալով իմ հրաշալի փրկության մասին՝ ծնողներս մատադ արեցին:

ՏԻԳՐԱՆ ԱՆԴՐԵԱՍՅԱՆ
Արարատի մարզ, գյուղ՝ Միջյան

ԻՄ ԱՌԱՋԻՆ ԲԱՌԸ՝ «ԽԱՉ»

Ով եղել է նախաերկրաշարժյան Գյումրի-Լենինականում, գիտի, որ նրա բնակիչների մեծ մասն աստվածամերժ էր: Բացառություն չէր նաև մեր ընտանիքը: Սակայն մի դեպք պատահեց, որն ստիպեց իմ ծնողներին ապավինել Աստծո զորությանը և հասկանալ, որ նրա համար չկա անհնարին ոչինչ:

Ահա պատմությունը: Ես երկու տարեկան եմ եղել, երբ մի օր, բուժքույր տատիկիս տանը, մեծերի աչքից հեռու, գտել եմ դեղերը և սկսել եմ խաղալ նրանց հետ: Հետո կերել եմ ճնշումն իջեցնող դեղահաբեր: Ոչ թե մեկ կամ երկու հար, այլ բավականաչափ շատ: Ու երբ ինձ հիվանդանոց են հասցրել, արդեն շատ ծանր վիճակում եմ եղել: Գործի են անցել բժիշկները: Սակայն նրանք համոզված չեին, թե ես կապրեմ:

- Եթե նույնիսկ երեխան առողջանա էլ, դժվար թե նորմալ մարդ լինի,- տիսրությամբ ասել էր բժիշկը:

Ինձ միայն մի քանի օր հետո են վերակենդանացման բաժանմունքից տեղափոխում պալատ և մորս թույլ են տալիս, որ խնամի ինձ: Մի քանի շաբաթ անց միայն կարողացել եմ խոսել և առաջին բառը, որ արտասանել եմ եղել է «Խաչը»: Մորս վկայությամբ երեք բառ եմ ասել՝ «Խաչ», «մամ», «ջուր»...

Վերջին երկուսը հասկանալի են, բայց երկու տարեկան երեխան ի՞նչ գիտի, թե ինչ է խաչը: Բայց արի ու տես, որ գիտի: Աստված գիտի, քանզի Տիրոջ ճանապարհներն անքննելի են:

Տեսնելով իմ սերը խաչի նկատմամբ՝ տատիկիս խորհրդով որոշում են հիվանդանոցից դուրս գրելուց հետո մկրտել ինձ:

Մի այլ զարմանալի երևույթի մասին ես: Մի ամսից ինձ դուրս են գրում հիվանդանոցից և բերում են տատիկիս տուն: (Ասեմ, որ մենք ու տատիկենքս ապրում էինք նույն շենքի տարբեր բնակարաններում): Հասկանալի է, թե ինչպիսի ուրախություն պիտի լիներ իմ առողջանալը բոլորի համար: Ինձ բազմաթիվ խաղալիքներ են նվիրում, բայց ես ոչ մի խաղալիքի վրա ուշադրություն չեմ դարձնում և շարունակ մորս փեշը քաշելով՝ հասկացնում եմ, որ ինձ տանի մեր տուն: Զարմացած մայրս գրկում է ինձ և կատարում ցանկությունս: Որքան մեծ է լինում նրա զարմանքը, երբ ես մտնում եմ իմ սենյակ, բարձրանում մահճակալի վրա, ուր գրված է լինում Տիրամոր նկարը, և համբուրում եմ այս: Այս բոլորից հետո միայն հանգստանում եմ ու սկսում եմ խաղալ իմ նոր խաղալիքներով: Ասեմ, որ մեր տանն այդ նկարը եզակի էր, մեր տանը սրբապատկերներ չկային, քանի որ, կը կնեմ, մերոնք կոմունիստական գաղափարների հետևորդներ էին:

Իմ նման վերաբերմունքն ավելի է խորացնում մերոնց համոզմունքն ինձ մկրտելու հարցում և 1987 թվականի ապրիլի 12-ին մկրտում են: Այսպես քրիստոնեական հավատքը մուտք գործեց մեր ընտանիք, իսկ ես փոքր տարիքից որոշեցի նվիրվել ինձ մահից փրկող Աստծուն և ամբողջ կյանքում ծառայել նրան:

ԱՆՏԵՍԱՆԵԼԻ ՊԱՏԱՐԱԳ

2002 թվականի հոկտեմբերի 3-ին էր: Կլիներ կեսօրվա ժամը երեքը-երեք անց կեսը: Կանգնած էի Գյումրու Ս. Յոթվերք եկեղեցու բակում: Հանկարծ լսեցի, որ եկեղեցու ներսից երգեցողության ձայն է գալիս: Հիշում եմ՝ Ս. Պատարագի սկզբի հատ-

վածն էր՝ «Խորհուրդ խորինը»: Լսվում էր նաև քշոցների ձայնը, հնչում էին զանգերը: Առաջին պահ կարծեցի, թե ինձ թվացել է, քանի որ ես էի ժամկոչը և ես պետք է զանգահարեի, իսկ ես դրսում կանգնած էի: Զայները շարունակվում էին:

Ստիպված ներս մտա՝ տեսնելու համար, թե ո՞վ է երգում: Սակայն ներսում ամեն ինչ հանդիրտ ու հանդիսատ էր: Ներսում մարդ չկար: Դուրս եկա, և դարձյալ շարունակվում էր երգեցողությունն ու քշոցների ձայնը, զանգերի դողանջը: Շուտով եկավ իմ օդնականն ու հարցրեց.

-Ո՞վ է քաշում զանգերը:

Ես նրան պատմեցի եղելությունը: Հետո պարզվեց, որ զանգերի ձայնը լսել են նաև եկեղեցու դիմաց գտնվող ոսկու շուկայի աշխատողները, նաև՝ եկեղեցու պահակ Մարգարիտ մամը, որն ապրում էր հարեւանությամբ:

Երբ այդ մասին հարցրեցինք ավագ լուսարար Տեր Թաթուլ քահանա Հակոբյանին, պատասխանեց, թե Ավետարանական խոսքի համաձայն գուցե այդ օրը Երկնքում ուրախություն է եղել ինչ-որ առիթով և այդ ուրախության ձայները լսելի են եղել նաև երկրի վրա, տվյալ դեպքում՝ Ս. Յոթվերք եկեղեցում: Հետագայում այդ նույն տեսակետը հաստատեց նաև Շիրակի թեմի առաջնորդ Միքայել եպիսկոպոս Աջապահյանը:

ԲԱՑԿԵՑ ՐԱՄՐԻ ԼԵԶՈՒՆ

Այս դեպքը նույնպես տեղի է ունեցել Սուրբ Յոթվերքում, 2001 թվականին: Քահանան մի համը տասներկու տարեկան տղայի էր մկրտում: Դրոշմի ժամանակ հանկարծ եկեղեցու լույսերն անջատվեցին և ի զարմանս բոլորի տղան բարձր ձայնով կանչեց.

-Վա՛յ, լույսերն անջատվեցին: Ուրեմն իմ մկրտությունը չընդունվեց:

Առաջին պահ բոլորի ուշադրությունը լույսերն էին, հետո հանկարծ գլխի ընկան, որ համըլ խոսեց:

Ինչ խոսք, լույսերի անջատվել կամ չանջատվելը բնավ էլ չի խոսում մկրտության ընդունված կամ ընդունված չլինելու մասին, սակայն փաստ էր, որ Մկրտության ու Դրոշմի սուրբ խորհուրդը բացեց տասներկուամյա համըլի լեզուն:

Եղանը ՅՈՎՅԱՆՍԻՍՅԱՆ

Ք. Գլումրի

Ո՞Վ ՍԹԱՓԵՑՐԵՑ ԹՄՐԱՄՈԼԻՆ

-Գիտե՞ս, որ ես մի ժամանակ թմրամոլ եմ եղել,- մի օր անկեղծացավ ծանոթս, ու ես զարմացած նայեցի նրան:

-Թմրամո՞լ:

-Այո, - գլուխը դրական շարժեց նա և տեսնելով իմ թերահավատությունը՝ ճպտաց,- պատմեմ՝ լսիր: Երկար տարիներ տառապում էի այդ ախտով: Ակզբում հաճույքի համար էի ծխում, հետո արդեն հրաժարվել էի կարողանում: Հաշիշի ու թմրագեղի էի տվել ողջ եղած-չեղածը, կորած մարդ էի ու չգիտեի անելիքս: Երբ ծխում էի, մոռանում էի աշխարհը, իսկ երբ սթափում էի, նորից սկսում էի մտածել, թե որտեղի՞ց գտնեմ նոր չափաբաժին, որ կոտրատվող մարմնիս պահանջը հագեցնեմ:

Մի գիշեր ընկել էի ծանր վիճակի մեջ: Ուզում էի սրակվել, բայց թմրագեղ չունեի: Ուզում էի քնել ու չէի կարողանում, ցանկղանում էի մոռանալ ու չէր ստացվում: Գիտեի՝ թմրաբաժին կարելի է ճարել Քանաքեռից, բայց Հրազդանից մինչև Քանաքեռ որքա՞ն ճանապարհ է... Բայց ճանապարհի հեռավորությունից, փող էլ չկար:

Շատ մտածեցի, վերջը կարծես թե դուք հնարը։ Վերցրի կնոջս միակ զգեստն ու ճամփա ընկա դեպի Քանաքեռ։ Գնում էի ասես օդի միջով, չէի հասկանում արածս, ամբողջ ուշքս ու միտքս տեղ հասնելն էր ու նոր չափաբաժին ստանալը։ Քանի՞ ժամ գնացի, Աստված գիտե։ Ո՞չ վախենում էի, ո՞չ անհանգստանում։ Ո՞չ ծարավ էի, ո՞չ քաղցած։ Մի ցանկություն ունեի՝ թմրադեղ։ Երկար ճանապարհ կտրելուց հետո հասա, բայց պարզվեց, որ... չկա։

Ով գոնե մոտիկից տեսել է թմրամոլի տառապանքը, կհասկանա, թե դա ինչ էր նշանակում ինձ համար։ Աշխարհն ասես փուլ եկավ գլխիս։ Մոլոր քայլերս դարձյալ ուղղեցի դեպի տուն։ Քայլում և անիծում էի իմ բախտը։ Ճանապարհին, երբ արդեն նոր-նոր բացվում էր լույսը, հանկարծ մի զորություն լուսավորեց ինձ։ Դա ինչ-որ տարօրինակ, վերերկրային բան էր։ Մի ակնթարթում լուսավորվեց միտքս։ Բա որ կնոջս վերջին շորը տանում էի թմրադեղով փոխելու, կինս ի՞նչ պիտի հագներ։ Հանկարծ մի մեծ ու անսաելի ամոթ զգացի և... միանգամից կորավ թմրադեղ ընդունելու ցանկությունս։ Այդ օրվանից մինչև հիմա այլևս ոչ մի անգամ թմրադեղ չեմ ընդունել։ Բացի այդ, այդ վերերկրային ներշնչման շնորհիվ ես նաև աստվածավախ ու հավատացյալ դարձա։ Դու տեսած կա՞ս, որ թմրամոլը կարողանա այդքան հեշտությամբ հրաժարվել իր արատավոր սովորությունից։ Մարդիկ բժիշկների դռներն են մաշում, մարդիկ վաճառում են ունեցածներն ու տալիս են բժշկի, բայց թմրամությունից ազատվել չեն կարողանում, իսկ ես, Աստծո ողորմածությամբ, հրաժարվեցի այդ վտանգավոր սովորությունից և եթե այսօր չպատմեի, նույնիսկ դու չէիր իմանա, որ ես մի ժամանակ թմրամոլ եմ եղել։

ՎԱԶԱԳԱՍ ԳՐԻԳՈՐՅԱՆ
Բանասիրական գիտությունների
դրկտոր

Ս ԿՈՒՅԱԸ ԲՈՒԺԵՑ ՀՌԻՓՍԻՄԵ ԱՂՋՆԱԿԻՆ

Հայտնի է, որ «Սուրբ Հռիփսիմե» վանքում են ամփոփված կույսի մասունքները: Ո՞վ գիտե, դարերի ընթացքում քանի ՝ քանի հրաշալի բժշկումներ են կատարվել նրա գերազմանի մոտ: Այդօրինակ բժշկությունները շարունակվում են նաև այսօր:

Բողորովին վերջերս կույսի գերեզմանին այցելեց մի աղջնակ: Ինչ-ինչ պատճառներով բռնվել էր երեխայի լեզուն, և նա զրկվել էր խոսելու ընդունակությունից: Աղջիկն ու մայրը եկան, աղոթեցին Սուրբ Հռիփսիմեին, մոմ վառեցին, նրա բարեխոսությունը խնդրեցին և... արդեն երեք օր համրության դատապարտված երեխան խոսեց: Ավելացնենք, որ աղջկա անունը նույնպես Հռիփսիմե էր:

ՔՈՒՅՐ ՂԱՏԴԻԿԻ ՊԱՏՄԱԾԻՑ
Հայաստանի Հանրապետության հեռուստաալիք
«360 աստիճան» լրատվական հաղորդման
2006թ. մարտի 5-ի թողարկումից

ՏԱՐՕՐԻՆԱԿ ՄԱՏԱԴՐ

Այս պատմությունն ինձ պատմել է Արսեն անունով մի տղա, որ ապրում էր կարծեմ նախկին Սևանի շրջանի Յամաքաբերդ գյուղում:

-Ծնողներս արդեն երեք աղջիկ ունեին և նոր երեխայի էին սպասում,- այսպես սկսեց իր պատմությունը նա, - 1962 թվականն էր: Մայրս հղի էր, և հասկանալի պատճառով, ծնողներս շատ էին ուզում, որ տղա ծնվի: Մատաղ են խոստանում Սևանա վանքին: Մատաղի օրը մեր ողջ գերդաստանը գալիս է եկեղեցի: Հայտնի է, որ խորհրդային այն տարիներին վանքը, մասնավորապես Սուրբ Առաքելոց եկեղեցին, թանգարան էր:

Նրանք բարձրանում են եկեղեցի, իրենց ուխտն անելուց հետո իջնում են ներքեւ, լճի ափը և որոշում են ճաշակել մատադր: Հայրս որոշում է սովորական ձևով եփելու փոխարեն խորոված անել մատաղի միսը:

Միսը կրակին դնելուց երկու րոպե չանցած՝ հայտնվում են երկու կանայք: Հայրս և բոլոր բարեկամներս վկայում են, որ կանայք իջնելիս են եղել վերեկից՝ կղզու գագաթից: Բայց մերոնք գիտեին, որ վերեկում որեւէ մարդ չկա... Դա իր հերթին: Կանայք նաև տարօրինակ հագուստներ են ունեցել. երկար սպիտակ սավաններ, և շատ թախծու ու վշտահար դեմք: Նրանց աչքերն ասես ճպռոտ են եղել. լացի՞ց, թե՞ մի այլ բանից:

-Այս ի՞նչ եք անում,- հանդիմանում են նրանք, - բա մատադր խորովա՞ծ կանեն: Այս ծուխն առ Աստված է բարձրացել...

-Ոչինչ, քույրիկ, - կես կատակ-կես լուրջ պատասխանում է հայրս,- ի՞նչ տարբերություն, թե ինչպես կուտենք գառան միսը: Դուք էլ համեցեք:

«Տեսնես որտեղից իմացան, որ մենք մատաղ ենք արել», - մտածում է մայրս, հետո գլխի ընկնելով, որ ինչ-որ բան այն չէ, այս կանայք շատ տարաշխարհիկ տեսք ունեն, հարցնում է.

-Քույրիկ, դուք հաստատ կիմանաք: Այս մեկն է՞լ է աղջիկ:

-Զէ, այդ մեկը տղա է,- պատասխանում են նրանք:

Իսկ մերոնց իրենց հետ սեղան նստելու հորդորներին պատասխանում են.

-Մեր աչքերը ծխից ու արցունքից փակված են, լվացվենք, նոր:

Մոտենում են լճին, երեսներին ջուր են քսում և մերոնց ապշահար հայացքի առջև՝ անհետանում:

Դրանից հետո ծնվում եմ ես: Մինչև այսօր ապրում եմ աշխարհում: Այդ դեպքը մինչև հիմա հիշում ու պատմում են ոչ միայն իմ ծնողները, այլև բոլոր նրանք, ովքեր մասնակցել են

այդ տարօրինակ մատաղին և ականատես են եղել այդ հրաշքին,- ասաց նա:

ԿԱՐԴԱԼՆ ԵՂԻԱԶԱՐՅԱՆ
Կոտայքի մարզ, գյուղ Գողթ

«ՄԱԾՏՈՑՆԵՐԻ» ԲՈՒԺԻՉՉ ԶՈՒՐԸ

Երկու տարի առաջ էր, ձմեռնամուտին: Որոշեցի մեքենայի հովացման համակարգի մեջ ջրի փոխարեն անտիֆրիզ լցնել: Ձուրը թափեցի, փորձեցի համապատասխան խտության լուծույթ պատրաստել: Տարողության միջից փողը ակով քաշեցի հեղուկը և... մի քիչ բերանս լցվեց: Ես ընդհանրապես զգվող չեմ, բայց բերանիս մեջ մի տտիպ քաղցրություն զգացի: Տհաճ էր, բայց բանի տեղ չդրեցի, շարունակեցի գործս և մի քանի րոպե անց ողջ մարմինս պատեց ալերգիկ ցանով:

Թժկի դիմեցի: «Ալերգիա է», - ասացին և հենց հիվանդանոցում ներարկում արեցին, որից, սակայն, ավելի վատացա և սկսեցի դողացնել: ճիշտն ասած, ասեղից վախենում եմ, այդ դողն էլ մյուս կողմից: Բժիշկներն իրար խառնվեցին, մի կերպ դողը կտրվեց, բայց ցանը չանցավ և վիճակս չթեթևացավ: Ասեմ, որ մոտս մի փոքր մրսածություն էլ կար:

-Արի երևան ուղարկենք,- ասացին Սևանի բժիշկները:

Ոչինչ չասացի, մեքենան ուղիղ «Մաշտոցներ» քշեցի: Ասում են դարեր առաջ Մաշտոց հայրապետն այդտեղ ճգնել ու օրհնել է այդ ջուրը: Եվ այն շատ ու շատ հիվանդների է օգնում: Մաքիս մեջ Աստծուն խնդրեցի բուժել ինձ, մոմ վառեցի: Հետո մերկացա, և չնայած ցրտին ու իմ մրսածությանը, Մաշտոցների օրհնված ջրից մի դույլ վրաս լցրեցի: Մրբվեցի, հագաշորես և... հիվանդությունն ասես դանակով կտրեցին. տաս րոպե հետո անցավ ու անցավ:

* * *

Հաջորդ տարի նույնը աղջկաս հետ պատահեց: Ի՞նչ գործ էր արել, չգիտեմ, զզվել էր: Մարմինը լրիվ կարմիր ցանով էր պատվել: Տարանք հիվանդանոց:

-Պետք է կաթիլային միացնենք,- ասացին:

Եկանք, գեղեր առանք, բուժքույր կանչեցինք: Երեխան մի կուրս ընդունեց, կարծես թե լավացավ, բայց սրսկումներն ավարտելուց երկու օր անց վիճակն ավելի վատացավ: Մայրն իրար անցավ.

-Արի էլի հիվանդանոց տանենք,- ասաց:

-Արի,- ասացի,- բայց իմ իմացած հիվանդանոցը:

Նորից տարա «Մաշտոցներ»: Զնայած կնոջս մտավախությանը, թե երեխան կմրսի, գարձյալ Մաշտոց Եղիվարդեցու օրհնած աղբյուրի ջրից լցրեցի աղջկա վրա և... հիվանդությունը չքացավ:

Ես բժշկությանը գեմ չեմ, բայց իմ գլխով անցածին ու աչքով տեսածին չեմ կարող չհավատալ: Չեմ կարող չհավատալ Մաշտոց Եղիվարդեցու աղբյուրի զորությանը:

ՕՆԻԿ ԳԱՍՊԱՐՅԱՆ
Սեամ

ՓՈՔՐԻԿ ԹԱԹՈՒԼԻ ԹՌԻՉՔԸ

Իշեանցի 13-ամյա Գոհար Օթարյանին հանդիպեցինք Դիլջանի մանկական առողջարանում, 2006 թվականի ապրիլին: Նրանց հավատափոր ընտանիքն ութ երեխա ունի: Նրանք հավատում են Աստծուն, ապրում քրիստոնյայի կյանքով և Աստված պահպանում է նրանց: Հաճախ է ողորմածաբար ներում և հաճախ է փրկում չարից ու փորձանքից:

-իսկ այն դեպքը, որ տեղի ունեցավ անցած տարի եղբորս՝ երկու տարեկան թաթուլի հետ, իսկական հրաշք էր,- ժպտաց աղջկիլը:- Այդ օրը ես խաղում էի շենքի բակում։ Կարծես մեկն ինձ ասաց. «Հապա վերև նայիր»։ Նայեցի և ի՞նչ։ Սարսափեցի։ Փոքրիկ թաթուլը բարձրացել էր մեր իններորդ հարկի բնակարանի պատշգամբի լուսամուտին ու ներքեւ էր նայում։ Ահցից չկարողացա ձայն հանել, իսկ երեխան ընկավ։ Ինձնից անկախ վազեցի ընդառաջ և թևերս պարզեցի։ Երեխան հանգիստ, ասես չէր ընկել այդքան բարձրությունից, պառկեց թևերիս վրա։ Առաջին պահ չհասկացա, որ հրաշք կատարվեց։ Պատկերացրեք իններորդ հարկից, մոտ 25-27 մետր բարձրությունից 5-6 կիլոդրամանոց ինչ-որ բան ընկնի և դուք փորձեք բռնել։ Նախ չեք կարողանա, հետո էլ եթե նույնիսկ բռնեք, ցավ կզգաք։ Մի խոսքով։ Ո՛չ ինձ բան պատահեց, ո՛չ երեխային։ Տարանք երևան, ստուգեցին, պարզվեց, որ առողջ է։

Անցել է մեկ տարուց ավելի ժամանակ, փոքրիկ թաթուլը առողջ և ուրախ վազվզում է, իսկ լսողները չեն հավատում, որ նա 9-րդ հարկից ներքեւ է ընկել ու ողջ է մնացել Աստծո ողորմածությամբ։

Ն. ՎԱՐԴԱՆՅԱՆ, Ք. ԱԶՆԱՎՈՒՐՅԱՆ
Սեամի Վազգենյան հոգևոր դպրանցի
4-րդ լսարանի սաներ

ՅԻՍՈՒՍԻ ԱՐՑՈՒՆՔԸ

Դեպքը տեղի է ունեցել 2000 կան 2001 թվականին։ Քեռիս՝ Տեր Պարթև ավագ քահանա Աշուրյանը, Հիսուսի մի մեծադիր ու գեղեցիկ նկար ունի։ Պատկերված է Քրիստոսը՝ փշե պսակը գլխին։

Մեծ պահքի հենց առաջին առավոտյան, երբ նա մոտենում է նկարին, որ աղոթի, նկատում է, որ Հիսուսի աչքերի մեջ ինչ-

որ հեղուկ է առաջացել: «Արցունքը» հավաքվում է աչքերի աղբյուրակի մեջ, բայց չի հոսում:

Այդպես լինում է Մեծ պահքի ամբողջ ընթացքում, իսկ դրանից հետո վերանում է:

Սակայն այդ չհոսող, աչքերի մեջ հավաքված արցունքի մասին ոչ միայն Տեր Պարթևն է վկայում, այլև այդ հրաշքին ականատես եղած ուրիշ մարդիկ ևս:

ՅՐԴԵՅԻՑ ՅԵՏՈ

2004 թվականի դեկտեմբերյան մի օր Արմավիրի մարզի Ուկեհատ գյուղի միջնակարգ դպրոցի 9-րդ դասարանում հրդեհ բռնկեց: Դասարանում դրված էր նավթի վառարան, տղաները չարություն էին արել, նավթը հոսել էր, հետո բռնկել էր նախ վառարանը, հետո՝ հատակը, վարագույրները... Մի խոսքով իսկական հրդեհ...

Անմիջապես նրանց օգնության հասան բարձր դասարանների աշակերտները: Աշակերտներին դուրս հանեցին, հանգցրեցին կրակը, կոտրեցին պատուհանների ապակիները, որպեսզի ծուխը արագ քաշվի: Բոլոր պատերը սևացել էին, պատել մըի հաստ շերտով, բացի գրատախտակի վերեւում կախված Քրիստոսի նկարից: Ո՛չ կրակը, ո՛չ ծուխը, ո՛չ մուրը չէին մոտեցել նրան, և նկարի թուղթը պահպանել էր իր նախնական սպիտակ-մաքրությունը: Բոլորը նայում էին նկարին ու զարմանում, թե ինչպես է եղել, որ հրդեհի բոցերի ու ծխի միջից այն դուրս է եկել այդպես մաքուր ու անարատ:

ԻՆՉՈՐ ԷՐ «ԼԱԼԻՍ» ՍՐԲԱՊԱՏԿԵՐԸ

Մի քանի տարի առաջ է կառուցվել նախկին Եղեգնաձորի շրջանի Մալիշկա գյուղի «Ա. Աննա» եկեղեցին: Գեղեցիկ կա-

ոռւյց է, սակայն, քանի որ գյուղում ծխական քահանա չկա, այնտեղ կանոնավոր կերպով ժամերգություններ ու արարողություններ չեն կատարվում: Եկեղեցում Սուրբ Պատարագ էր մտուցվել միայն օժման ժամանակ:

Մի անգամ Մալիշկայում եղած ժամանակ եկեղեցի է մտնում եղեգնաձորի հոգևոր հովիվ Տեր Պարթև ավագ քահանա Աշուրյանը և նկատում, որ Խորանում գտնվող Մանկան ու Կույսի նկարից արցունք է հոսում: Առաջին պահ չի հավատում աչքերին: Նայում է ավելի ուշադիր և համոզվում է, որ նրանց աչքերի մեջ ինչ-որ հեղուկ է լճացել:

Մտածում է, որ գրա պատճառը, հավանաբար, Պատարագ չմատուցելն է: Առաջիկա կիրակի օրը եկեղեցում Սուրբ Պատարագ է մատուցում և արարադությունից անմիջապես հետո «սրբվում է» Տեր Հիսուսի և Սուրբ Կույս Մարիամի արցունքը:

ԳԵՎՈՐԳ ԳՅՈՒՂԱԼՅԱՆ
Արմավիրի մարզ, գյուղ ՌԱԿԵՐԱՄ

ԱՆԴՈՒՆԴԻ ԵԶՐԻՆ

Հայրս՝ Աղասի Բարաքյոզյանը, հավատավոր մարդ է: Նրա կարծիքով աշխարհում չկա ոչինչ, որ տեղի ունենա առանց Աստծո կամքի: Հայ Առաքելական եկեղեցու հետեղորդներ են նաև մյուս բարեկամներս: Իսկ Աստված միշտ էլ օգնում է նրանց, ովքեր հավատում և իրենց հույսը դնում են իր, Սուրբ Տիրամոր և մյուս սրբերի բարեխոսության վրա:

Սակայն որքան էլ հավատավոր լինի մարդը, լինում են պահեր, որ կասկածում է: Իմ կարծիքով հրաշքները երբեմն արվում են, որպեսզի մարդկանց հավատն ամրանա, և կասկածանքի որդը երբեք գլուխ չբարձրացնի նրանց հոգում:

Դեպքը տեղի է ունեցել 1999 թվականի մայիսին: Հայրս պապիկիս ու քեռուս երկու որդիների հետ գնում էր «Զվարթնոց» օդանավակայան: Գնում էին Խուսաստանից եկող քեռուս դիմավորելու: Գյումրի - Զվարթնոց ճանապարհին, Օշականի մոտ, Հայրս սկսում է քեռուս տղաներին՝ էղգարին ու էղվարդին պատմել այդ սուրբ վայրի՝ Օշականի մասին: Պատմում է Սուրբի կենսագրությունը, հեռվից ցույց է տալիս եկեղեցին, որի մեջ ամփոփված են նրա մասունքները: Մի խոսքով շեղում է ուշադրությունը և արգելակում է միայն այն ժամանակ, երբ մեքենան իր մեծ մասով հայտնվել էր անդնդախոր ձորի վրա: Եթե երկրային տրամարանությամբ առաջնորդվելու լինենք, ապա մեքենան պիտի ընկներ ձորը: Սակայն ինչ-որ մի ուժ նրան պահում էր ձորի վրա: Միայն հետևել անիվներով ձորապոկի ժայռին հենված՝ մեքենան մնում էր կանգնած: Հավաքվում են գյուղացիները, բայց ոչնչով չեն կարողանում օգնել ջուր կտրած ուղեղորներին, քանզի վախենում են, որ մի անհաջող շարժումը կարող է անդառնալի հետևանքների հասցնել:

Վերջապես հզոր մեքենա են գտնում, զգուշությամբ նրանից կապում «Ժիգուլին» և քաշելով փրկում անդունդը գլորվելուց:

Ո՞րն է հրաշքը: Այն, որ մինչև օգնական մեքենա գտնելը, մինչև օգնության հասնելը մեքենան ուղեղորներով, մազից կախված մնում է անդունդի եղրին: Հրաշքը նրան այդպես պահող ուժի գոյությունն է:

ԶԱՅԱՐ ԲԱՐԱՔՅՈՎՅԱՆ
p. Գյումրի

ԻՆՉՊԵՍ ԲԺԾԿՎԵՑ ՔԱՂՅԿԵԴՈ

Մեր հարեւանուհին՝ տիկին Մանուշը, հավատացյալ կին է, Հայ Առաքելական Սուրբ եկեղեցու հետեղորդ: Փորձում է ապրել

պատվիրանները պահելով, ամեն կիրակի մասնակցում է Սուրբ Պատարագին, տանը առանձնական աղոթքներ է անում:

Վերջերս, անսպասելի կերպով, նրա ճակատին մի մեծ խալ էր առաջացել, որ օրեցօր մեծանում էր: Հետո խալն սկսում է արյունահոսել: Բոլորը, այդ թվում և ինքը՝ Մանուշը, գիտեին, որ դա քաղցկեղ է: Կարծեմ նույնն էին հաստատել նաև բժշկական ուսումնասիրությունները:

Հավատացյալ մարդուն նման դեպքում ի՞նչ է մնում աղոթքից բացի: Աղոթում էր տիկին Մանուշը, Տիրոջը խնդրում, որ այդ ցավը վերցնի իրենից:

Եվ ահա մի օր աղոթելով գնում է դեպի եկեղեցի, և ինքն էլ չիմանալով ինչպես, ձեռքը տանում է ճակատին և քաշում, պոկում է չարորակ գոյացությունը: Մի քիչ անց գլխի է ընկնում իր արածը և սարսափում է: Զէ՞ որ նման դեպքերում չի տրվում ուռուցքին ձեռք տալ: Տուն վերադառնալուց հետո մոտենում է հայելուն՝ պոկված վերքն ուսումնասիրելու համար և զարմանքից քարանում է. ճակատին ոչ միայն վերք, այլև՝ սպի չկար:

Հիմա էլ կա տիկին Մանուշը, ապրում է Գեղարքունիքի մարզի Ծովազարդ գյուղում և ամեն օր փառք է տալիս Աստծուն, որ իր երեխաներին անմայր չթողեց և հրաշալի կերպով բժշկեց իրեն:

ՎՈԼՈՂՅԱՆ ՆԱԶԱՐՅԱՆ
Գեղարքունիքի մարզ, գ. Ծովազարդ

ՔԱՂՑԿԵԴԸ ԲՈՒԺԵՑ ՄԱՍՆԱՏՈՒՓԸ

Այս դեպքն ինձ պատմել է Հայ եկեղեցու պատմության ուսուցչուհի Ռուզաննա Ավետիսյանը, 1995 թվականին, երբ միա-

սին մասնակցում էինք Արարատյան Հայրապետական թեմի կազմակերպած կրոնի ուսուցիչների դասընթացներին:

«Քույրս հիվանդ էր քաղցկեղով,- ասաց Ռուզաննան,- բժիշկներն այլևս հույս չեին տալիս: Մենք՝ ես և մյուս քույրիկս, հերթով ինամում էինք հիվանդին: Մի օր հիշեցի, որ դասընթացներում մեզ հետ սովորող աղջիկներից մեկը պատմեց, թե ինչպես Մատթեոս Ուռհայեցին ժամանակին բուժվել է Գյումրիի Սուրբ Յոթվերք եկեղեցում աղոթելուց հետո: «Խեղդկողը ձեռքը փրփուրներին է գցում», - մտածեցի հուսահատ և ինձնից հեռացրի Յոթվերք գնալու միտքը: Հետո, հիվանդի կողքին նստած, մի փոքր նիրհեցի և կես-քուն կես-արթուն պարզորոշ լսեցի մի ձայն, որ ասաց.

-Բեր Յոթվերք եկեղեցու մասնատուփը, թաթախիր ջրի մեջ, ապա այդ ջուրը խմեցրու հիվանդին:

Ես սթափվեցի քնից, բայց մտածեցի. «Ուռհայեցու մասին պատմածի աղոթեցության տակ այսպիսի երազ տեսա»: Լուսացավ, թվաց, թե օրվա հոգսերի հետ կմուացվի նաև այդ երազտեսիլքը, բայց ոչ միայն այդ, այլև հաջորդ օրերին լսած խոսքերն ամեն րոպե կենդանի ու կառչուն, զրնգում էին ականջներիս մեջ: Ինչ էլ որ անում էի, չէի կարողանում դրանցից ազատվել:

Ի վերջո որոշեցի գնալ Գյումրի: Առանց որևէ մեկին ասելու գնացի Գյումրի, հարցուփորձ անելով գտա Յոթվերքը, հանդիպեցի քահանային, պատմեցի ամեն ինչ: Նա համբերությամբ լսեց, լռեց երկար ժամանակ, իսկ հետո ասաց, որ ինքն ինձ հետպիտի գա հիվանդի մոտ:

-Բայց ախր ես գաղտնի եմ եկել, բացի այդ ո՛չ հիվանդը, ո՛չ էլ նրա ամուսինը հավատացյալ չեն կամ աչքի չեն ընկնում ջերմեռանդությամբ:

-Ախր ես ինչպե՞ս կարող եմ մասնատուփը վստահել յուրաքանչյուր խնդրողի,-թեւերն անօդնական տարածեց քահանան:

Երկար խնդրեցի, խոստացա հաջորդ օրն անպայման վերադարձնել: Վերջապես բարի քահանան զիջեց:

Երբ տեղ հասա, տեսա՝ քույրս քնած է: Զցանկացա արթնացնել: Մասնատուփը դրեցի սեղանին, կողքին՝ բաժակով ջուրը: «Հենց արթնանա, մասնատուփը կթաթախեմ ջրի մեջ ու կտամ, որ խմի», - որոշեցի ու նստեցի հիվանդի կողքին: Հոգնած էի և չիմացա, թե ինչպես նստած տեղս ննջեցի:

Արթնացա քրոջս տնքոցից: Վեր կացա, որ մասնատուփը թաթախեմ ջրի մեջ: Երբ մոտեցա սեղանին, ապշեցի: Դեռևս ալիքում էր բաժակի ջուրը, իսկ մասնատուփը թաց էր: Ակներևաբար մի անտեսանելի ձեռք ինձնից առաջ այն թաթախել էր ջրի մեջ:

Երկար մտածելու ժամանակ չունեի. բաժակով ջուրը մոտեցրի հիվանդի շուրթերին: Այդ պահին ինձ համակել էր մի անբացարելի երկյուղ: Ե՛վ սարսում էի, և՛ հավատում, որ Աստված անպայման օգնելու է քրոջս:

Հաջերդ օրը խոստացածիս նման մեկնեցի Գյումրի, վերադարձրի մասնատուփը և ամեն ինչ պատմեցի քահանային:

-Ամեն ինչ լավ կլինի, - ժամաց քահանան: Ես չհարցրի, բայց ենթադրեցի, որ նա աղոթել է քրոջս համար:

Տուն վերադարձա: Առաջին շաբաթվա ընթացքում ոչ մի փոփոխություն չէր նկատվում: Հիվանդը պառկած էր՝ ասես անկենդան, բայց հետագայում սկսեց կենդանության նշաններ ցույց տալ. սկսեց ուտել, զրուցել, իսկ գիշերները քնում էր հանգիստ: Բոլորը կարծում էին, թե դա մահվանից առաջ տեղի ունեցող երեսութական առողջացում է: Մի բան, որ տեղի է ունենում հիվանդներից շատերի հետ: Իսկ ես հավատում ու չէի հավատում, որ մասնատուփն օգնել է նրան, բայց իմ արարքի մասին ոչ ոքի չէի պատմում: Իսկ քույրս օրեցօր լավանում էր:

-Գուցե մի անգամ է՞լ ստուգման տանենք,- դիմեցի ամուսնուն:

Համոզվեց: Ստուգելուց հետո բժիշկը ցնցվեց.

-Զեր հիվանդն ապաքինվում է,- ասաց,- հրաշք է կատարվել:

Անցել է երկու տարի, քույրս լիովին առողջացել է, և ես առջին անգամ քեզ եմ պատմում այս մասին», - իր պատմությունն այսպես ավարտեց Ռուզաննան:

«ՍՈՒՐԲ ՍԱՐԱԿ» ԵԿԵՂԵՑՈՒ ՀՐԱԾՔԸ

1988թ.: Լեփ-լեցուն էր Արմավիրի մարզի վերաբացված «Սուրբ Սահմանական» եկեղեցին: Բայց ժողովրդի մեջ առանձնանում էր սիյուռքահայերի մի խումբ: Նրանք նաև նկարահանում էին Սուրբ Պատարագը: Քարոզի ժամանակ պատարագիչ քահանան՝ Տեր Մաշտոցը, դիմելով ժողովրդին՝ ասաց.

-Հավատացյալ քույրեր և եղբայրներ, այսօր այստեղ՝ այս փոքրիկ, բայց զորավոր եկեղեցում ներկա է նաև մեր քարերարը՝ ամերիկահայ Մարգար Սամանյանը, որի միջոցներով վերանորոգվել է այս եկեղեցին: Պարոն Մարգարն այստեղ է եկել, որպեսզի իր գոհությունը հայտնի Տիրոջը՝ իր որդու բժշկության համար:

Իսկ ի՞նչ էր տեղի ունեցել: Մարգարը մեկ տարի առաջ իր երազում տեսել էր, որ մանկուց ի վեր անդամալույծ իր որդին կարող է բժշկվել Հայաստանում, Տանձուտ գյուղի եկեղեցում: Հույսով լցված նա զանգահարում է Այգեշատ գյուղում ապրող իր քարեկամներին և հարցուփորձ է անում Տանձուտ գյուղի ու նրա եկեղեցու մասին: Իր սերնդակից մարդիկ հետաքրքրվում

են, բայց եկեղեցին չեն գտնում: Սակայն Մարգարը, իր տեսիլքին հավատալով, խնդրում է ավելի լավ հետաքրքրվել:

Ի վերջո, Այգեշատ գյուղի մի բնակչուհի՝ 85-ամյա Ծաղիկ մայրիկը վկայում է, որ գյուղը, իրոք, եկեղեցի է ունեցել, սակայն այն հետագայում վերածվել է թունաքիմիկատների պահեստի: Ինքը՝ տիկին Ծաղիկը, լավ գիտեր եկեղեցու տեղը և ցույց է տալիս հետաքրքրվողներին:

Անմիջապես հեռաձայնում են Մարգարին: Նա որդու հետ գալիս է Հայաստան: Առաջին հինգ օրերին նա որդու հետ գիշերում է եկեղեցում: Հետաքրքրասեր հայացքներից խուսափելու համար եկեղեցի էին գալիս ուշ երեկոյան, իսկ վաղ առավոտյան վերադառնում էին: Մարգարի վկայությամբ, արդեն հինգերորդ օրը որդին իր ոտքով է վերադառնում Այգեշատ:

Ի գոհություն Աստծո և ի վկայություն իր որդու բժշկության՝ նա որոշում է վերանորոգել ու վերաբացել եկեղեցին և ամեն տարի մատաղ բաժանել:

Անդամալույծ տղայի բժշկությունը հրաշք էր: Նրա հիվանդությունը բժշկել էին կարողացել Ամերիկայի բազմահմուտ բժիշկները, իսկ Աստված նրան ոտքի կանգնեցրեց իր ողորմածությամբ, Տանձուտ գյուղի Սուրբ Սահակ եկեղեցու միջոցով:

ՀԱՍՏԻԿ ՍՐԱՊԻՈՆՅԱՆ
Արմավիրի մարզի Արտաշար
գյուղի միջնակարգ դպրոցի
Հայ եկեղեցու պատմության ուսուցուիչի

ԴԻՎԱԶԱՐ ԵՂԱԾ ՍԻՐԱԶԱՐԸ

Դեպքը տեղի է ունեցել 2002 թվականին: Արմավիրի մարզի Արտաշար գյուղի բնակիչ Ս.Մ.-ն տանը մենակ էր ծեր տատիկի հետ: Տղան նստել էր ննջասենյակում և տիսուր մտածում էր իր արգելված սիրո մասին: Ինչ-ինչ հանգամանքներ դեմ էին նրա

սիրուն, և տղան շատ մտահոգ ու տխուր էր: Հանկարծ նրան թվաց, թե դրսից ինչ-որ մեկն իրեն ձայն է տալիս: Դուրս եկավ պատշգամբ: Մթի մեջ նշմարեց մուգ շորեր հագած ինչ-որ մեկի կերպարանքը, որ կանչում էր իրեն: Մարդը հայտնեց, թե փողոցում նրան է սպասում իր սիրած աղջիկը քրոջ հետ: Տղան նույնիսկ անձանոթին չարցրեց, թե ինքն ով է ու հետևեց նրան:

Իսկ անձանոթը նրան հայտնում էր, թե իբր ընկերուհին իրեն կանչել է առերեսման, և զարմացած ու տարակուսած տղան փորձում էր բացատրություններ գտնել: Նա փորձում էր անձանոթին ապացուցել, որ ինքը վատ բան չի արել...

Այդ նույն փողոցով, քրոջ տանից գալիս էր հարեանը: Նա զարմանքով նկատեց, որ պատանին մթի մեջ կարծես զրուցում է ինքն իր հետ: Ինչ-որ մեկին բացատրում, ապացուցում է: Հարեանը մոտեցավ ու տեսավ, որ պատանին իրոք զրուցում է անտեսանելի ինչ-որ մեկի հետ:

-Ո՞ւմ հետ ես խոսում,- հետաքրքրվեց:

Տղայի աչքերը կարծես բացվեցին և զգաց, որ ինքը մենակ է, բայց երբ փորձեց հետ դառնալ տուն, անձանոթը փակեց ճանապարհը և պինդ բռնեց ձեռքից: Սարսափահար եղած տղան նրա ձեռքից մի կերպ պոկեց իր դաստակն ու վագեց տուն: Նրա սարսափն ավելի մեծացավ, երբ զգաց, որ անձանոթը հետապնդում է իրեն և իր հետ մտնում է տուն: Տղան նետվեց ննջասենյակ, փակեց դռւոր, բայց անձանոթը նրան նետեց մահճակալի վրա և սկսեց խեղդել:

Թոռան անմարդկային գոռոցից սարսափահար եղած տատն սկսեց օգնություն կանչել: Հարեանի տանից վագելով եկան ծնողները, բայց տղան նրանց չէր ճանաչում: Իրեն կորցրած մայրը վագեց հորաքրոջ տուն: Հորաքույրներն աստվածավախ կանայք են, նաև՝ դպրոցի Հայ եկեղեցու պատմության ուսուցչուհիներ: Երբ նրանք մտան սենյակ, տղան բոլորի մեջ միայն

նրանց ճանաչեց և խնդրեց, որ նրանցից բացի մյուս բոլորը դուրս գան:

-Այս սկ մարդուն պոկեք կրծքիս վրայից,- Հորաքույրներին խնդրեց նա:

Հասկանալի է, որ տղային բանտել էր չար ուժը և ոչ մի կերպ չէր ցանկանում հանգիստ թողնել: Աղջիկները խնդրեցին բերել տղայի մկրտության խաչը և նրան պատվիրեցին, որ իրենց հետ ասի Տերունական աղոթքը: Սակայն պատանին բառերը մոռացել էր, ոչ մի կերպ հիշել չէր կարողանում: Բավական ժամանակ անցավ, մինչև որ նա կարողացավ հեգել աղոթքի բառերը: Ամեն ինչ նրան տրվում էր դժվարությամբ, և աղոթքն ստացվում էր կցկառուր, հեասպառ, մի կերպ... Աղոթքի ավարտին տղան բացեց աչքերը և հայտնեց.

-Սկ մարդն իջել է կրծքիս վրայից, բայց նստած է ոտքերիս վրա և սպառնում է:

Այդժամ հորաքույրն սկսեց կարդալ Նարեկի ԽԱ գլուխը.

-Որդի Աստուծոյ կենդանւոյ, օրհնյալ Հորդ ահավորի անքնին ծնունդ, որ տկարանա առ ի քեն եւ ոչ ինչ...

Տղան հանգիստ էր, բայց գունատ: Ավարտից հետո նստեց և հայտնեց, թե մարդը գնացել է, բայց սրառնացել է վերադառնալ 40 օրից:

Հորաքը խորհրդով և ուղեկցությամբ հաջորդ օրը պատանին գնաց Սուրբ Սարգիս եկեղեցի, որտեղ Տեր Վարդանը համապատասխան աղոթք կարդաց, և նա վերջապես ազատվեց դեկտանցերից:

ԱՐԱՆԴԱՎՈՐ ԴԻՎԱՅԱՐԻ ԲԺՇԿՈՒԹՅՈՒՆԸ

Դեպքը տեղի է ունեցել 2001 թվականին, Երևանի Հարավ-արևմտյան թաղամասի շենքերից մեկում, որտեղ ապրում էր մի աղանդավոր ընտանիք։ Նրանց որդին Աստվածաշունչը թևի տակ փորձում էր բուժել գյուղից եկած ազգականուհիներին։ Ճիշտ է, ազգականուհիները չէին դժոնհում իրենց առողջությունից, սակայն տղան չէր դադարեցնում իր «Հրաշագործությունները»։ Նա խոսում էր ինչ-որ խառնիճաղանջ լեզվով, ապա փորձում էր ապացուցել, թե ինքը չիսուսն է։

Ազգականները նրան գյուղ տարան՝ մտածելով, թե այնտեղ փոքր-ինչ կհանդարտվի։ Նրանք աղանդավորներ չէին և մտածում էին, թե խաղաղ միջավայրում տղան խելքի կզա։ Բայց գյուղում նրա վիճակն ավելի վատացավ։ Տղան սկսեց թափալվել գետնին, հայհոյել, ապա քարեր հավաքելով՝ սկսեց նետել տարբեր ուղղություններով՝ քշելով ինչ-որ անհայտ ուժերի։

Անհանգստացած ծնողները նրան Երևան բերեցին, հոգեբույժ Հրավիրեցին։ Բժիշկը ոչ մի կերպ չկարողացավ պարզել, թե հիվանդության պատճառն ինչն է։

Բժշկությունից հույսները կտրած՝ նրանք չգիտեին անելիքները։ Վերջապես ազգականուհին խորհուրդ տվեց դիմել քահանային։

-Աղանդավոր երիտասարդների մեջ այդպիսի դեպքերը հազվադեպ չեն,- ասաց քահանան և խոստացավ այցելել հիվանդին։ Երբ հաջորդ օրը քահանան եկավ, տեսավ, որ հիվանդի շուրջը հավաքված են աղանդավոր «Եղբայրները» և իրենց խառնալեզվով աղոթում են։ Սակայն դրանից տղայի վիճակն ավելի է վատանում։ Նա նույնիսկ փորձեց իրեն ցած նետել պատշաճամբից։ Աղանդավորները փորձեցին խանգարել քահանային, նրան թույլ չտալ աղոթք կարդալ։ Նրան դուրս հրավի-

ըեցին: Ի վերջո տղայի հորեղբոր միջամտությամբ քահանային հաջողվեց ազատվել աղանդավորներից: Նա օրհնեց տունը, ապա աղոթեց: Այդ ամբողջ ընթացքում տղան հանդարտված և ուշաղիր հետևում էր քահանային: Ասես գիտակցություն էր գալիս վրան և սկսում էր հասկանալ աղոթքի բովանդակությունը:

Հետո քահանան տանեցիներին ու հիվանդին խորհուրդ տվեց հանապազ աղոթել՝ կարդալով «Նարեկ» և «Կիպրիանոս», քանզի մեկ աղոթքով հնարավոր չէ լիովին առողջացնել նման ծանր դիվահարությամբ տառապող մարդուն:

Քահանան մոտ մեկ շաբաթ ամեն օր այցելեց հիվանդին, աղոթեց նրա համար: Իսկ երկու ամիս անց, երբ տղան դարձյալ դիմեց հոգեբույժի, մեծ եղագ բժշկի զարմանքը, քանզի նախկին հիվանդությունից հետք անդամ չէր մնացել:

Այսօր այդ երիտասարդն ամուսնացած է, ունի շատ լավ ընտանիք և աղանդավորական ախտից հրաժարվելով՝ դարձել է Հայ Առաքելական սուրբ եկեղեցու հետևորդ:

ՀՐԱՅՐ ՍՐԱՊԻՈՆՅԱՆ
Արմավիրի մարզ, գյուղ Արտաշար

ԻՄ ՈՂՋ ՄԵԱԼԸ ՀՐԱՅՐ Է

-Դեռևս մանուկ հասակից ես հավատում եմ Աստծուն,-
այսպես սկսեց իր պատմությունը գոմաձորցի Տոլիկ Մայիլյանը,- պատանի հասակում հրապուրվել էի լուսանկարչությամբ և բազմաթիվ այլ նկարների շարքում սիրում էի Քրիստոսի նկարներ բազմացնել: Եվ Քրիստոսը երկու անդամ ինձ փրկել է ստույգ մահից:

Առաջինը 1994 թվականին էր, երիկամների հիվանդություն ստացա: Սևանում բավական ժամանակ բուժվեցի, հետո գնացի երկան, պրոֆեսորը հետազոտեց, նայեց ինձ:

-Ո՞ւմ հետ ես եկել,- հարցրեց:

-Մենակ եմ,- ասացի.- եթե ասելիք ունեք, ինձ ասացեք, քանի որ ես գիտեմ իմ հիվանդությունը:

-Դե որ այդպես է,- ասաց,- ձեզ ապրելու համար երկու ամիս ժամանակ է մնացել:

Հասկանալի է, թե այդ դեպքում մարդն ինձ զգացմունքներ կունենա: Եկա տուն, մերոնց ոչինչ չասացի, հետո գործով թաթարստան գնացի: Որոշեցի գոնե մի քիչ գումար կուտակել, որպեսզի երեխաներն անհայր մնալիս շատ չխեղճանան: Հենց թաթարստանում էլ, պրոֆեսորի ասած ժամանակ, աջ երիկամս դադարեց գործելուց: Վիճակս անտանելի էր. շտապ օգնության մեքենան եկավ: Հենց այդ ժամանակ էլ զարմանալի տեսիլք տեսա: Տեսա սեփական թաղումը: Տեսա, թե ինչպես ինձ լողացրին, դրեցին դագաղի մեջ, հետո ինձ թաղում էին, և ես ուղեկցում էի սեփական դագաղը: Զէ, կլինիկական մահ չեմ տարել, բայց չգիտեմ, թե դա ինչ էր: Նույնիսկ նայում էի, թե ովքեր են եկել իմ թաղմանը, առանձին մարդկանցից նեղանում էի: Ախր ես այսինչի կամ այնինչի համար այսքան բան եմ արել ու նա իմ թաղմանը չի եկել... Գիտակցությունս տեղն էր, կարծես հիվանդը ես չէի: Ինչեւ: Հասցրին հիվանդանոց, երիկամիս վրայի ուռուցքները մաքրեցին և ես, որ մահամերձ էի, ապրում եմ՝ արդեն 11 տարի:

-Երկրորդ անգամ փրկվեցի այս տարի: Գրեթե մահամերձ պառկած էի «Երեքունի» բժշկական կենտրոնում: Երկու ինֆարկտ էի տարել, արյունս 85 տոկոսով մակարդվել էր: Եկան զանազան պրոֆեսորներ: Նրանցից մեկն առաջարկեց ինձ կենդանացնել, եթե աճուկներից ներքև անդամահատեն զույգ ոտ-

քերս: Պատկերացնում եք, թե դա ինչ վիճակ կլիներ ինձ համար: Հրաժարվեցի, քանզի մահը գերադասելի էր:

Մահամերձ էի, երակներիս մեջ գրեթե արյուն չէր խաղում: Գիշեր էր: Պառկած էի «բռքսում»: Քնած չէի, ցավ չէի զգում, մահվան էի սպասում: Այդ գիշեր մոտս մի բժիշկ նստեց: Հերթապահում էր: Ամեն ինչից երևում էր, որ սպասում էր իմ վերջին, իսկ ես պառկել ու հիշում էի իմ բանակային տարիները: Ես Ադրբեջանից բռնագաղթված եմ: Բանակային տարիներս անց եմ կացրել Հայաստանում, ծառայել եմ Էջմիածինում: Ամեն կիրակի գնում էի Մայր տաճար, Պատարագին մասնակցելու: Մի անգամ նույնիսկ հրամանատարներն ինձ խիստ նկատողություն տվեցին եկեղեցի գնալու համար, սակայն հո մարդու հոգուն չե՞ս հրամայի: Հիշում էի այդ օրերը...

Ապրեցի մինչև առավոտ: Առավոտյան հերթապահ բժիշկը գնալուց առաջ նայեց ինձ ու.

-Ո՞վ գիտե, գուցե թե բախտդ բերի,- ասաց,- աշխարհում բժշկությունն ամեն ինչ չի կարող բացատրել և ամեն ինչ չի կարող բուժել:

Գնաց, իսկ ես պառկած եմ: Մենակ չեմ, նաև ուրիշ հիվադներ կան, որոնք նույնպես ծանր վիճակում են: Հանկարծ մի ձայն եմ լսում: Զայնը հաստատ այս երկրային չէր: Հանդարտ էր, հակտակ: Ես խոսողին չէի տեսնում, բայց գիտեի, որ ասում են ինձ համար:

-Հինգ րոպե հետո այս մահճակալին պառկած ծերունին պիտի մեռնի, դրանից հետո մյուս մահճակալին պառկած տղամարդը, հետո հերթը քո մահճակալինն է:

Չի ասում «Հերթը քոնն է», ասում է «Քո մահճակալինն է»:

Այդ ժամանակ ես ուշադրություն չդարձրեցի այդ նրբերանգի վրա, բայց չանցած հինգ րոպե, պալատում պառկած ծե-

բունին մահացավ: Մի տաս բոպե անց մահացավ նաև մյուս մահճակալին պառկած տղամարդը: Հերթը կարծես թե «իմ մահճակալինն» էր: Այդ ժամանակ առանց տեղյակ լինելու իմ լսած ձայնի մասին, մերոնք մասնագետ բերեցին, որը համապատասխան զոնդով պիտի մաքրեր խցանված երակներս:

-Ախր արդեն երրորդ անգամն եք ինձ բերում այս հիվանդի մոտ,- դժգոհեց նա,- ես ոչ մի հնարավորություն չունեմ նրան օգնելու: Ցույց տվեք գոնե մի երակ, որ ես կարողանամ աշխատել:

Մի խոսքով, որոշեցին դարձյալ ինձ տանել տոմոգրաֆիայի: Տարան, ստուգեցին: Ի՞նչ պարզեցին, չգիտեմ, բայց ետ բերեցին «բոքս»: Տեսա՝ իմ մահճակալին ուրիշ հիվանդ է պառկած: Ինձնից ավելի ծանր վիճակում գտնվող մի կին էր: Եվ՝ մահացավ նա: Ախր ինձ ասել էին. «Հերթն այս մահճակալինն է»...

Տեսնելով, որ չեմ մեռնում, ինձ «բոքսից» պալատ տեղափոխեցին: Արյունս՝ քարացած կամ լերդացած, ինչպես կուզեք՝ ասեք, վիճակս՝ դարձյալ անհուսալի: Պառկած եմ մահճակալին և հանկարծ զգում եմ, որ թես թացանում է: Չեմ հասկանում՝ ինչ է, հետո մի կերպ գուխս թեքում եմ և տեսնում, որ թեկիս մեջ դրած խողովակից (կաղետը) արյունը կաթում է գետնին: Իմ լերդացած արյունը, որ ուր որ է սրտի կանգի պատճառ էր դառնալու, սկսել է ջրիկանալ: Աստծո հրաշք չէ՞, ի՞նչ է հապա: Տեսնելով այդ բժիշկներն իրար խառվեցին՝ նորից սկսեցին պայքարել կյանքիս համար, բայց այս անգամ արդեն հաստատ հույս ունենալով, որ փրկվելու եմ:

Ամեն մարդու չեմ պատմում այս: Շատերը չեն հավատում, ոմանք կասկածանքով են լսում իմ պատմությունը, սակայն ես հոգիտե՞մ, որ վերևում Աստված կա և նա է որոշում, թե ում տանի և երբ տանի:

ՍԵՎ ԽԱՉԵՐ՝

ՍՊԻՏԱԿ ՎԵՐՆԱԾԱՊԻԿԻ ՎՐԱ

2005 թվականի խաչերացին հաջորդող մեռելոցի օրն էր: Սովորականի նման գնացի դասի: Ինձ մոտեցավ հինգերորդ դասարանի աշակերտուհիներիցս մեկը՝ Մտելլա Հունանյանը և վերնաշապիկը ցույց տալով՝ ասաց:

-Գիտե՞ք ինչ է եղել:

-Ի՞նչ,- հետաքրքրվեցի ես:

-Երեկ մայրս լվաց վերնաշապիկս և վրան սև խաչեր հայտնվեցին: Մտածեցինք՝ երեկի ինչ-որ մեկը չարաճճիություն է արել, կամ գուցե թե փոած տեղը ծիտիկներն են կանգնել վրան: Մայրս նորից լվաց վերնաշապիկը և... այ քեզ հրաշք, խաչերը ոչ թե վերացան, այլ ավելացան: Հիմա արդեն սպիտակ կտորը զարդարող սև խաչեր կային վերնաշապիկի ոչ միայն կրծքի ու թիկունքի, այլ նաև թեերի վրա:

Դա քիմիական կամ որևէ բնական նյութ չէր, այլ անհայտ մի բան: Ասես նույն ձեռագիրն էր գրել դրանք: Թե՛ աղջիկը, թե՛ շրջապատի մարդիկ և թե՛ ես հավատում ենք, որ այդ խաչերն անձեռակերտ են և մեզ հիշեցնում են խաչի սուրբ խորհուրդը և խաչյալի մշտական կենդանի ներկայությունը նրան հավատացողների կյանքում:

ԶՆԱՐԻԿ ԶՈՂԱՐՅԱՆ

Գեղարքումիքի մարզի Լճաշենի միջնակարգ դպրոցի
Հայ եկեղեցու պատմության ուսուցուիչի

ԻՆՉՈՒ ԵՐ ԾԵՐՈՒՏԻՆ ՊԱՏՎԻՐՈՒՄ ՄԱՏԱԴ ԱՆԵԼ

Երբ ավարտեցի Խ. Աբովյանի անվան մանկավարժական ինստիտուտը, ինձ նշանակեցին Ապարանի շրջանի խուլ գյուղերից մեկում աշխատելու: Զէի ցանկանում գնալ այդ քրդաբնակ գյուղը, չատ էի մտածում այդ մասին: Գիշերվա մի ժամի աչքերս բացեցի և տեսա մի սկամորթ մարդու: Կանգնել էր ու ձեռքին բռնած տեր ողորմյան էր քաշում: Ճիշտն ասած մտքովս անցավ, թե մուացել, դուռը բաց եմ թողել և օտար մարդ է մտել տունը: Վախեցա: Սակայն դրսից մի ձայն լսվեց, ինչ-որ մեկը, որ սպիտակ շորեր էր հագել և երկար, սպիտակ մորուք ուներ, դիմեց սև մարդուն.

-Հապա դուրս արի այդտեղից:

Իմ զարմացած հայացքի տակ սև մարդը դուրս եկավ սենյակից ու նրա փոխարեն ներս մտավ սպիտակ ծերունին: Նա եկավ, կռացավ մահճակալիս վրա և ժպտալով ասաց.

-Աղջիկ ջան, եթե ուզում ես, որ քո գործերին հաջողություն լինի և եղբայրդ անփորձանք մնա, պիտի գնաս Դարալագյազ և մատաղ անես այնտեղ:

Այլևս քնել չկարողացա մինչև առավոտ: Առավոտյան տեսիլքի մասին պատմեցի եղբորս կնոջը և մեքենա վարձելով՝ գնացինք եղեգնաձոր: «Սուրբ Խաչ» եկեղեցում մատաղ արեցինք, վերադարձանք տուն: Երկու օր հետո նախարարությունից նամակ ստացա, որի մեջ հայտնում էին, որ ինձ գործուղել են Մասիսի շրջանում աշխատելու: Բացի այդ, եղբայրս մատաղ անելու օրը Երևանում չլինելու պատճառով ազատվել էր չատ մեծ փորձանքից:

Ավելացնեմ, որ այդ հրաշք տեսիլքը տեսել եմ 1979 թվականի հոկտեմբերի 11-ին:

ԻՆՉՊԵՍ ՀՐԱԺԱՐՎԵՑԻ ՍԵՎ ՄՈԳՈՒԹՅԱՆ ՄԱՍԻՆ ԳՐՔԵՐԻՑ

1998 թվականի սեպտեմբերի 13-ին էր: Երևանի մետրոյի Երիտասարդական կայարանի գրավաճառի մոտ մի գիրք տեսա՝ «Սև մոգություն» վերտառությամբ: Շատ հետաքրքրեց և առանց հետևանքներին հասու լինելու գնեցի: Հետաքրքիր էր: Ինչքան չլինի՝ գաղտնի գիտելիքներ է պարունակում: Սակայն գրքի ընթերցանության ժամանակ վախի մի ահավոր հարված ստացա: Գիրքը կարդալիս մի ահավոր հոգեկան վիճակի մեջ ընկայ: Թվում էր, այլևս ինքս ինձ գտնել չեմ կարողանալու, սակայն մի ձայն, որ գալիս էր իմ ներսից, ասես ուղղություն էր ցույց տալիս ինձ:

«Քեզ մի՞ կորցրու», - ասես մեկը շշնջում էր իմ ականջին:

Այդ ձայնի թելադրանքով ես ցանկացա ձեռքս առնել Աստվածաշունչը: Ես տանը նոր կտակարան ունեի, սակայն որքան էլ զարմանալի էր, փնտրեցի ու չգտա այն: Զեռքս առա Մանկական Աստվածաշունչն ու սկսեցի ագահորեն կարդալ այն:

Առավոտյան վիճակս նորից վատացավ: Կարծեցի՝ աշխարհի վերջն է: Այդ ժամանակ նորից նույն ձայնն ինձ հրամայեց, որ տանը որքան մոգական գրականություն կա, այրեմ:

«Դրանք հանիր տանից և թող ամուսինդ ու տղադ այրեն», - ասում էր այդ ձայնն ինձ: Գրքերը դանդաղորեն էին այրվում: Գրեթե մեկ ժամ տևեց, մինչև դրանք կրակի բաժին դարձան: Այդ օրը տեսիլքի մեջ տեսա Աստվածամորը՝ որ երևաց կիսագեմով, արծաթափայլ կամարների մեջ և լսեցի, թե ինչպես նույն ձայնն ասում է. «Քո հոգանավորն Աստվածամայրն է: Մի վախենա, քեզ ոչինչ չի պատահի»:

Եվ իրոք, որոշ ժամանակ անց ինձ մոտ ամեն ինչ կարգավորվեց, սակայն այդ ամենի բացատրության կարիք էի զգում: Զգում էի, որ հոգեւոր իմաստով անգրագետ եմ: Սկսեցի եկեղեցի

Հաճախել, մասնակցել Սուրբ Պատարագներին, երգել եկեղեցու երգչախմբում... Փառք Տիրոջը, որ ինձ խղճաց և բացեց իմ հոգեոր աչքերը:

ԻՆՉՊԵՍ ՏԵՍԱ ՔՐԻՍՏՈՍԻՆ

2005 թվականի հունվարի 30-ի առավոտյան էր: Իմ ննջարանի պատուհանի մոտ մի հրե գունդ տեսա: Կարծես արեգակն իջած լիներ այդտեղ: Հետո աչքերիս առաջ յոթ գույներ բացվեցին աննկարագրելի պայծառությամբ և այդ լուսերի մեջ հայտնվեց Տեր Հիսուս Քրիստոսը, որը վարդագույն թիկնոց ուներ և աղոթում էր:

ՈՒՐ ԿՈՐԱՆ ՈՒՌՈՒՑՔՆԵՐԸ

2000 թվականի մայիսի 30-ին Մամոգրաֆիայի կենտրոնում ստուգման ենթարկվեցի: Բժիշկները տարբեր մեծության մի քանի ուռուցքներ հայտնաբերեցին և առաջարկեցին անհապաղ վիրահատել: Իհարկե, հրաժարվեցի և ապավինեցի Աստծուն: Այսօր այդ ուռուցքների հետքն անդամ չկա: Ինչո՞ւ հրաժարվեցի: Շատ պարզ պատճառով: Մի՞թե մեռած Ղազարոսին հարություն տվող Աստված չէր բուժի իմ ցավերը:

* * *

Իմ կյանքում մանր ու մեծ այլ հրաշքներ նույնպես եղել են: Ես հիմա գիտեմ, որ նախքան Տիրոջը ճանաչելը ես ինձ էլ չեմ ճանաչել: Եվ եթե տարիներ առաջ մեկն ինձ ասեր, թե իմ կյանքը այսպես կփոխվի, չէի հավատա:

ՎԵՆԵՐԱ ԶԱՔԱՐՅԱՆ

Մասիսի քաղաքապետարանի մշակույթի
և սոցիալական բաժնի աշխատակցութի

Ո՞Վ ԵՐ ԻՆՉ ՏԱՆՈՂԸ

1999 կամ 2000 թվականի օգոստոսն էր: Աշխատում էինք Ռուսաստանի Կրասնոյարսկի երկրամասի Ատամանովկա գյուղում: Ամեն տարի օգոստոսի երկրորդ կիրակի օրը նշվում է Շինարարների օրը: Այդ անգամ էլ նշեցինք: Ճիշտն ասած ես խմել չեմ սիրում և մշտապես բավարարվում եմ մեկ-երկու բաժակով: Այդ անգամ նույնպես մե՞կ, թե՞ երկու բաժակ շամպայն խմեցի: Ավարտվեց զբոսախնջույքը, եկա հանրակացարան: Փորձեցի պառկել, մի քիչ հանգստանալ, սակայն զգացի, որ վատ եմ զգում: Աչքիս սկսեցին երեալ տարբեր էակներ: Նրանք սև էին հագել, մի տեսակ վախենալու էին և քաշում էին թեկիցս, թե՝ արի:

Եթե չար ուժեր են հարձակվում վրադ, անմիջապես զգում ես այդ ու հասկանում, որ նրանք այս աշխարհից չեն և քեզ լավ տեղ չեն տանում: Դրանց մեջ հատկապես աչքի էր ընկնում մեկը, որ մեռած պապիս կերպարանքն ուներ.

-Արի,-քաշում էր թեկիցս,- արի տանեմ:

-Ո՞ւր գամ,- լալիս էի,- ես ախր շատ երիտասարդ եմ:

Շրջապատի մարդիկ գիտեին, որ ես խմող չեմ և իմ վատ զգալը ալկոհոլի արդյունք չէ: Տեսնում են, որ շատ վատ եմ ու լուրը հասցնում են եղբօրս, որը նույն դյուզում էր: Լսելով այդ մասին նա վազելով հասնում է: Այն եմ հիշում, որ նա ինձ համոզում էր, ամեն կերպ ցանկանում դուրս բերել այդ վիճակից: Զնայած պետք է խոստովանեմ, որ թե՛ նա, թե՛ ես հոգեոր գիտությունից հեռու էինք և նույնիսկ մկրտված չէինք: Բժիշկ են բերում, սրսկում ու ինձ հազիվ հանում են այդ վիճակից:

Բժշկական ինչ տերմին ուղում ես, օգտագործիր, միևնույնն է, ես հասկացա, որ ինձ հետ պատահածը հիվանդություն չէր, իսկ եթե հիվանդություն էլ էր, ապա՝ հոգեոր: Այդ վիճակից ել-

նելուց հետո ես ուխտ արեցի Հայաստան գալուս պես մկրտվել:
Եվ կատարեցի ուխտս:

ՐԱՐՈՒԹՅՈՒՆ ԲԵԳԼԱՐՅԱՆ
Լոռվա մարզ, գ. Լեռնավաճ

ՄԱՐՄԵԴԱԿԱՆԻ ՄԿՐՏՈՒԹՅՈՒՆԸ

Սիրիայի Զուք գյուղում ապրող ալառու ուղղության պատկանող մի մարդ, որի անունը Հասան էր, յոթ տարի զավակ չէր ունենում: Երկար մտածելուց հետո նա որոշում է, որ իրեն զավակ կարող է պարզեցն միայն Քրիստոսը և երդվում է զավակ ունենալու դեպքում նրան մկրտել քրիստոնեական կարգով:

Աստված լսում է նրա աղերսանքն ու ուխտը, և Հասանը երկու տարի անց զավակ է ունենում: Սակայն մահմեդական գյուղում որտեղից հայ քահանա, որ Հասանը մկրտել տա իր զավակին: Տեսնելով այս՝ նա վերցնում է երեխային, գնում գետ և նրան երեք անգամ ջրի մեջ թաթախելով՝ ասում:

-Ինչպես որ հայ քահանան է ասում մկրտության ժամանակ և ավելի:

Մեկ տարի անց քրիստոնյա ուխտավորների մի խումբ էր անցնում իրենց գյուղից և գնում դեպի Մարմադիա, ուր գտնվում էր Սուրբ Աստվածածին եկեղեցին: Հասանը տեսնելով, որ նրանց հետ քահանա կա, մոտեցավ նրան և խնդրեց, որ նա իր որդուն մկրտի՝ ինչպես պահանջում է քրիստոնեության օրենքը: Ուխտավորները և քահանան նրան առաջարկեցին միանալ իրենց և գնալ Սուրբ Աստվածածին, որտեղ էլ կմկրտեն երեխային:

Երբ Հասան եկեղեցի, քահանան պատրաստվեց մկրտության, բայց հազիվ էր սկսել մկրտության շարականը, երբ ավա-

գանի ջուրն սկսեց եռալ, և ապշահար քահանան մի ձայն լսեց, որն ասում էր, թե երեխան իր հոր հավատով արդեն մկրտված է:

Զարմացած ներկաներին Հասանը պատմեց ողջ եղելությունը: Բոլորը փառք տվեցին Աստծուն նրա կատարած հրաշքի համար:

ՄԱՐԴՈՒ ՅԱՐՈՒԹՅՈՒՆԸ

Այս դեպքը տեղի է ունեցել 1994 թվականին Սիրիայում՝ Դամասկոս քաղաքի Տուելա փողոցում: Այդ փողոցում ապրող 48 տարեկան բարեպաշտ մի մարդ մահացավ: Եվ քանի որ հավատացյալ քրիստոնյա էր, տարան եկեղեցի և դրեցին Խորանի առաջ, բայց երբ քահանան սկսեց թաղման կարգ կատարել, նա վեր կացավ ու նստեց դագաղում:

- Տեսա Քրիստոսին նստած իշխանության Աթոռի վրա, - ասաց նա, - Նա ինձ պատվիրեց գնալ Հորան նահանգի գյուղերից մեկը, որտեղ մի մարդ կա և անընդհատ հալածում է Քրիստոսին: Նա ինձ պատվիրեց, որ գնամ և նրան ետ կանգնեցնեմ իր չար գործերից, իսկ երեք օրից հետո պիտի մեռնեմ նորից:

Մարդիկ մի պահ չհավատացին նրա ասածին, բայց նա վեր կացավ, գնաց Տիրոջ պատվիած տեղը, հետո վերադարձավ: Երրորդ օրվա երեկոյան իր բարեկամների և ընտանիքի անդամների հետ ճաշեց, ապա ննջեց ի Քրիստոս:

ՏԻՐԱՍՈՐ ՆԿԱՐԸ

Մի պառավ կին ցանկացավ Սուրբ Աստվածամոր վանքին մի թիթեղ ձեթ նվիրել: Նա ուխտ էր արել իր ոտքով բարձրանալ մինչև վերև՝ մոտ 150 աստիճան, դրա համար էլ թիթեղը շալակեց և սկսեց բարձրանալ, սակայն մինչև կեսին հասավ, հոգնեց: Թիթեղը դրեց աստիճանների վրա, բայց ամանից մի քիչ ձեթ ծո-

բաց: Շուտով ձեթը ներծծվեց և երևաց Սուրբ Աստվածածնի նկարը: Զարմացած կինը շարունակեց ճանապարհը, հասավ վանք և վանահորը պատմեց եղելությունը: Հոգեորականներն իջան, տեսան նկարը և որոշեցին այն շրջապատել փոքրիկ պատով: Մինչև այժմ էլ կա նկարը: Եթե փորձես մատով կպչել այդ տեղին, կթվա, թե ձեթ է բխում:

ԱՐՁԿԱ ԲՈՒԺՈՒՄԸ

Միրիայի Սերմայա վանք եկավ անդամալույծ մի աղջիկ: Նա Հորդանանից էր և եկել էր բուժվելու հավատով: Նա քահանայի առաջ կարդաց «Հավատամքը», ստացավ նրա օրհնությունը, հետո, ի զարմանս ներկաների և հատկապես իրեն ճանաչողների, կանգնեց սեփական ոտքերի վրա և սկսեց քայլել: Նա իր անդամալույծի սայլակն ու Հենակները թողեց վանքում: Դրանք մինչև օրս էլ պահպում են այնտեղ: Պահպանվում է նաև աղջկա ձեռքով գրված վկայությունը իր հրաշալի բուժման մասին:

ԹՈՎՄԱՆ ՄԱՐՏԻԿՅԱՆ
Սիրիա, Դամասկոս

ՀԱՎԱՏԱ ԵՎ ԿՓՐԿՎԵՍ

2004 թվականի աշնանն էր: Քրոջս տղան Մոսկվա պիտի գնար: Շատ վաղ պիտի դուրս գար Աւանից՝ ժամանակին օդանավակայան համելու համար: Այդ էր պատճառը, որ ցայգալույսին դուրս եկա մեր տանից, որպեսզի գնամ նրան ճանապարհելու: Իսկ նրանց տունը մեր տանից մի թաղամաս այն կողմ է և ուղեկցողի կարիք չկար: Դուրս եկա տանից, մեր շենքից մի քիչ հեռացա և թափառող շների ոհմակը շրջապատեց ինձ: Հաշում են կատաղած, կարմրած աչքերով նայում են ինձ: Թվում է՝ ուր որ է պատառ-պատառ են անելու:

Դա այն ժամանակն էր, երբ դեռ նոր-նոր էի եկեղեցի գնում: Շատ էի աղոթում, քանզի վերջապես հասկացել էր, որ մարդու հույս-ապավենն Աստված է:

Ծների հարձակումը տեսնելով՝ ես մեխեցի տեղումս: Նրանք շրջապատեցին ինձ ու սկսեցին հաչել: Ես համրացած նայեցի շուրջս, բայց փողոցում ոչ ոք չկար:

-Տեր Աստված,- մրմնջացի ես,- մի մարդ չկա՞՝, որ օգնի ...

Շուրջերիս շարժումը տեսնելով շներն ավելի գազագեցին և հատկապես՝ նրանց առաջնորդ գամփոր: Տեսնելով դա՝ ես սարսափած շշնջացի.

-Տեր Աստված, Դո՛ւ փրկիր ինձ:

Եվ, այ քեզ հրաշք, ասես մի անտես հրամանի ենթարկվելով՝ շները հեռացան: Կանոնավոր շարք կազմած գնացին նախ մյուսները, իսկ ամենավերջում՝ գամփոր:

Հիմա, տարիներ անց մտածում եմ. իզուր չէ, որ ասել են. «Հավատա և կփրկվես»:

ԱՐԱՔՅՈՅՎԱՐՈՒՄ

Ք. Սևաճ

ԻՄ ՅՐԱԾՔԸ

Երեկոյան քնելուց առաջ սիրում եմ առանձնանալ, որպեսզի տեղի ունենա իմ հոգու հանդիպումն Աստծո հետ, որը կայանում է միայն առանձնական աղոթքի միջոցով: Աստծո Արքայությունը խնդրելուց, ինչպես նաև իմ կյանքում նորանոր հաջողություններ ունենալու համար հոգուս խորքում կուտակված մի շարք ցանկություններ կատարելու աղերսանքով Բարձրյալ Աստծուն դիմելուց հետո ցանկանում եմ, որպեսզի աստվածային առաջնորդությամբ բոլորը հասնեն իրենց բարի նպատակների իրականացմանը: Հավատում եմ, որ մեր խնդրանքն Աստված ի-

ըականացնում է համաձայն իր խոսքի. «Եթե ձեզանից երկուսը միաբանվեն երկրի վրա որևէ խնդրանքի համար, ինչ էլ որ խնդրեն, կկատարվի նրանց համար իմ Հոր կողմից, որ երկնքում է, որովհետև ուր երկու կամ երեք Հոգի հավաքված լինեն իմ անունով, այնտեղ եմ ես, նրանց մեջ» (Մատթ., 18.19):

Աղոթքս ուղեկցվում է նաև Ավետարանական ընթերցում-ներով, որը նպաստում է աղոթական բարձրագույն վիճակին հասնելուն: Դրա արդյունքը կարող է լինել նաև երազը կամ տեսիլքը: Իմ կյանքում դա կարելի է որակել որպես Աստվածատեսություն:

Այդ օրը նույնպես աղոթքս ավարտելուց հետո գնացի քնելու: Բավական խոր քնի մեջ երազ կամ տեսիլք տեսա: Տեսա մի կամուրջ, որի հակառակ կողմից Աստված ինձ ձայն էր տալիս. «Արթուր, արի ինձ մոտա»: Հետեւ ով ձայնի ուղղությանը՝ առաջ գնացի կամուրջի վրայով, սակայն դեռ վերջին չհասած՝ բազալտե սալիկներով երեսպատված մի եկեղեցի նշմարվեց: Այն ամբողջությամբ պատված էր ամպերով՝ կարծես խորհրդաշնելով Աստծո փառքը:

Եկեղեցու առաջ երկար, սպիտակ շապիկով կամգնած էր Հայր Աստված: Նա, ինձ մոտ կանչելով, ասաց. «Ինչ որ կյանքում ցանկանաս, ես կտամ քեզ»: Նախ զարմացա այս խոսքերից, ապա՝ շփոթեցի, փորձեցի հասկանալ Նրա այդ ասածի իմաստը: Սակայն այդ պահին ոչինչ հասկանալ չկարողացա և քնից արթնացա:

Ինձ համար դա հրաշք էր, քանզի հրաշալի զգացողությունն էր. ինչ-որ շատ մեծ ու շատ լավ մի բանի հաղորդակից լինելու զգացողություն, որը ոչ մի բանի հետ համեմատելի չէ և նկարագրել չի լինի մարդկային բառերով:

Այդ երազ-տեսիլքից անցել է մի քանի տարի, և կատարվել են իմ մի քանի ցանկությունները՝ կապված իմ հոգեոր կյանքի, աստվածաբանության ասպարեզում իմ կողմից կատարվող ու-

սումնասիրությունների, ինչպես նաև իմ անձնական հավատքի դաշտում ձեռք բերած հաջողությունների հետ։ Դրանք յուրա-տեսակ խթան են հանդիսանում առավելագույնս ընկղմվելու աստվածաճանաչողության մեջ։ Դա Հնարավորություն է տալիս ավելի մերձենալ մեր Տեր Հիսուս Քրիստոսին, ապա՝ փառավորել և խոստովանել Սուրբ Երրորդությանը, Գրիգոր Լուսավորչի խոստովանանքի համաձայն, թե. «Իսկ մեք փառաւորեսցուք, որ յառաջ քան զյավիտեանս, երկիր պագանելով Սրբոյ Երրորդութեանն եւ միոյ Աստուածութեանն՝ Հօր եւ Որդւոյ եւ Հոգւոյն Սրբոյ, այժմ եւ միշտ եւ յավիտեանս յավիտենից. ամեն»։

ԱՐԹՈՒՐ ՀԱԿՈԲՅԱՆ
Աստվածաբանության մագիստրոս

ՏԻՐԱՄՈՐ ՀՐԱՃԱԼԻ ԵՐԵՎՈՒՄԵՐԸ ԽՈՐ ՎԻՐԱՊՈՒՄ

1990թ. մայիսի 21-ին ես տեսա Տիրամորը։ Բայց նախքան բուն պատմությանն անցնելը փորձեմ նախապատմությունը տալ։ Երբ 1988թ. երկրաշարժից հետո Տիրամայրը երևաց Մասիսի շրջանի Սայաթ Նովա գյուղում, և մարդիկ ուղղակի հերթ էին կանգնում, որ մտնեն ու տեսնեն, ես ինքս շատ վրդովված էի և ասում էի, թե մի՞թե հավատը նշաններով է։ Բայց ես չէի հասկանում, որ այդ երևումները ոչ թե տեսնել-հավատալու համար են, այլ ինչպես աղոթքով են հաղորդ լինում Տիրոջը, այնպես էլ այս ձեռով։ Սա էլ Աստծո հետ հաղորդակցվելու մի ձև է։ Այո, արտակարգ իրավիճակներում, երբ իր զավակներին մեծ վտանգ է սպառնում, Աստված իր առավել մեծ հայտնությամբ է ներկայանում, և երկնային դռները բացվում են։ Դոներ, որոնք սովորական ժամանակ չեն բացվում։

1990 թվականին Հայաստանը շատ ծանր վիճակում էր։ Շրջափակում, էլեկտրաէներգիայի հոգհարային անջատումներ,

ցուրտ, հացի պակաս... Ահա այս ժամանակ ես Տիրամորը խնդրեցի, որ երևա ինձ ու զորավիր լինի: Եթե 1988 թ. չէի հավատում երևումին ու մերժում էի, հիմա ինքս էի խնդրում: Ես շատ եմ սիրում Նրան, որպես մաքրության, համեստության և սրբության տիպար, և նա շատ անգամ է օգնել ինձ:

Խնդրեցի. «Տիրամայր, ես կարողել եմ քեզ: Մարդկային այս տառապանքների մեջ իրապես ես Քո մայրական գուրգուրանքի կարիքն ունեմ: Շատ եմ ափսոսում, որ չեմ եկել Սայաթ Նովա ու չեմ հանդիպել Քեզ»: Եվ, զարմանալի բան: Մի քանի օր անց իմ աշխատակցուհիներից մեկը, որ ապրում է Խոր Վիրապի գյուղերից մեկում, հայտնեց, թե մի քանի օր առաջ (մարտի 15-ից հետո) ժամը 13 անց կեսից մինչև ժամը 16-ը ամբողջ ճանանչով նախ Մասիսն է ողողվել և ապա շրջակա գյուղերից բոլոր տեսել են Տիրամոր պատկերը երկնքում: Այնքան հզոր է եղել լույսը, որ ոմանք կարծել են, թե Թուրքիայի սահմանից են ինչ-որ բան թողել Հայաստանի վրա:

Ես աշխատակցուհու բան չասացի, բայց մտածեցի, թե Աստված նրա միջոցով հայտնեց ինձ: Սակայն մտածում էի. «Լավ, ես իմացա, բայց ինչպե՞ս հասնեմ Խոր վիրապ»: Դա այն ժամանակն էր, որ բենգին չկար, ավտոմեքենաները կանգնած էին: Ես սրտագին խնդրեցի Տիրամորը, որ օգնի: Եվ, զարմանալի բան՝ ուղիղ 5 անգամ, առանց գումար ծախսելու ես գնացի և եկա:

Առաջին հանդիպումը շատ զարմանալի էր: Քանի որ շատ հեռուն չեմ տեսնում, մտածում էի, թե ինչպե՞ս պիտի նշմարեմ: Անմիտ էի, չգիտեի, որ երբ հոգու աչքերով ես տեսնում, մարմնի աչքերը ոչինչ են: Հասանք տեղ և հայացքս Մասիսին հառեցի: Ոչ մի բան չկար: Մտանք եկեղեցի, աղոթեցինք, մոմ վառեցինք: Ժամը մոտ 16-ն անց կես էր, երբ հասանք: Ուղեկիցներս գուրս եկան, և ես նեղվեցի՝ մտածելով. «Երեսի ես արժանի չեմ, որ Դու ինձ երևաս, Տիրամայր»: Ուղեկիցներս ակնապիշ նայում էին

Մասիսին: Ես դարձյալ մտա եկեղեցի և մոմովաճառից երգելու թույլտվություն խնդրեցի: Սկսեցի փառաբանության երգեր երգել: Արդեն պիտի վերջացնեի, երբ նկատեցի, որ ուղեկիցներս ներս մտան և մի տեսակ այլայլված են:

Երգս ավարտեցի, դուրս եկա և ապշեցի: Ամբողջ Մասիսը պատվել էր աներկրային լույսով, ամպերը մի կողմ էին գնացել և այդ լույսից աչքերդ չէին կկոցվում: Լույսն այդ մաքրամաքուր ու ոչ սովորական էր:

-Շնորհակալ եմ,- շշնջացի,- այս լույսի համար էլ եմ շնորհակալ:

Արդեն ժամանակն էր դուրս գալու, որովհետեւ պետք է վանքի դարպասը փակեին: Բայց ես և ուղեկիցներիցս մեկը ոտքներս կախ էինք գցել: Եվ հանկարծ երեաց, խոշորացավ նախ ուրվագծով, ապա՝ ավելի ու ավելի հստակ: Այստեղ հասկացա այն, որ ասում են՝ մտքովդ անց կացըիր՝ արդեն գործեցիր: Տիրամոր ոտքերի մոտ կիսալուսին էր ուրվագծվում: «Սա երեկ այն կիսալուսինն է, որի մասին ասվում է Հայտնության գրքում. «Եվ երկնքում մեծ նշան երեաց. մի կին արեգակն իր վրա առած, լուսինն՝ իր ոտքերի տակ և իր գլխի վրա մի պսակ՝ տասներկու աստղերից» (Հայտնություն 12.1):

Սակայն դեռևս չէի արտաքերել, հազիվ անցել էր մտքովս, երբ Տիրամոր պատկերը մի քանի անգամ խոշորացավ և հստակ երեաց կիսալուսինը: Կարծես նա հաստատում էր, որ ճիշտ եմ մտածում: Եվ ապա երեաց Հայր Աստծո գահը ճերմակաթույր լույսերի մեջ, որը բառերով նկարագրել անկարող եմ: Նա նստած էր կիսադեմով: Տիրամայրը գնում ու գալիս էր: «Երեկի նա նկատի ունի, որ ինքը բարեխո՞ս է մարդկանց և Աստծո միջև», - մտածեցի ես, և Տիրամայրն իր ընթացքն ավելի արագացրեց, ասես հաստատելով իմ միտքը:

Ապա Մասսյաց գագաթին երեաց մի մեծ խաչ: Մեծ, սև խաչ, որ կարծես ասում էր, որ ծանր նեղությունների միջով պի-

տի անցնենք, բայց Աստված պահապան է մեզ: Խաչի գորության քաջալերանքն զգում էինք առարկայորեն:

Արդեն ուշ էր: Սահմանապահները նկատել էին, որ մենք ակնապիշ նայում ենք Մասիսին և մեզ վրա լույսեր էին գցում, նաև վերը նշված դարպասի փակվելու ժամանակը վաղուց էր անցել: Մենք ստիպված էինք հեռանալ:

Ամբողջ սիրտ ու հոգիդ կապված է Մասիսին և նրա վրա երեացող Սուրբ Պատկերին: Դու կարծես հասկանում ես, թե Պայծառակերպության ժամանակ Պետրոսն ինչո՞ւ էր ասում. «Տեր, լավ է, որ մենք այստեղ ենք. եթե կամենաս, երեք տաղավարներ շինենք...» (Մատթ., 17.4):

Զէի ցանկանում վերադառնալ քաղաք, քանի որ այնտեղ՝ իսր Վիրապում Աստվածածնի ներկայությունն էր: Հետո երբ գնում էինք, նորից ողջ հասակով երեաց Տիրամայրը, որ կարծես ուղեկցում էր մեզ: Եվ նրանից սեր էր ճառագում: Մեծ, մաքուր, գեղեցիկ մայրական սեր:

Եվ ես հասկացա, որ անսպասելիությունից ես նույնիսկ չեմ խոնարհել Նրան: Փնտրեցի և գտա Նարեկացու՝ Տիրամորը նվիրված աղոթքը: Եվ երբ հաջորդ անգամ գնացինք, ես իսր Վիրապի պարապի տակ ծունկի եկա ու կարդացի այն:

Այս անգամ նորից տեսանք Նրան՝ մանկան հետ, կիսալուսնի ուղեկցությամբ: Հետո սև ձիավոր անցավ: Ավելի ուշ իմացանք, որ դա սուրբ Գևորգն էր:

Դրանից հետո մղում առաջացավ Նորագավթի «Սուրբ Գևորգ» եկեղեցի գնալու: Սուրբ Գևորգի տոնին Նորագավթի «Սուրբ Գևորգ» եկեղեցի գնացինք նույն խմբով և բոլորս մեկ մարդու նման կանգնեցինք այն նկարի առջև, ուր պատկերված է Տիրամայրը: Դա ասես նույն պատկերն էր, ինչ մենք տեսել էինք Մասսայց գագաթին:

Այս ամենից հետո ես կարծես թե հասկացա, որ Տիրամայրն ուղղում է պատվեր տալ ինձ: Հաջորդ երկման ժամանակ նա օվալաձև ամպի սյունով պոկվեց, կտրեց, անցավ Մասիսի ստորոտի հովիտը և մոտենում էր ինձ: Ես շնչահեղձ եղա: Երկի թե պատրաստ չէի: Նա զգաց այդ և հուշիկ հեռացավ մյուս ուղղությամբ:

Ես վշտացա, քանզի ի զորու չեղա Նրա պատգամն ընդունելու: Բայց նա այն ինձ հաղորդելու այլ ձեեր գտավ: Մի քանի տարի անց իմ ձեռքն ընկավ «Տիրամոր երկումները 20-րդ դարում» տեսաերիզը: Եվ ցանկացա թարգմանել այն: Եվ այնպես ստացվեց, որ մեր ընտանիքը ցանկացավ տեսամագնիտոֆոն գնել: Ես նախ նեղվեցի. չէ՞ որ շատ պակասություն կար և կարծես թե դրա ժամանակը չէր: Բայց հանկարծ միտքս եկավ, որ ես ցանկանում էի թարգմանել տեսաերիզը: Հետո փոքրիկ տեսաստուդիա ստեղծվեց, և ես թարգմանեցի: Այն, ինչ չկարողացա ընդունել 1990 թվականին, ստացա հետագայում այդ տեսաերիզի միջոցով:

Ծնորհակալ եմ Տիրամորիցս իր բարեխոսության համար և գոհություն եմ հայտնում Աստծուն, որ տառապանքի ուղիների մեջ մեզ չլքեց և խաղաղության հասցըեց: Օրհնյալ է իր կամքը: Ամեն:

ՍՈՒՐԲ ՆԵԿՏԱՐԻՈՍԻ ՀՐԱՃԱԳՈՐԾ ՊԱՏԿԵՐԸ

2005 թվականի հունիսի սկզբներին, երբ գտնվում էի Բեյրութում, առիթ ունեցա հանդիպելու Հայ Առաքելական եկեղեցու հեեւորդ մի խումբ կանանց: Նրանցից մեկի տանը Հյուրընկալվելիս ես հայտնվեցի Երևանից Բեյրութ հարս գնացած և այնտեղ հաստատված մի կնոջ կողքին: Մենք շատ արագ մտերմացանք և սկսեցինք ջերմորեն զրուցել: Զրույցի ընթացքում

պարզվեց, որ խեղճ կինը հիվանդ զավակ ունի: Դիմել է գրեթե բոլոր կլինիկաներին, հատուկ ուխտագնացի զգեստով, ծոմով ուխտի է գնացել տարբեր վայրեր, սակայն բժշկության հնար չի կարողացել գտնել էպիլեպսիայով տառապող որդու համար: Իր գրույցի մեջ նա նշեց նաև սուրբ Նեկտարիոսի մասին¹:

Նրա հրաշքների մասին պատմող գիրքը ծանոթներից մեկը տվել է իրեն, որ ծանոթանա, սակայն փոքրիկ տղան երբ տեսել է գիրքը, իսկույն կառչել է դրանից, մորն աղաչելով, որ այդ գիրքը թույլ չտա տանել: Սակայն գիրքն ուրիշինն էր, և մայրն այն պահել չէր կարող:

Ես նրան ասացի, որ ունեմ և՝ սրբի նկարը, և՝ Սուրբ Նեկտարիոսի եկեղեցուց բերած յուղ, ու խոստացա Երևան հասնելուն պես դրանք երեխային ուղարկել: Կինը հայտնեց, որ իր քույրերը Երևանում են ապրում, սակայն հեռու են հավատքից:

Երբ Երևան վերադարձա, պատրաստեցի օրհնյալ յուղը, ինչպես նաև Սուրբ Նեկտարիոսի սրբապատճերը: Այն վաղուց էր ինձ մոտ, սակայն մի կողմ էի դրել, ասես ինչ-որ ձևով զգալով, որ այն իմը չէ և նախատեսված է ուրիշի համար: Զանգահարեցի կնոջ քըռջը: Երեկի նրա համար շատ տարօրինակ էր, որ իրեն ինչ-որ յուղ են փոխանցում, որպեսզի այն ուղարկի Բեյրութ:

Անցավ որոշ ժամանակ, և հանկարծ ինձ զանգահարեց բեյրութեցի կնոջ Երևանում ապրող քույրը: Նրա ձայնը լրիվ այլ երանդ ուներ այս անգամ: Հրաշք էր տեղի ունեցել: Փաթեթը բավական դժվարությամբ տեղ էր հասել: Այն տանող անձը չէր ցանկացել սուրբի եկեղեցուց բերած յուղը տալ ըստ պատկանել վույն, և միայն համառ ջանքերի շնորհիվ էին կարողացել այն

¹ Սուրբ Նեկտարիոսը Հունական Ուղղափառ եկեղեցու սրբերից է: Նրա պրապատկերից ծորացող յուղը բուժիչ հատկություն ունի, որ հաճախ օգտագործվում է հավատացյալների կողմից.- Հ. Բ.:

վերցնել նրա ձեռքից: Մի խոսքով, երբ այն համել էր փոքրիկ տիրոջը, երեխան գրկել էր սրբապատկերը և խնդրել էր մորը, որ իրեն թույլ տա քնելուց առաջ համբուրել Սուրբի նկարը... Մայրը թույլատրել էր, սակայն շուտով մոտ էր վազել երեխայի զարմացած ձայնից.

-Մայրի՛կ, նկարը թաց է...

Պարզվել էր, որ նկարն սկսել է յուղ ծորալ: Հիմա արդեն նրանց հերթն էր, այդ սրբապատկերից ծորացած յուղից ինձ էլ ուղարկելու... Հիմա երեխան աստիճանաբար բուժվում է: Այդ հրաշքի պատճառով այդ կնոջ անհավատ քույրերը նույնպես դարձել են առ Աստված և հավատքի ուղին են բռնել:

ՏԻԳՐԱՆՈՒՅՆԻ ՄԱՐԿՈՍԱՆ
«Առաքելություն Հայաստան»
բարեգործական կազմակերպության աշխատակցութիւն

ԻՆՉՊԵՍ ԱՍՏՎԱԾ ՕԳՆԵՑ ԻՆՉ

Տարիներ առաջ անակնկալ կերպով հիվանդացա: Ես, որ մարդիկ էի, և երբեք չէի պատկերացնում, թե կարող եմ ֆիզիկական տկարություն ունենալ, անդամալույծ դարձա: Բժիշկների ախտորոշումը վերջնական էր՝ փոքր ուղեղի մազանոթի դեփորմացիա: Բացի նրանից, որ խախտվել էին օրգանիզմիս բազմաթիվ ֆունկցիաները, նաև անտանելի ցավեր էի ունենում: Մոտ վեց ամիս գրեթե վայրկյան չկար, որ ես առանց ցավերի լինեի: Արդեն ցավազրկող դեղերն էլ չէին օգնում: Եվ այդ ժամանակ ինձ օգնության հասավ «Տերունական աղոթքը»: Նախքան հիվանդությունս ես հավատում էի Աստծուն, բայց այդ հավատքն այդքան զորեղ չէր: Մի անգամ վիրահատությունից առաջ խնդրեցի, որ ինձ այցելի քահանան: Այն ժամանակվա իմ մտածելով. «Խեղդվող մարդը ձեռքն անդամ փրփուրին է գցում»: Եկավ քահանան, աղոթեց և խորհուրդ տվեց ցավերի

ժամանակ աղոթել: Ես քնելուց առաջ երեք անգամ ասում էի «Հայլ մերը», ու ցավերը թուլանում էին, իսկ երբ յոթ անգամ էի ասում «Տերունականը», այդ գիշեր հանգիստ քնում էի: Զեմ ասի, թե առավոտյան ցավ չէի ունենում, ցավը միշտ կար: Առավոտյան ու ցերեկն աղոթքն այդքան չէր օգնում, որքան՝ գիշերը:

Հայաստանում բժիշկները փորձեցին բուժել: Ինչ-որ չափով բուժեցին, առանձին ֆունկցիաներ վերականգնվեցին, բայց ոչ լրիվ և հարկ եղավ Մոսկվա մեկնել՝ վիրահատության: Իսկ մենք այլևս ոչինչ չունեինք՝ ո՛չ ոսկեղեն, ո՛չ խնայողություն: Նույնիսկ մի դեղահար գնելու հնարավորություն չկար: Ումից էլ որ պարտքով փող էինք ուզում, չէին տալիս: Բայց զարմանալի բան. ասես մի զորավոր ձեռք այնպես կարգավորեց, որ անհրաժեշտ գումարը շատ կարճ ժամանակում հավաքվեց: Նույնիսկ այն մարդիկ, որ առաջ պարտքով փող չէին տալիս, հիմա տվեցին անվերադարձ, օգնության կարգով: Գումար ստացանք նաև արտասահմանից, այնպիսի մարդկանցից, որ անգամ երեակայելն անհնարին էր:

Հասանք Մոսկվա, բայց ես վիրահատությաւոնից առաջ սարսափում էի: Թվում էր, որ հենց գա այն պահը, երբ հանկարծ չտեսնեմ հարազատներիս դեմքերը, կմեռնեմ, միամդամից կանգ կառնի սիրտս: Սարսափում էի, բայց ցույց չէի տալիս:

Վիրահատության օրը ինձ դրեցին սայլակի վրա, բերեցին, հասցըրեցին վերելակի մոտ: Գերագույն ճիգերով ինձ տիրապետեցի.

-Ամեն ինչ լավ կլինի,- ասացի, սակայն միայն Աստված գիտեր, թե որքան վախեցած, որքան հուսահատ և որքան տխուր էի ես:

Երբ մտցրին վերելակի մեջ, հանկարծ վրաս մի մեծ հանգստություն իջավ: Նայում եմ՝ վերելակի մեջ ինձնից և ուղեկցողից բացի այլ մարդ չկա, բայց ես զգում եմ, որ կա: Կուզեք՝ ուժ

ասեք, կուզեք՝ զորություն, կուզեք՝ անտեսանելի ինչ-որ բան:

«Երկի ինքնաներշնչում է», - մտածեցի, սակայն հասկացա, որ նման ինքնաներշնչում լինել չի կարող: Տարան վիրահատարան, միացրեցին համապատասխան տվիչները, փողքակները: Սրտիս ձայնը լսվում է բարձր, նաև ես եմ լսում ներքին լսողությամբ: Վիրահատարանի քույրերը զարմացած իրար են նայում և ինձ: Ինչ էլ որ լինի, վիրահատությունից առաջ մարդու սրտի զարգերն արագանում են, նյարդերը՝ լարվում: Իսկ ինձ մոտ ամեն ինչ գերազանց էր:

-Ինչ ինքնատիրապետում ունի, - շշնջում են նրանք իրար՝ չհասկանալով, որ ես չեմ տիրապետում ինքս ինձ, այլ՝ Ուրիշը: Ինչ-որ մի զորավոր Ուժ հանդարտություն էր իջեցրել վրաս:

Վիրահատությունը շատ հաջող ընթացք ունեցավ: Նույնիսկ բժիշկներն էին խոստովանում. թե իրենք վստահ էին վիրահատության հաջող ընթացքի վրա, բայց չէին սպասում, թե ամեն ինչ այսքան բարեհաջող կընթանա: Վերականգնումը նույնպես շատ արագ ընթացավ ու վերագարձա Հայաստան: Ճիշտ է, լրիվ վերականգնվելու համար բժիշկներն ինձ ժամանակ են տվել, բայց ես հուսով եմ, որ Աստծո ողորմածությամբ լիովին կառողջանամ:

Մինչ հիվանդությունս, վիրահատությունս և ինձ այցելած Ուժի կամ զորության հետ հանդիպումս, ես հարգանք ունեի Աստծո և կրօնավորների նկատմամբ, բայց խոր հավատ չունեի: Վերելակի մեջ և նաև հետո, ես հասկացա, որ Սստված կա և Նա մեր նեղության մեջ միշտ մեր կողքին է: Հետո, երբ Հայաստան եկա, նաև մկրտվեցի Տեր Մինսս քահանայի ձեռքով և հիմա փորձում եմ ապրել աստվածահաճո կյանքով: Ես ինձ հետ կատարվածը հրաշք եմ համարում կամ ավելի ճիշտ՝ Աստծո մեծ ողորմություն:

ԱՐԹՈՒՐ ՄԱՐԳԱՐՅԱՆ
p. Սևան

ԱՅՆ ՄԱՍԻՆ, ԹԵ ԻՆՉՊԵՍ ԴԱՐՁԻ ԵԿԱ ԵՍ

Փոքր տարիքում առանձնակի հավատքով աչքի չեմ ընկել, սակայն հիշում եմ, որ երբ մայրս հաց էր թխում, առաջին լավաշը թոնրից հանելիս միշտ խաչակնքում էր ու ասում «Գրիգոր ավետարան»: Ումի՞ց էր լսել: Երեք սեփական մորից, կամ տատից, և ասում էր ամեն անդամ: Իսկ դա ինձ զայրացնում էր, և ես հաճախ էի հանդիմանում նրան այդ «Հետամնացության» համար:

Անցան տարիներ, ես մեծացա, ուսում առա, բայց խորհրդային երկրի շատ երիտասարդների նման ես նույնպես չգնացի աստվածդիտության ճանապարհով: Մկրտված էլ էի, բայց նման մկրտությունը արդեն կարծես ձևական էր ինձ համար: Ավելին, սկսեցի սուրճի բաժակ նայել: Երբ գործընկերներիցս կամ հարևանուհիներիցս մեկը սուրճ էր խմում, շուռ էր տալիս բաժակն ու մեկնելում էր ինձ.

-Նայի՛ր:

Նայում էի և հաճախ ճիշտ էի գուշակում: Կարող էի մեկին ասել ասենք. «Ամուսինդ այսօր կգա Ռուսաստանից» և գար: Բանը հասել էր այնտեղ, որ երբ որևէ մեկը չէր ցանկանում ինձ բաժակ նայել տալ, զայրանում էի: Սակայն պետք է ասեմ նաև, որ գիշերները անհանգիստ էի: Վեր էի թռչում, կամ կանչում էի ամուսնուս, տանեցիներին, որ ինձ փրկեն: Հաճախ էի հանդիմանում ամուսնուս. «Ինձ խեղում են, իսկ դու ձայնս չես լսում»:

Հիմա գիտեմ, որ սուրճի բաժակով գուշակություններ անելը կամ գուշակությունն առհասարակ, դիվական բան է: Իսկ այն ժամանակ իմ երազում, կամ հաճախ էլ՝ իրականության մեջ, լուսամուտից տուն էր մտնում մի սե, տձե, ոչ մի բանի չնմանվող բան և սկսում էր տանջել ինձ: Կամ կախվում էր լուսամփոփից ու սկսում էր ճոճել, կամ սկսում էր խեղուել ինձ: Մի ան-

գամ նույնիսկ բանը հասավ այնտեղ, որ սկսեցի ամուսնուս ձայն տալ, որ փրկի ինձ: Հիշում եմ՝ այդ անգամ նաև «Աստված» կանչեցի, բայց չխաչակնքեցի: Լինում էր, որ լուսամուտից մտնում և լուսամուտից էլ դուրս էր գալիս: Ես տեսնում էի, բայց ուրիշ ոչ ոք չէր տեսնում: Գիտեի, որ խելազար չեմ, հոգեպես նորմալ վիճակում եմ, սակայն... Ես վախենում էի մենակ տուն մտնել, կարծես նա կենդանի, իրական պտտվում էր իմ հետեւից ու շշնջում: Մի խոսքով, բոլոր հարազատներս իմացան, որ հիվանդ եմ: Մի անգամ իմ հայրենիքից՝ Զավախքից եկավ հարազատներից մեկը, որը խորհուրդ տվեց քնելուց առաջ խաչակնքվել, սակայն չարեցի:

Կարծես այդ ամենը քիչ էր, որոշ ժամանակ անց, երբ լողանում էի և ինձ օգնում էր տեղրոջս աղջիկը, իմացա ինձ համար մի սարսափելի բանի մասին: Այդ օրերին սկսել էի ուժեղ ծակոցներ զգալ թիկունքիս շրջանում և մենակ գործ անել չէի կարողանում: Եվ սարսափեցի, երբ նա ասաց.

-Աշխեն, թիկունքիդ ուռուցք կա... Մեծ ուռուցք:

Միանգամից ինձ վատ զգացի: Իմ վիճակին ավելացավ այն, որ այդ «ինչ-որ բանը» կամ ավելի ճիշտ՝ դեռ, պտտվում էր հետեւիցս և անընդհատ ինձ հիշեցնում, որ ես շուտով մեռնելու եմ: «Դու շուտով մեռնելու ես», «Վաղը քո վերջին օրն է»...

Այդ ժամանակ ընկերուհիս, որ նաև մոտիկ հարևանուհիս է, Հոգեգալստական աղանդի հետեւորդ էր: Տեսնելով վիճակս՝ ինձ համոզեց, որ գնամ իրենց ժողովարանը: Հատկապես այն ժամանակ, երբ բժշկության աղոթք են անում: Ամուսնուցս գաղտնի գնացի մի քանի անգամ: Հետո ամուսինս իմացավ և ասաց, որ եթե հավատքի պիտի գնամ, ապա ավելի լավ է գնամ մեր պապերի փորձած ճանապարհով, այսինքն Հայ Առաքելական Սուրբ եկեղեցի:

Իմացա, որ Տեր Մինաս քահանա Մարտիրոսյանն ամեն շաբաթ քարոզներ ունի, նախ՝ Սևանի Գեղարվեստի դպրոցում, ա-

պա՝ մշակույթի տանը։ Գնացի քարոզների, իսկ երկու ամիս անց նրա մոտ անհատական խոստովանություն ունեցա։ Պատմեցի իմ Փիղիկական, հոգեոր վիճակի և ցավերի մասին։

Չմոռանամ ասել, որ նույնակ որոշել էի վիրահատության գնալ։

-Աշխեն,- ասաց Տեր Մինաս քահանան,- դա կյանքի ու առողջության հարց է, դրա համար էլ ես չեմ կարող քեզ ասել, թե մի՛ գնա վիրահատության, սակայն զգում եմ, որ հավատք ունես։ Ամեն անգամ, Պատարագից հետո, եթե նույնիսկ ես մոռանոմ, հիշեցրու, որ բժշկության աղոթք կարդամ։

Ես մի տեսակ ուրախությամբ եմ նշում, որ Սեանի «Սուրբ Առաքելոց» եկեղեցում բժշկական աղոթքները կարծես թե ինձանով սկզբնավորվեցին։

Մի քանի աղոթքից հետո ցավերն անցան, անցավ իմ սարսափը։ Անցել է ինը տարի։ Հիմա էլ կա ուռուցքը, սակայն այն այլ այլ այլ քան չի անհանգստացնում ինձ։ Ես հաստատ գիտեմ, որ Աստված պահում է բոլոր նրանց, ովքեր հավատում են իրեն և ապավինում են իր զորությանը։

ՅՈԹԱՆԱՍՈՒԵՐԵՔ ՏԱՐԵԿԱՆ ՄԱՅՐՄ՝ ՆՈՐԱԴԱՐՁ

Տեր ծնողներ ունեմ, որոնք ապրում են Ջավախիքում։ Նրանք իրենց երիտասարդության շրջանում աչքի չեն ընկել առանձնահատուկ հավատքով։ Այնպես, ինչպես խորհրդային շրջանի շատ ու շատ մարդիկ։

Սակայն վերջին տարիներին մեծ վիշտ տեսան։ Հայոց բանակում, դժբախտ պատահարի հետևանքով, զոհվեց նրանց սիրելի թոռնիկը՝ Մերուժանը։ Թե պապիկն ու տատիկը որքան էին

սիրում իրենց թոռնիկին, գիտեն շրջապատի բոլոր մարդիկ, և թվում էր, թե այդ մեծ վշտին չեն դիմանա: Սակայն...

Այդ մենք՝ քրիստոնյաներս գիտենք, որ մահ չկա, դրա համար էլ այս աշխարհից հեռացածներին անվանում ենք «ննջեցյալ», իսկ անհավատ մարդու համար շատ ավելի դժվար է համակերպվել վշտի հետ: Սակայն զարմանալի բան տեղի ունեցավ՝ ավելի գործուն դարձավ ծնողներիս հավատքը:

Մայրս այդ տարիքում եկավ Աւանի վանք և մկրտվեց, որպեսզի մահվանից հետո արժանանա իր թոռնիկի տեսությանը: Այսինքն հավատում է «Անմահ մահով մեռնելու» իրողությանը:

Բացի սա, մի զարմանալի գեպք էլ տեղի ունեցավ: Եղբայրս երկու որդի ուներ, որոնցից մեկը հիվանդ էր: Երբ եղբայրը զոհվեց, նա առողջացավ, իսկ մայրս անընդհատ հարձակումների է ենթակրվում չարի կողմից:

Մի անգամ նա նույնիսկ պատմեց, թե ինչպես սատանան հաճախ միտք է բերում, թե.

-Մերուժան թոռնիկդ մահացել է, իսկ դու ապրում ես: Ո՞ւմ է հարկավոր քո կյանքը: Ավելի լավ է՝ գնաս, կախվես:

Եվ նա, այդ նորադարձ, յոթանասուներեքամյա կինը, արտորանքով ամեն անգամ համբուրում է խաչը և նրանով հեռու է վանում այդ կործանարար միտքն իրենից, քանզի գիտի, որ միայն Աստծո ողորմածությամբ է հնարավոր փրկվել: Հիմա և՛ հայրս կա, և՛ մայրս ու Տիրոջը հավատալով, նրան ապավինած, դիմանում են ծանր վշտին, և այդ տարիքում աշխատում են՝ աշխարհին ու իրենց ապացուցելով, որ միայն կենդանի հավատքով կարող է փրկվել մարդը:

ԱծԽԵՆ ՌԵՎԱԶԱՎՆ
ք. Աւան, ուսուցուիի

ԻՆՉ ՓՐԿԵՑ ԱՌԱՔԵԼԱԿԱՆ ՍՈՒՐԲ ԵԿԵՂԵՑԻՆ

Եղավ այնպես, որ մեր ընտանիքում անախորժություն առաջացավ: Ամուսինս Խուսաստանում էր, ես՝ Հայաստանում: Անընդհատ Աստված էի կանչում, սակայն գեռես գործնական հավատք չկար: Հոգեվիճակս ծանր էր, սկսեցի մղձավանջները կատարվում էին հարթմնի: Ես հասկանում էի, որ սա ինչ-որ անսովոր բան է: Ոչ այն է՝ երազներ էի տեսնում, ոչ այն է՝ տեսիլքներ: Մի անգամ, օրինակ, վիշապի տեսքով եկավ, ես սարսափահար վեր թռա...»

Կամ կարող էի երազում տեսնել, որ ինչ-որ բան գալիս է կատվի տեսքով, հետո փոխվում, դառնում է կին: Մի անգամ, երազում այդ կնոջը տանից դուրս հանեցի, դուռը փակեցի, իսկ նա ձեռքը գցեց, բռնեց ինձ ու սպառնաց.

-Մեկ է, քեզ բռնելու եմ...

Դրանք սովորական երազներ չէին: Հոգեբանները գուցե թե հազար ու մի բացատրություն գտնեն նման իրավիճակների համար, բայց ես գիտեմ, որ դրանք կապված էին չար ուժերի հետ: Վախենում էի, այնքան էի վախենում, որ սկսեուրս ստիպված եղավ տեղափոխվել մեր տուն:

Եղավ այնպես, որ մի անգամ էլ արթուն վիճակում տեսիլք տեսա: Քնած էի ննջասենյակում՝ որդուս ու սկեսրոջս հետ: Հանկարծ արթնացա: Զգացի, որ վերմակը վրայիցս քաշում են: Նախ թվաց, թե երազ է, բայց հետո հասկացա, որ իրականություն է, մանավանդ, երբ տեսա, որ իմ մահճակալի մոտ մի գեղեցկուհի է կանգնած՝ ոսկեգույն մազերով:

«Տեր Աստված, - մտածեցի, - Քեզ այդքան կանչեցի ու Դու եկա՞ր», - հետո հարցրեցի.

-Քեզ կարո՞ղ եմ մի հարց տալ:

-Տուր, - ասաց:

Բնական է, որ ընտանիքի մասին հարցրեցի:

-Մի տարի էլ չանցած՝ ամեն ինչ կկարգավորվի,- ասաց:

-Քո մասին կարո՞ղ եմ բոլորին պատմել,- հարցրեցի:

-Կարող ես,- ասաց,- բացի նրանից,- կողքիս քնած սկես-
րոջս ցույց տվեց նա:

Ես այդ ժամանակ չհասկացա, թե ինչու է հատկապես
սկեսրոջս մատնացույց անում, բայց հիմա ենթադրում եմ՝ ին-
չու: Բանն այն է, որ ես այն ժամանակ գնում էի աղանդավորնե-
րի հավաքին: Մտածում էի, որ եթե ուզում ես Աստծուն ճանա-
չել, ապա կարեոր չէ, թե որտեղ կհանաչես Նրան: Իսկ սկեսուրս
գեմ էր դրան: Նա ասում էր՝ եթե ուզում ես Աստծուն դառնալ՝
գնա Հայ Առաքելական եկեղեցի:

Իսկ այդ տեսլիքին անդրադառնալով՝ ասեմ, որ այդ աղ-
ջկը գնաց, չյուրասենյակից ինչ-որ բան բերեց ու քսեց իմ և
քնած տղայիս գեմքին: Նորից եմ կրկնում՝ այս ամենը ես տես-
նում էի հարթմնի: Հետո նորից հարցրեցի նրան, թե ինքն ո՞վ է,
ու նա պատասխանեց.

-Ես ձեր աշխատանքի տեղի Նաթելայի բարեկամի աղջկա՝
Սուսանի հոգին եմ:

Ես Սուսաննային չեմ ճանաչել, բայց առավոտյան զանգա-
հարեցի գործընկերուհուս և նա ասաց, որ նման մահացած բա-
րեկամ ունեն:

Իսկ այն գիշեր ես դարձա սկեսրոջս կողմը և զարմացա, որ
նա մեր խոսակցության ձայնից չի արթնացել ու ձայն տվեցի.

-Մամա, վեր կաց, տե՛ս, թե ով է եկել...

Եվ իմ կանչից հետո այդ տեսիլքը չքվեց:

Այս երեսույթի մեկնաբանությունը ես տալ չեմ կարող, չգի-
տեմ՝ ինչպես բացատրեմ, սակայն գիտեմ, որ երբ զգացի, թե իմ
հաճախած «եկեղեցին» ընդամենը աղանդավորների խումբ է,
գնացի Հայ Առաքելական սուրբ եկեղեցի: Այդ օրվանից ի վեր

անցել են տարիներ, ու նման մղձավանշային երազներ ու անհասկանալի տեսիլքներ չեմ տեսնում այլևս:

Հիմա որդիս մեծացել է և ցանկանում է հոգեորական դառնալ՝ Հայ Առաքելական Եկեղեցու միջոցով Աստծուն ու մարդկանց ծառայելու համար:

ԼՎԼՎ ԳԵՎՈՐԳՅԱՆ
Սևանի ալրադաց գործարանի աշխատակցուին

ԱՌՈԹՔԻ

ՉՈՐԱԿՈՐ ՈՒԺԸ

2005 թվականի օգոստոսի 14-ին էր՝ Մարիամ Աստվածածնի տոնի օրը: Եղբորս կինը, որ հղության յոթներորդ ամսում էր, հանկարծ վատ զգաց ու նրան հիվանդանոց տարան: Պարզվեց, որ երեխան ժամանակից շուտ է աշխարհ գալու: Բարդությունից խուսափելու համար կատարվեց «Կեսարյան հատում»: Մոր կյանքը փրկված էր, բայց երեխան շատ վատ վիճակում էր: Բժիշկները ոչ մի հույս չէին տալիս նրան: Սակայն մեր ընտանիքը հույսը դրել էր Աստծո ողորմածության վրա:

Ես այդ ժամանակ ծառայում էի «Սուրբ Շողակաթ» եկեղեցում և ամեն օր Տիրոջն աղերսում էին երեխայի փրկության համար: Սակայն երեխայի վիճակն օրեցօր վատթարանում էր: Բժիշկները ենթադրում էին, թե երեխան կմահանա մի չորս-հինգ ժամից:

Մի անդիմադրելի ուժ ինձ ստիպում էր գնալ հիվանդանոց և այնտեղ աղոթել մանկան համար: Ուզում էի ներս մտնել, սակայն բժիշկները թույլ չէին տալիս: Երկարատև խնդրանքներից ու համառությունից հետո, վերջապես ներս մտա և դառն արտասուքներով սկսեցի աղոթել: Բոնել էի իմ մկրտության խաչը և արտասավելով Տիրոջը խնդրում էի, որ կյանք պարգևի երեխա-

յին: Եվ հրաշք կատարվեց, հանկարծ աղջիկը բացեց աչքերը: Կարծես մի ձայն ինձ ասաց, որ նա փրկված է:

Ի պատիվ Սուրբ Աստվածածնի՝ մանկան անունը Մարիամ դրեցինք: Հիմա կա մեր Մարիամը: Ով կամենում է տեսնել նրան, թող գա էջմիածին քաղաքի Մաշտոցի 30 ա շենք, բնակարան 15:

ԴԱՎԻԹ ՀԱՅՐԱՊԵՏՅԱՆ
Սևանի Վազգենյան դպրանոցի
առաջին լսարանի սան

ՄՈՐՄ ՏԵՍԱԾ ԶԱՐՍԱՆԱԼԻ ԵՐԱՇԸ

Մայրս՝ Թամարա Փիլիպոսյանը, մի երկու-երեք տարի առաջ հիվանդացավ: Ցավում էր ոտքը: Բազում բժիշկների դիմեցինք, բազմաթիվ դեղեր օգտագործեց, բայց բուժում չգտնվեց:

Մի անգամ նա երազ տեսավ: Պատմում էր, որ տեսել է մի կանաչ գաշտ, որի մեջ, հեռվում մի քարի նստած է եղել մեկը, որն իր կարծիքով սր. Գայանե կույսն է եղել: Ինչպես է լինում նման գեպքերում. քեզ ոչ ոք բացահայտ չի ասում, թե նա ով է, բայց գու իմանում են: Մի խոսքով, կույսը մորս իր մոտ է կանչում, իսկ մայրս հրաժարվում է՝ ասելով. «Ոտքս ցավում է, բացի այդ, գաշտն այնքան կանաչ է և խոտն այնպես հավասար է խուզված, որ վախենում եմ՝ փչացնեմ»:

«Արի, մի վախենա», - համոզում է կույսը, և մայրս գնում է դեպի նա: Հետո շուռ է գալիս ու տեսնում, որ կանաչի վրա իր ոտնահետքերը չեն երևում և խոտը այնպես մաքուր ու անարատ է, ասես անկոխ լինի: Եվ հենց այդ պահին արթնանում է: Իսկ առավոտյան անցնում է ոտքի ցավը, և վերանում է կաղությունը:

ՍԵՎԱԿ ՍԱՐԻԲԵԿՅԱՆ
ք. Էջմիածին, Զվարթնոց թաղամաս

ՏԻՐՈՉ ԵՎ ՏԻՐԱՄՈՐ ԱՆՎԱՆ ԶՈՐՈՒԹՅՈՒՆԸ

Դեպքը տեղի է ունեցել 2001 թվականի նոյեմբեր ամսին: Այդ օրը Դանակագուսում հորդառատ անձրև եկավ: Այնպիսի անձրև, որ ճանապարհները կորան ցեխի մեջ, և խիստ դժվարացավ մեքենա վարելը: Անիվները սահում էին ճանապարհի վրա, և արգելակելը խիստ դժվար էր:

Ես «Օպել» մակինչի մեքենայով էի և մոտ 100 կիլո-մետր/ժամ արագությամբ սլանում էի մեծ ուղիով: Հանկարծ, երթևեկության բոլոր կանոնները խախտելով՝ դեմս դուրս եկավ մի մեծ բեռնատար: Իմ և նրա միջև հեռավորությունը մոտ 15 մետր էր: Փորձեցի արգելակել, սակայն մեքենան սահեց, և լպրծուն գետնի վրա արգելակները չպահեցին: Թվում էր՝ բախումն անխուսափելի է, ամեն ինչ գնովում էր վայրկյանների ընթացքում: Ես բարձր ձայնով գոչեցի.

-Քրիստոն, Մարիամ, օգնեցեք ինձ:

Եվ հանկարծ մի անտեսանելի ուժ վերացրեց վտանգը՝ մեքենան կանգնեցնելով բեռնատարից մի թզաչափ հեռու:

Ես ջախջախվելուց փրկվեցի տեր Աստծո և Սուրբ կույս Մարիամի ողորմածության շնորհիվ:

ՌԱՖՖԻ ԲԱՂԱՇԱԼՅԱՆ
Սիրիա, Դամասկոս

ԻՆՉՊԵՍ ԴԻՎԱՐԱՐ ԵՂԱՎ ՏՂԱՍ ԵՎ ԻՆՉՊԵՍ ԲԺԾԿՎԵՑ

-Ես այս դեպքը կպատմեմ միայն մի պայմանով, եթե չնշեք իմ ու տղայիս անունները: Երիտասարդ տղա է, ամաչում է, չի ցանկանում, որ իմանան իր հետ կատարվածը, սակայն ես շատ

եմ ուզում, որպեսզի ուրիշներին սա դաս դառնա,- ասաց զրուցակիցս և խոսք առնելով, որ կպահպանեմ իր դրած պայմանը, պատմեց հետեւյալը.

-Տղայիս հետ կատարվածի հիմնական պատճառն իմ կարծիքով թերահավատությունն է: Նա հավատում է Աստծուն, բայց թերահավատ է: Ասենք մարդկային հավատը միշտ էլ պակաս ու պակասավոր է Աստվածային լիության դեմ: Հո պատահական չէ^o, որ նույնիսկ մեծ Գրիգոր Նարեկացին ինքն իրեն թերահավատ է համարում: Ինչևէ: Տղայիս մոտ դա ավելի ցայտուն էր արտահայտվում: Բանակում ծառայելու ժամանակ նրա մոտ հիվանդություն ի հայտ եկավ, որը բժիշկներն ախտորոշեցին՝ քունքային էպիլեպսիա:

Սկզբում կարծում էին՝ ստում է, որպեսզի չծառայի, իսկ հետո համոզվեցին, որ չի խարում: Տարան զինվորական հոսպիտալ:

Հոսպիտալում մի քանի երիտասարդ, հավատքից հեռու զինվորների նախաձեռնությամբ, որոշում են ոգի կանչել: Սկսում են իրենց «գործը», սակայն ոգին հայտնում է, թե «Զերմեջ մեկը կա, մինչև դուրս չգա, ես չեմ կարող գալ»:

-Ո՞վ է,- հարցնում է գլխավոր ոգեհարցուկը:

Չարը տալիս է տղայիս անունը:

-Ինչու^o:

-Քանի որ նրա համար աղոթող կա և ինձ խանգարում է:

Տղաս դուրս է գալիս ու կանգնում է միջանցքում, սակայն այս անգամ ոգին պահանջում է, որ նա այդտեղից էլ հեռանա:

Դա ավելի է գրգռում նրա հետաքրքրասիրությունը և հաջորդ անգամ ինքն էլ է միանում ոգեհարցուկին: Ավելին, ինքն է կանչում: Եվ գալիս է, նույնիսկ անունն է ասում:

-Ես եկել եմ Պակիստանից,- ասում է:

Ցավոք հիմա անունը չեմ հիշում: Ինչևէ, այդ դեպքից հետո նրա վիճակը շատ էր վատացել, և ինձ հոսպիտալից լուր ու-

դարկեցին: Գնացի, բերեցի տուն: Սարսափելի էր, աննկարագրելի և նույնիսկ թշնամուս չեմ ցանկանում տեսնել նման բան: Գիշերվա կեսին վեր էր կացել, նստել անկողնում և ակնհայտուեն խոսում էր նրա՝ այդ ոգու հետ: Մենք փորձում էինք արթնացնել ու չէինք կարողանում: Ես հավատացյալ մարդ եմ և անմիջապես գլխի ընկա, որ երեխան դիվահար է եղել: (Այդ ժամանակ ես չգիտեի եղելությունը: Տղաս հետո պատմեց իրենց «քաջագործությունը»): Սկսեցի աղոթել՝ փորձելով իմ տկար ուժերով քշել դմին, սակայն...

Երկար տանջելուց հետո, վերջապես դեռ կարծես թե թողեց նրան և խոստացավ:

-Ես անպայման նորից կգամ:

Մի կերպ անց կացրինք գիշերը: Առավոտյան կիրակի էր և տղայիս հետ գնացինք Սևանի «Սուրբ Առաքելոց» եկեղեցի:

Տեր հորը պատմեցի եղելությունը, խնդրեցի նրա աղոթքը: Տեր հայրն աղոթք կարդաց երեխայի գլխին, գնացինք տուն, և նա առանց հանվելու մի կողքի պառկեց ու քնեց ոչ միայն այդ ցերեկը, այլև մինչև մյուս առավոտ:

Ահա այդ պատմությունը: Ես սա պատմեցի բոլոր այն տաքզուխների համար, ովքեր առանց հասկանալու խաղ են անում սատանայի հետ, իրենց խելքով փորձում են նրան իրենց ծառայեցնել: Նրանք չգիտեն, որ չի կարելի խաղալ կրակի հետ: Պետք է հավատալ Աստծուն և նրա զորությամբ ապրել հավատավոր ու բարի կյանքով, քանզի միայն այդ է գրավականը ոչ միայն երկրագոր, այլև՝ հավերժական կյանքի:

ԻՆՉՊԵՍ ԲԱՐԵԼԱՎԿԵՑ ՄՈՐՍ ՏԵՍՈՂՈՒԹՅՈՒՆԸ

Մորս աչքերը տարիներ ի վեր տկար էին: Լավ չէր տես-նում, էլ չասենք՝ կարդալ կարողանալու մասին: 2005 թվականի սեպտեմբերի մեկին էր: Ես ընդունելության քննություններ էին հանձնել Էջմիածնի Գևորգյան ճեմարանում: Մորս հետ եկանք արդյունքներն իմանալու: Մայրս գնաց «Կաթողիկե»՝ աղոթե-լու, իսկ ես գնացի ճեմարան:

Նա մտնում է եկեղեցի, մոմ է վառում, իր աղոթքն անում: Հետո եկեղեցում մի ծերունի նրան քարոզթերթիկ է տալիս, որ կարդա: Ծերունին չգիտեր, բայց մայրս հոգ գիտե՞ր, որ ինքը կարդալ չի կարողանում: Նա վերցնում է քարոզթերթիկն ու փորձում է կարդալ... և ստացվում է: Զգիտես ինչ հրաշքով նրա աչքերի տեսողությունը բարելավվել էր: Այդ օրվանից սկսած՝ մայրս կարդում է, և հիմնականում՝ Աստվածաշունչ: Նա հավա-տացած է, որ Աստված լսեց իր աղերսանքը և բացեց իր տեսո-ղությունը:

ԱՎԵՏԻՍ ՂԱՎԱՏՐՅԱՆ
Անանի Վազգենյան հոգևոր դպրամոնց
առաջին լսարանի սան

«ԶԵՂԱԾ ԲԱՆԸ»

Մայիսյան առավոտը ծաղկած դեղձենու բույր ուներ և եկեղեցու դռանը կանգնած քահանան, արդեն որերորդ անգամ, հիանում էր Արարչի իմաստնությամբ և ապրում էր նրա կողմից իրեն նվիրած հեղթական գարունը:

Եկեղեցին դատարկ էր: Քահանան նոր էր ավարտել Առավոտյան ժամերգությունը: Աստծո առաջ իր ծառայությունը կատարել էր բարեխղճորեն: Հետո ի՞նչ, որ եկեղեցում մարդ

չկար, հետո ի՞նչ, որ խորհրդային իշխանություններն արգելում էին հավատալ Աստծուն:

Բաց դռնից խնկահոտը ելնում, խառնվում էր գարնան ծաղկահոտին և գմբեթի տակ բնավորված ծիծեռնակն ամեն անդամ գարնան երկնքին էր խառնում մի կտուց աղոթք:

Քահանայի հոգին խաղաղ էր և սիրտը ոչինչ չէր անհանգստացնում:

...Կարմիր զգկապով աղջիկը եկավ ասես չուզենալով, կանգնեց, նայեց եկեղեցուն, նրա սեմին հենված քահանային, հետո մոտեցավ: Կանգնեց դեմ-դիմաց և հայացքն ի վեր՝ սեեռեց քահանայի դեմքին.

-Ուսուցիչն ասում է՝ Աստված չկա,- հաստատելու պես ասաց կիսաձայն, ու մինչ քահանան կմտմտար անելիքը, առանց պատասխանի սպասելու ներս մտավ:

Որքա՞ն մնաց ներսում, քահանան չհաշվեց, ի՞նչ արեց այնտեղ, չհետաքրքրվեց: Նա մտքի մեջ ծամծմում էր երկար-բարակ ապացույցների մի շարան հօգուտ Աստծո գոյության:

Աղջիկը դուրս եկավ, դարձյալ կանգնեց քահանայի դեմ-հանդիման ու ասաց.

-Եթե Աստված չկա, էլ ինչու՞ են այդքան խոսում «չեղածքանի» մասին: Չեղածքանի մասին չեն խոսի: Իսկ իրենք խոսում են, ուրեմն...

Ասաց ու զարմանքից քարացած քահանայի հայացքի տակ հեռացավ մի ոտքի վրա թռչկոտելով: Մինչև հիմա էլ ծեր քահանայի աչքերի մեջ նրա փողփողացող ալ վզկապն է, իսկ մտքի մեջ՝ զարմացած հարցը.«Մի՞թե 10-11 տարեկան աղջնակն այդքան իմաստնություն կարող է ունենալ»:

ԾԱՆՈԹԻՍ ՊԱՏՄՈՒԹՅՈՒՆՆԵՐԸ

-Վստահ եմ, որ ականտեսներից շատերն արդեն մոռացել են այս դեպքը,-ժպտաց ծանոթս ու շարունակեց,- իսկ ես մոռանալ չեմ կարողանում: -Աշնան արեու առավոտ էր: Օդն այնքան խաղաղ էր, որ ձայները զրնգում էին հազարամյա զանգի նման: Սևան քաղաքի զինվորական կոմիսարիստի դիմաց խոնվել էին զորակոչիկների ծնողներն ու հարազատները: Մենք կանգնած էինք շենքի հետնամասում գտնվող ավտոմեքենաների վերանորոգման արհեստանոցի դիմաց և աշնան առավոտի խաղաղությունն էինք վայելում: Ես խաղում էի աղոթնոցիս հետ և մտքում աղոթում էի Հիսուսական աղոթքով.«Տեր, Հիսուս Քրիստոս, Որդի բարձրյալ աստծո, ողորմիր ինձ՝ բազմամեղիս»: Արդեն սովորությունն է դարձել՝ աղոթում եմ մտքում. և՝ մարդկանց հետ եմ, և՝ նրանցից հեռու՝ Աստծո ներկայությամբ: Ինչևէ...

Հանկարծ առավոտվա թմբկաթաղանթը պատռվեց տղամարդկային բարձր՝ կռվի ու հայՀոյանքի ձայներից: Երկու խմբի բաժանված, նրանք հավաքվեցին զինկոմիսարիստի շենքի հետնամասում՝ սկսած լեզվակոիվը բռունցքներով կամ դանակներով ավարտելու:

-Վե՞րջ,- հուսահատությամբ շշնջաց մոտս կանգնած տղամարդը,- առանց արյուն հանելու չեն հանգստանա:

Հազիվ էր այդ ասել, երբ ես անկախ ինձանից, բարձր ու հատու ձայնով դիմեցի կռվողներին, որ մեզնից հեռու էին մոտ 50 մետր.

-Խաղաղություն ձեզ,- ասացի որպես ներքին աղոթքիս շարունակություն:

Դա եղավ ինձնից անկախ, ասես ձայն տվողը ես չլինեի, այլ մեկ ուրիշը... Եվ կռվողների աղմուկը միանգամից դադրեց, հետո, ի զարմանս բոլորիս, թողեցին, հեռացան:

2005 թվականի ապրիլ ամիսն էր, գործով իջևան էի գնում: Ժամանակ կար և որոշեցի ճանապարհից ձախ թեքվել ու մտնել Հաղարձնի վանք: Գնում էի աղոթելով, նաև՝ զանազան հիշողություններ էին գալիս փաթաթվում աչքերիս: Մեկ էլ ուսանողական տարիներին էի եղել այստեղ: Անտառը նոր-նոր արթնանաւոմ էր ձմռան քնից, հողն սկսում էր ծիլերին սնել: Արևոտ ու տաք գարնան օր էր: Ճանապարհը տարավ, կանգնեցրեց վանքի մոտ: Սակայն ձնհալի ջրերը քանդել էին ճանապարհի որոշ հատվածը և չղգացի, թե ինչպես մեքենայի հետեւի անիվները կախված մնացին օդում: Ոչ հետ գնալ էր լինում, ոչ առաջ: Մի կերպ իջա, փորձեցի անիվների տակ քարեր հարմարեցնել և անցնելով դեպի հետ, չքանդված մասը, վերադառնալ: Զստացվեց, տեղապտույտից սկսեց ծուխ բարձրանալ անիվների ուետիններից:

իջա, նայեցի, վանքի գմբեթին ու շշնջացի.

-Տեր Աստված, մի՞թե ինձ անօդնական ես թողնելու այս փորձանքի մեջ: Ես հիմա տրակտոր որտեղից գտնեմ,- ասացի ու ձեռքս հուսահատված դրեցի մեքենայի վրա: Եվ, ի զարմանս ինձ, մեքենան տեղից պոկվեց, իմ դրած քարերի վրայով հանդարտ ետ գնաց ու կանգ առավ հարթ տեղում: Ես զգացի, որ մի ուժ, ինձնից դուրս գործող ինչ-որ մի ուժ մեքենան հանեց թակարդից: Հիմա որքան էլ որ նկարագրեմ ու բացատրեմ, չեմ կարողանա, սակայն փորձանքից փրկված լինելու այդ քաղցր զգացողությունը մինչև օրս քաղցրորեն խտղտացնում է սիրտս:

Գնացել էի հայրենի գյուղ: Մահացել էր քեռիս: Թաղման օրը առատ ձյուն եկավ, ծածկեց ամեն ինչ: Լավ կլիներ, որ այդ օրը համբերեինք և դուրս չգայինք, սակայն գործեր կային և... թաղումից անմիջապես հետո ճանապարհ ընկանք...

Հասանք Դիլիջան: Դեպի լեռնանցք տանող ճանապարհի վրա հանկարծ մեքենան կորցրեց կառավարումը և սկսեց սահել դեպի ձորը: Մեքենայի մեջ նստած կինս աղեկտուր ճշաց, իսկ ես հազիվ հասցրեցի ասել.

-Աստվա ծ...

Մեքենան սահեց և կանգ առավ անդունդի եզրին: Բարեբախտաբար դիմացից որևէ մեքենա չէր գալիս, այլապես բախումն անխուսափելի էր:

Ահա թե ինչպես, վտանգի պահին միայն Աստծո անունը հիշատակելը կարող է փրկարար լինել: Աստված ամենուր է և ամենահաս, միայն թե թերահավատ չլինենք և հարկ եղած պահին օդնության կանչենք Նրան:

Տարիներ առաջ էր՝ ձեռքիս վրա վերքի, թե՛ խալի նման մի բան առաջացավ: Առաջացավ անսպասելի: Սև, անհարթ մակերեսով ինչ-որ վերքանման բան, որ դեպքից-դեպք ասես լցվում էր արյունով, ավելի սեւանում: Զգում էի, որ տանեցիները վախենում էին ինձ համար: Մի անգամ բժշկի ցույց տվեցի, նրա դեմքի արտահայտությունից զգացի, որ վտանգավոր բան է և նա ելնելով խալի տեսքից համենայնդեպս լավ բան չի մտածում:

-Երեկ երակ է,- ասացի:

-Այդ մասում երակ չկա,- ասաց,- համենայնդեպս ձեռք մի տուր:

Թե անկեղծ լինեմ, ես չէի վախենում, միայն աշխատում էի զգույշ լինել, որպեսզի որևէ բանի չկպչի, քանի որ մի հասարակ բանից արյունահոսություն էր սկսվում: Մի քանի անյգամ աղոթեցի, Տիրոջը խնդրելով, որ եթե իրեն հաճելի է, վերացնի այդ չարաբաստիկ խալը: Անցան օրեր, այդ խալ կոչված վերքը ձեռքիս վրա մնաց մոտ երկու տարի: Հետո, չգիտես ինչպես

վերացավ։ Նախ սմբեց, Հետո կամաց-կամաց վերացավ և հիմա միայն ձախ ձեռքիս վրա մնացած սպին է, որ ինձ հիշեցնում է դրա մասին։

ՍԿԻՅԻ ՉՈՐՈՒԹՅՈՒՆԸ

Դեպքը տեղի է ունեցել Աշտարակ քաղաքի Սուրբ Մարիանե եղեղեցում, 2007 թվականի ամռանը։ Այդ օրը կիրակի էր և ես, քանի որ ծառայում էի եկեղեցում, առավոտյան, Պատարագից առաջ գնացի եկեղեցի, որպեսզի ամեն ինչ պատրաստեմ Պատարագի համար։ Սակայն երբ հերթը հասավ Սուրբ նշխարը սկիհի վրա դնելուն, ականատես եղա մի հրաշալի իրողության։ Անցած կիրակի պատարագից հետո մոռացել ու չէին հանգցրել մոմերը։ Նրանք վառվել էին, հետո հերթը հասել էր պլաստմասսայի մոմոկալներին, որոնք նույնպես հալվել էին։ Մոմակալները դրվում էին սկիհը ծածկող լայն, սինթեթիկ կտորի վրա։ Հալված մոմը, նաև մոմակալը թափվել էին սկիհը ծածկող կտորի վրա, բայց զարմանալի կերպով այն չէին վնասել, այլ հալվելով նրա վրա մոտ մեկ սանտիմետր հաստությամբ մի շերտ էին գոյացրել։ Բոլոր տեսակի տրամաբանական օրենքներն ասում էին, որ պետք է նաև այդ սինթեթիկ կտորն այրվեր և պատճառ դառնար հրդեհի, սակայն այն ոչ միայն չէր բռնկել, այլ նույնիսկ նրա վրա որևէ հետք անդամ չէր մնացել։ Դա Սուրբ հաղորդության բաժակի՝ Սկիհի գորությունն էր, որ թույլ չէր տվել, որ իր վրա փռած ծածկոցն այրվեր։

ԳԵՎՈՐԳ ՔԵՇԻՇՅԱՆ
ք. Աշտարակ

ՍՈՒՐԲ ՏԻՐԱՎՄՈՐ ՏԵՍԻԼՔԸ

1988 թվականի դեկտեմբերի 7-ի աղետաբեր երկրաշարժի պատճառով որքան անմեղ զոհեր եղան: Շատերը զոհվեցին, ոմանք գրկվեցին ծնողներից ու հարազատներից, ոմանք՝ երեխաներից: Երկրաշարժի հետևանքով են զոհվել նաև իմ ընկերոջ եղբայրն ու քույրը: Ընկերս ծնվել է երկրաշարժից հետո և չի տեսել իր եղբորն ու քրոջը: Հասկանալի է, որ ծնողները որքան էլ միսիթարվեհն նորածին երեխայով, միևնույն է, չէին կարող մոռանալ երկրաշարժի զոհ դարձած իրենց երախաներին:

90-ական թվականնեի սկզբին ըմկերոջս հայրը՝ Գառնիկը գնացել էր Դիլիջան՝ հանգստանալու: Մթնշաղ էր և ինքը դուրս էր եկալ պատշգամբ՝ հիանալու լեռնային մայրամուտով: Ով եղել է Դիլիջանում, գիտե, թե որքան գեղեցիկ է իրիկնամուտն այնտեղ:

Չէր մտածում ոչ մի բանի, մանավանդ, կորցրած զավակների մասին, այլ փորձում էր ըմբռչւնել մայրամուտը: Եվ հանկարծ աչքերի առաջ մի շատ զարմանալի տեսիլք բացվեց: Օդի մեջ հայտնվեց Տիրամայրը, գրկի մեջ՝ փոքրիկ վահեն ու Աննան:

Նա ամեն անգամ այդ հիշելիս հուզմունք, զարմանք ու հիացմունք է ապրում, սակայն նաև չի կարողանում զսպել ուրախության արցունքները:

ԱՐՄԱՆ ԱԲՐԱՅԱՆՅԱՆ
ք. Գյումրի

ՕԴԻՑ ԿԱԽՎԱԾ

Այս դեպքն ինձ պատմել է ընկերու՝ Արմենը, որ ապրում է Երևանում՝ Նորքի չորրորդ զանգվածում։ Նա, երբ ծառայելիս է եղել բանակում, հրաշալի կերպով դարձի է եկել։

-Ծառայում էի Լեռնային Ղարաբաղի հանրապետության Մարտակերտի շրջանում,- պատմում է նա,- նորոգում էինք զորամասի շենքերից մեկի տանիքը։ Հանկարծ ոտքս սայթաքեց և տանիքից ցած գլորվեցի։ Ներքեում պայթուցիկ նյութեր էին և եթե ընկնեխ դրանց վրա, պայթյունն անխուսափելի կլիներ։ Այն ոչ միայն իմ կյանքին վերջ կտար, այլև հսկայական ավերածություններ կգործեր։ Սակայն հենց այդ ժամանակ հրաշք տեղի ունեցավ։ Ում պատմում եմ, չի հավատում, որ ես կախված մնացի ... օդից։ Զեռքս գցեցի և բռնվեցի ինչ-որ բանից, բայց այդ «ինչ-որը» շոշափելի չէր, օդ էր պարզապես։ Ականատեսները շատ են։ Նրանք իրար խառնվեցին, արագ մոտեցավ կողքին աշխատող ամբարձիչը և ինձ ցած իջեցրեց։

Այդ դեպքը ինձ համար վճռորոշ եղավ։ Ես մինչ այդ Աստծուն չէի հավատում։ Դրանից հետո դարձի եկա և հիմա գիտեմ, որ Նրա համար ոչ մի անհնարին բան չկա։

ԵՐԿԱՐ ՃԱՍԱՊԱՐՅԸ

Այդ դեպքը նույնպես Արմենն է պատմել։ 1996-1997թթ. թվականներին է եղել, երբ նա ծառայելիս է եղել բանակում։

-Այդ օրը,- պատմում է նա,- մեր ջոկը՝ 10 հոգի, գալիս էր դիրքերից։ Վերջացել էր մեր հերթափոխը և զորամաս էին գնում։ Դիրքերից զորամաս գնալու երկու ճանապարհ կար, մեկը կարճ՝ անտառի միջով, մյուսը՝ շրջանցիկ։ Հասկանալի է, որ մենք միշտ կարճ ճանապարհն էինք ընտրում։ Ասեմ, որ դա տանիքի դեպքից հետո էր։ Ուրեմն այդ անգամ էլ որոշեցինք

անտառի միջով անցնող կարճ ճանապարհով գնալ։ Հանկարծ ես ձայն լսեցի.

-Անտառով մի՛ գնա, Արմեն։

Բանի տեղ չդրեցի. «Երկի հոգնած եմ, գիշերը չեմ քնել, դրանից է», - մտածեցի։ Բայց նորից ականջիս զնչեց նույն ձայնը.

-Արմե՞ն, անտառով մի՛ գնա։

Դարձյալ բանի տեղ չդրեցի։ Երրորդ անգամ ասես մեկը քաշեց շորիցս և ականջիս մեջ գոռաց.

-Ասում եմ՝ անտառով մի՛ գնացեք։

Ես կատարվածից շշմած՝ սկսեցի ընկերներիս համոզել, որպեսզի շրջանցիկ ճանապարհով գնանք, բայց խելքի մոտ բա՞ն էր անտառի կես ժամանոց ճանապարհը թողած՝ շրջանցել անտառը և ճանապարհը երկարացնել մի երկու ժամով։ Որքան էլ ասացի, թե ինձ հետ ինչ է կատարվել, որքան էլ համոզեցի, բան դուրս չեկավ։ Ծիծաղեցին վրաս, ասածս բանի տեղ չդրեցին ու գնացին անտառով, իսկ ես ընտրեցի շրջանցիկ ճանապարհը։

Հիմա այս ամենը պատմում եմ սրտի ցավով, քանի որ իմ ընկերները գնացին անտառով ու... պայմեցին ականի վրա։

ՅՐԱՍՏ ԱՂԱՍՅԱՆ
Երևան,

ԴԱՐՁԻ ԵԿԱԾ ՄԱՅՄԵԴԱԿԱՆԸ, ՈՐԻՆ ՓՐԿԵԼ ԷՐ ԱՍՏՎԱԾՈՒԶԸ

Իրաքցի Ահմեդ Ըստուբեկին ես հանդիպեցի Եվրոպայում։ Նա մահմեղական էր եղել, ջերմառանդ մահմեղական։ Ամեն օր Ղուրան էր կարդում ոչ միայն իր, այլև ընկերների համար։ Օրերից մի օր իր հայ ընկերներից մեկը նրան արաբերեն թարգ-

մանված մի Աստվածաշունչ նվիրեց: Ահմեղը այն չէր կարդում, բայց Ղուրանի հետ պահում էր պայուսակի մեջ: Լիբանանա-իսրայելական պատերազմի ժամանակ նա «Կարմիր խաչում» էր աշխատում: Իսրայելական ռմբակոծությունների ժամանակ «Կարմիր խաչի» բոլոր աշխատակիցները և քրիստոնյաները, մոտ 150 ընտանիք, հավաքվեցին քրիստոնեական եկեղեցում, վստահ լինելով, որ հրեաները եկեղեցին չեն ոմբակոծի: Այդ ժամանակ ահա «Հեղողլահի» գրոհայինները բերեցին, թնդանոթները դրեցին եկեղեցու բակում և սկսեցին կրակ բացել հրեաների ուղղությամբ: Հրեաները տեսան՝ եկեղեցու բակից կրակում են և պատասխան կրակ բացեցին: Եկեղեցին քանդվեց, մեջը գտնվող բոլոր մարդիկ, բացի իրենից ու իր ընտանիքից, զոհվեցին: Ահմաղը այդ հրաշքը վերագրեց Աստվածաշնչի զորությանը: Դրանից հետո մկրտիկ ու քրիստոնյա դարձավ:

Բայց երկի կինը վախեցել էր երեխաների համար: Բանն այն է, որ մահմեղականները շատ վատ են վերաբերվում հավատափոխ եղած, քրիստոնյա դարձած ազգակիցների հետ: Մի քանի օր անց կինը երեխաների հետ հեռացել էր Ահմաղից: Գնացել էր գիշերով, գնալուց առաջ նամակ թողնելով.«Եթե ուզում ես մեզ գտնել, իմացի՛ր, մենք Բաղդադ ենք մեկնել»: Զմոռանամ ասել, որ Ահմաղը շեյխի որդի էր, հետևաբար նրա պատիժը հավատափոխության համար ավելի խիստ կարող էր լինել: Նա վախենում էր, որ նախկին հավատակիցներն իրեն կսպանեն: Դրա համար էլ հեռացավ Լիբանանից, գնաց Կանադա: Այժմ Ահմաղ Ըստուբեյին հաստատվել է Կանադայում: Աշխատում է, դրամ հավաքում, այդ դրամով Աստվածաշունչ է տպագրում և տարածում մահմեղական երկրներում:

-Ինչպես որ Աստվածաշունչն ինձ փրկեց, թող այդպես էլ ուրիշներին փրկի,- ասում է նա:

ԱՐԻՍ ՔՈԹՈՒՅԱՆ
Բեղջիա

ԻՄ ՊԱՅԱՊԱՆՆ ԱՍՏՎԱԾ Է

1982 թվականի ամռանն էր: Ես նոր էի ավարտել 7-րդ դասարանը, փոխադրվել էի 8-րդ դասարան և ամառային արձակուրդները անց էի կացնում Սևանա լճի ափին՝ հանգստյան տներից մեկում, որի տնօրենն այն ժամանակ հայրս էր: Հանգստյան տան մոտակայքում մի ժայռ կա՝ իսկական արծվաբույն՝ բարձր ու հպարտ: Ժայռի մոտակայքում էլ մի շատ սառնորակ աղբյուր է բխում: Ես ու եղբայրս հաճախ էինք գնում այդ ժայռի մոտ, մագլցում նրա կատարը, մեզ լեռնագնաց երեակայում... Բարձրանում ես ժայռի կատարը, այնտեղից նայում ոտքերիդ տակ փոված աշխարհին, ասես անմիջապես ժայռի ստորոտին ծփացող Սևանին և աշխարհը բոլորովին ուրիշ գույնով է երևում աչքիդ:

Այդ օրն էլ գնացինք մեր սովորական տեղը, բայց այս անգամ ի տարբերություն եղբորս, որ ժայռի գագաթ բարձրացավ անվնաս ճանապարհով, ես որոշեցի դժվար ճանապարհն ընտրել: Բարձրացա ձորի միջով, դժվարությամբ մագլցեցի, համարյա հասնում էի գագաթին... Զեռքս գցեցի քարին, բայց այն պոկվեց և ես գլորվեցի ներքե՝ ինձ հետ տանելով քարերի հսկայական մի հոսք: Գլորվեցի ձորը՝ մոտ 20-25 մետր ներքեւ: Վերեկից պոկված քարերը լցվեցին վրաս:

Ամբողջ մարմինս սալջարդ էր եղել, բագուկներիս վրայի մաշկը պլոկվել էր, բայց ոսկորին բան չէր եղել: Եղբայրս տեսավ իմ գահավիժելը, վերեկից վազեվազ հասավ ինձ, բարձրացրեց: Նրան, և հետագայում իմ ընկած տեղն ուսումնասիրողներին թվում էր, թե ես ամբողջովին ջարդուխուրդ պիտի եղած լինեմ, սական... ինձ մի կերպ հանեցին ձորից, հասցրին հանգստյան տուն, վախեցած հայրս ինձ տարավ հիվանդանոց: Ստուգեցին, բայց ոչ մի վտանգավոր բան չգտան: Մարմինս ցավում էր, մաշկս պլոկվել էր, բայց ոչ մի կենսական կարևոր օրգանի բան չէր եղել:

Այդ պահից սկսած իմ մեջ կտրուկ ու վճռական փոփոխություն տեղի ունեցավ: Ես սկսեցի հավատալ Աստծուն, և այդ հավատը չի խաթարվել մինչև օրս: Այն ժամանակ, և հիմա էլ, ես հավատացած եմ, որ ինձ փրկողը և իմ պահապանն Աստված է:

ԱՐՂՄ ԱԲՐԱՀԱՄՅԱՆ

Սևամի գաղի գրասեմյակի շահագործման բաժնի պետ

ՄԻԽԱՅԻԼ ՏՈԼՈՏՈՅ

ԿԵՆԴԱՆԻ ՄԵՌԱԾԸ (պատմվածք)

Երկաթուղով Նիժնի-Նովգորոդից Մոսկվա վերադառնալիս Վլադիմիր կայարանի սպասարանի անկյունում նկատեցի մի հոգեռորականի, որն ուշադրությամբ ինչ-որ գիրք էր կարդում: Ակներեաբար այն աղոթագիրք էր: Ծերունու տեսքը գրավեց իմ ուշադրությունը. ալեհեր մազերը, ձյունի պես սպիտակ մորուքը կարծես հակասում էին սև ու խոշոր աչքերի կենդանի, խոր, ասես պատանեկան հայացքին: Երբ նա վերջացրեց ընթերցանությունն ու փակեց գիրքը, ես նստեցի կողքին ու խոսակցությունը բացեցի: Շուտով իմացա, որ նա վարդապետ Գ-ն է, հիմնադիրը մի վանքի, որտեղ նա ճգնում է արդեն երեսուն տարի, իսկ աշխարհիկ կյանքում եղել է լեյբգվարդիական սպա:

-Ինչպես եղավ, որ Դուք, լինելով գվարդիական գնդի սպա, որոշեցիք վանական դառնալ,- հարցրեցի ես,- ճիշտ է, որ Զերկյանքում ինչ-որ արտառոց բան է կատարվել:

-Զեզ հաճույքով կպատմեի իմ կյանքի պատմությունը, կամ այն մասին, թե ինչպես ինձ՝ մեղավորիս, այցելեց Աստծո ողորմածությունը,- պատասխանեց նա,- բայց իմ պատմությունը երկար է: Շուտով կհնչի զանգը, և մենք ստիպված կլինենք բաժանվել: Զէ՞ որ մենք առանձին վագոններով ենք ճամփորդում:

Ես փոխադրվեցի զրուցակցիս վագոնը։ Բարեբախտաբար այն ազատ էր, և մեզնից բացի ուրիշ ոչ ոք չկար։ Եվ նա ինձ պատմեց հետեւյալը։

-Խիղճս տանջում է ինձ և թախիծը պատում է հոգիս, երբ ինձ հիշում եմ անցյալում,- այսպես սկսեց Հայր Գ.-Ն.,- ես ծնվել եմ Հարուստ և անվանի ընտանիքում։ Հայրս գեներալ էր, իսկ մայրս՝ ծնյալ իշխանուհի։ Յոթ տարեկան էի, երբ Հայրս մահացավ Լայպցիգի ճակատամարտում ստացած վերքից²։ Մայրս ավելի վաղ էր մահացել։ Որբիս խնամքն ստանձնեց տատս, որ իշխանուհի էր։ Ինձ համար ֆրանսիացի դաստիարակ վարձեցին, որ Ռուսաստան էր փախել մահապատժից փրկվելու համար։ Այդ ինքնակոչ ուսուցիչը որևէ գաղափար չուներ ո՛չ հոգու անմահության, ո՛չ Աստծու, ո՛չ էլ մարդու բարոյական պարտականությունների մասին։ Ես ի՞նչ կարող էի սովորել նման ուսուցչից։ Ֆրանսերեն խոսել փարիզյան արտասանությամբ, վարպետորեն պարել, իրեն լավ պահել հասարակության մեջ։ Ասենք այդ ամենի մասին մտածելն իսկ Հիմա սարսափելի է։ Տասու և մյուս բարձրաշխարհիկ հարազատներս հիանում էին ինձ նման ճարպիկ տղայով։ Նրանցից ոչ ոք չգիտեր, թե որպիսի նողկալի անառակություն և որքան զազրանք էր թաքնված իմ արտաքին գեղեցիկ կեղեկի տակ։

Երբ լրացավ իմ տասնութ տարին, ես արդեն յունկեր էի գվարդիական գնդում և երկու հազար հոգի ունեցող կալվածատեր։ Ինձ հովանավորում էր քեռիս, որ վարպետ էր դրամ մսխելու մեջ և ինձ նույնպես սովորեցրեց այդ ոչ դժվար արվեստը։ Շուտով ես հենց նույն գնդում ստացա կոռնետի՝ կրտսեր սպայի աստիճան։ Երկու տարի անց նշանվեցի մի իշխանուհու հետ, որը ժամանակի ամենանշանավոր գեղեցկուհիներից մեկն էր։ Մոտենում էր հարսանիքի օրը։ Բայց Աստծո Նախախնամությունն

² Լայպցիգի ճակատամարտը տեղի է ունեցել 1813 թվականին.- (թարգմ.):

ինձ համար այլ ճանապարհ էր պատրաստել: Երևում է, որ Տերը խղճացել էր իմ խեղճ հոգուն:

Հարսանիքից մի քանի օր առաջ՝ սեպտեմբերի 15-ին, ես տուն էի վերադառնում պալատի պահակակետից: Օրը հրաշալի էր: Ես իմ վարդաձին չհեծա և ոտքով սկսեցի քայլել Նեայի պողոտայով: Տիուր էի, ինչ-որ անբացատրելի թափիծ ճնշում էր կուրծքս, ինչ-որ մոայլ կանխազգացում ծանրացնում էր հոգիս...

Անցնում էի Կազանյան տաճարի մոտով և ներս մտա. ծննդյանս օրից ի վեր առաջին անգամ ցանկացա աղոթել եկեղեցում: Ինքս էլ չգիտեմ, թե ինչպես պատահեց, բայց սրտանց աղոթեցի Սուրբ Տիրամոր հրաշագործ պատկերի առջև, աղոթեցի ինչ-որ անտեսանելի վտանգ հեռացնելու համար, ամուսնական երջանկության համար: Եկեղեցուց դուրս գալիս ինձ կանգնեցրեց մի ցնցոտիավոր կին, որ ծձկեր երեխա ուներ, և ողորմություն խնդրեց: Մինչ այդ ես անողորմ էի աղքատների նկատմամբ, բայց այս անգամ խղճացի աղքատ կնոջը, նրան փող տվեցի և շշնջացի. «Աղոթիր ինձ համար»: Քայլելով մի քիչ առաջ գնացի, բայց ինձ վատ էի զգում: Վրաս տաք ու սառը քրտինք եկավ, մտքերս խառնվեցին: Հազիվ հասա տուն և ուշագնաց ընկա, ի սարսափ իմ հավատարիմ Ստեփանի, որ մանկուց ի վեր ինձ մոտ էր և հաճախ (ավաղ, անօգուտ) ինձ հետ էր պահում բազում հիմար արարքներից:

Հետո ինչ է եղել, չեմ հիշում: Միայն, ինչպես երազում, հիշում եմ, որ իմ շուրջն էին հավաքվել բժիշկները, ուրիշ էլի ինչ-որ մարդիկ, որ սարսափելի ցավում էր գլուխս և ամեն ինչ պտտվում էր:

Վերջապես լիովին ուշագնաց եղա: Ինչպես հետո իմացա՝ այդպես շարունակվել է տասներկու օր ու գիշեր: Հետո ես ասես արթնացա: Զգում եմ՝ գիտակցությունս տեղն է, բայց աչքերս բացելու և նայելու ուժ չունեմ, չեմ կարողանում բերանս բացել

և ձայն հանել: Զեմ կարողանում շրջապատին կյանքի թեկուզեւ փոքրիկ նշան ցույց տալ, անկարող եմ մարմնիս որևէ մասը շարժել: Լսում եմ՝ կողքից մի հանդարտ ձայն է գալիս.

-Տերն իմ հովիվն է

և ինձ ոչինչ չի պակասի:

Դալար վայրերում Նա ինձ բնակեցրեց

և հանդարտ ջրերի մոտ ինձ սնուցեց:

Նա կենդանացրեց ինձ հանուն իր անվան,

առաջնորդեց ինձ իր արդարության ճանապարհով:

Եթե նույնիսկ անցնեմ մահվան ստվերների միջով,

չեմ վախենա չարից, քանզի Դու, Տեր, ինձ հետ ես: (Սաղմ. 22):

Մենյակի անկյունից լսվում էր իմ երկու ծառայակցի խոսակցությունը: Ես ճանաչեցի ձայները.

-Ափսոս, խեղճ Վ.-Ն,- ասում էր մեկը,- նրա համար գեռես - վաղ էր մեռնելը: Ինչպիսի կարողություն ուներ, ինչ կապեր և ինչպիսի գեղեցկուհի հարսնացու:

-Հարսնացուի հարցում շատ ափսոսալ չարժե,- պատասխանեց մյուսը,- ես վստահ եմ, որ նա նշանվել էր շահից ելնելով: Իսկ Վ.-ին իսկապես ափսոսալ արժե, հիմա այլես չկա մեկը, որից հնարավոր լիներ փոխարինաբար դրամ վերցնել: Նրանից միշտ էլ կարելի էր երկար ժամանակով պարտք վերցնել:

-Երկար ժամանակով: Ուրիշներն ընդհանրապես պարտք չէին տալիս... Ի դեպ, հնարավոր է, որ նրա ձիերը ծախեն էժան գնով, լավ կլիներ, որ մի հեծկան ձի առնեինք:

«Այս ի՞նչ է,- մտածում էի ես,- մի՞թե իմ հոգին լսում է, թե իմ շուրջն ինչ են խոսում, զգում է, թե ինչ են խոսում իմ մեռած մարմնի շուրջը: Նշանակում է ես մարմնից անկախ հոգի^o ունեմ, անմահ հոգի^o: (Թշվառ մեղավորս առաջին անգամ էի հանգում նման եղրակացության): Ոչ, չի կարող այնպես լինել, որ ես մեռ-

նեմ: Ես զգում եմ, որ անշարժ պառկած եմ, զգում եմ, թե համազգեստն ինչպես է սեղմում կուրծքս: Նշանակում է՝ ես ողջ եմ: Կպառկեմ, կհանգստանամ, ուժերս կհավաքեմ և կբացեմ աչքերս: Ինչպես կզարմանան ու կսարսափեն բոլորը»:

Անցավ մի երկու ժամ: (Ես ժամանակը կարողանում էի հաշվել հարեւան սենյակում կախված պատի ժամացույցի զարկերով):

Սաղմոսարանի ընթերցանությունը շարունակվում էր: Երեկոյան հոգեհանգստին բազմաթիվ հարազատներ ու ծանոթներ կային: Բոլորից առաջ իմ հարսնացուն եկավ, հոր՝ ծեր իշխանի հետ:

-Դու պիտի տիսուր տեսք ունենաս, եթե կարող ես, լաց եղիք,- ասաց հայրը:

-Մի՛ անհանգստացեք,- պատասխանեց դուստրը,- կարծում եմ, որ ես կարողանում եմ ինձ հավուր պատշաճի պահել: Բայց ներեցեք, չեմ կարողանա ինձ ստիպել, որ լաց լինեմ: Դուք գիտեք, որ ես Վ.-ին չէի սիրում և նրա հետ ամուսնանալ էի համաձայնել միայն Զեր ցանկությամբ: Ես ինձ զոհաբերեցի հանուն ընտանիքի:

-Գիտեմ, գիտեմ, բարեկամս,- շարունակեց ծերունին,- բայց ի՞նչ կասեն, եթե քեզ անտարբեր տեսնեն: Այս կորուստը շատ մեծ վիշտ է մեզ համար: Քո ամուսնությունը կկարգավորեր մեր գործերը: Հիմա որտեղի՞ց գտնես նման ձեռնտու գործարք:

Հասկանալի է, որ այս խոսակցությունը տեղի էր ունենում ֆրանսերենով, որպեսզի ծառաները չկարողանան հասկանալ: Միայն ես էի լսում ու հասկանում...

Հոգեհանգստից հետո ինձ հրաժեշտ տալու համար մոտեցավ նախկին հարսնացուս: Նա շուրթերը պինդ հպեց իմ սառը ձեռքին և կարծես թե երկար ժամանակ չէր կարողանում կտրվել

ու հեռանալ: Նրան ուժով հեռացրին, որ ինքն իրեն չսպանի վշտից: Շուրջ բոլորը շշնջում էին.

-Որքան ցավալի է, ինչպես էր սիրում հանգուցյալին...

Ծ, աշխարհի կապեր, որքան խաբուսիկ ու անհաստատ եք դուք: Աչա ընկերական սերը, աչա և հարսնացուի սերը: Իսկ ես՝ թշվառ անխելքս, նրան սիրում էի անմնացորդ և այդ սիրո մեջ էի տեսնում իմ երջանկությունը:

Երբ հոգեհանգստից հետո բոլորը հեռացան, ես լսեցի, թե ինչպես է ինձ վրա ողբում Ստեփանը՝ այդ բարի ծերունին: Նրա արցունքները կաթում էին իմ դեմքին:

-Դու մեզ ո՞ւմ թողեցիր, աղավնյակս,- հեկեկում էր ծերունին,- Հիմա ի՞նչ կլինի մեզ հետ: Ես քեզ աղաչեցի, որ պահպանես քեզ, պարոն, իսկ դու նույնիսկ լսել չուզեցիր: Քեզ քո բարեկամները կործանեցին գինով և բազում անառակություններով: Իսկ Հիմա նրանք նույնիսկ չեն վշտանում: Քեզ վրա միայն մենք՝ քո ծառաներն ենք լաց լինում:

Ստեփանի հետ նաև իմ այն գյուղացիներն էին լալիս, որոնք ապրում էին Պետերբուրգում: Նրանք սրտանց սիրում էին ինձ, քանի որ ես նրանց չէի նեղում և չէի ավելացնում բահրան: Խղճի դեմ մեղանչած չլինելու համար ասեմ, որ այդպես էի վարդում իմ անփութության պատճառով: Ես փողի պակաս չէի զգում, ոչ միայն իմ պահանջները բավարարելու, այլև գլուխս եկած ցանկացած այլանդակությունն անելու համար:

Ես իմ նկատմամբ իսկական սեր գտա հասարակ մարդկանց՝ ծառաների սրտերում:

Եկավ երկար, անվերջ թվացող գիշերը: Ես սկսեցի լսել Սաղմոսարանի ընթերցանությունը: Այն մինչ այդ անձանոթ էր ինձ: Առաջ ես ոչ մի անգամ բաց չէի արել այդ աստվածային քաղցր գիրքը:

-Քեզ կանչեցի, Տեր, անարձագանք մի թողնիր ինձ,

Աստված իմ. Եթե երբեք լուս մնաս,
Կամանվեմ պրանց, ովքեր գերեզման են իշնում:
Լսիր, Տեր տառապանքիս ձայնը, երբ ես աղաչեմ Քեզ,
Եթր ձեռքերս դեպի սուրբ տաճարդ պարզեմ:
Ամբարիշտմերի շարքը մի դասիր ինձ և մի կործանիր ինձ պրանց
հետ,
որ անօրինություն են գործում,
որ հաշտության մասին են խոսում իրենց ընկերների հետ,
բայց սրտներում չարություն կա...
...Տերն է իս օգնականն ու պաշտպանը
Նրա վրա դրեց իր հուսալ սիրտն իմ,
և մարմինս գոհացավ ու զվարճացավ.
Ես հոժարակամ պիտի փառաբանեմ Նրան: (Սաղմ.27, 1-3 և 7):

* * *

Տեր, Քո զայութով մի հանդիմանիր ինձ և մի խրատիր,
քանզի Քո նետերն ինձ հարվածեցին,
Քո ձեռքն ինձ վրա ծանրացավ:
Ինձ համար բուժում չկա Քո բարկության դեմ,
...Տեր, ամբողջ ցանկությունս առջևու է, և հառաչանքս չծածկվեց
Քեզնից:
Սիրտս պղտորվեց իմ մեջ, և ուժս լքեց ինձ,
աչքերիս մեջ լուսի նշույլ իսկ չմնաց: (Սաղմ. 37, 1-4, 10-11):

**Սաղմոսի այս բառերը մտնում էին սրտիս մեջ, ես մտքիս
մեջ ջերմությամբ կրկնում էի դրանք և աղոթում ջերմորեն:** Ողջ
անցած կյանքս՝ ասես զանազան անմաքրություններով պատաժ
կտավ, բացվում էր աչքերիս դեմ: Ինչոր անտեսանելի, սուրբ

բան ինձ հրապուրում, կանչում էր դեպի իրեն: Ես խոստացա ապաշխարել, ուղղվել, երդվեցի կյանքս նվիրել ողորմած Տիրոջ ծառայությանը, եթե Նա ինձ ողորմա:

Իսկ եթե վիճակված չէ՝ ապրել, եթե այս կենդանի մահը վերջ չունենա և ինձ՝ կենդանի մեռյալիս, ողջ-ողջ թաղե՞ն: Զեմ կարող հիմա լրիվ պատմել այն ամենը, ինչ զգացի այն սարսափելի և անմոռանալի գիշերը: Միայն այն ասեմ, որ հաջորդ օրը Ստեփանն իմ գլխի պատանեկան շեկ խոպոպների մեջ սպիտակ մազափունջ հայտնաբերեց: Նույնիսկ հետագայում, երբ երազիս մեջ տեսնում էի դագաղի մեջ անցկացրած այդ գիշերը, սարսափահար վեր էի թռչում ճիշով և մարմինս պատած էր լինում սառը քրտինքով:

Հույսը բացվեց և ավելի ուժգնացան հոգեկան տվայտանքները: Ինձ վիճակված էր լսել իմ մահվան դատավճիռը: Իմ կողքին ասում էին. «Այսօր երեկոյան հոգեհանգիստն է, իսկ վաղը թաղումն է նեայի մայրավանքում»:

Առավոտյան հոգեհանգստի ժամանակ ինչ-որ մեկն իմ դեմքին քրտինքի կաթիլ նկատեց և այն ցույց տվեց բժշկին:

-Ոչ,- ասաց նա,- դա սենյակի ջերմությունից առաջացած ջրի կաթիլ է: Ապա շոշափեց զարկերակս ու շարունակեց.

-Երակազարկ չկա: Կասկած չկա, որ նա մահացել է:

Աննկարագրելի տառապանք է մեռած համարվելը՝ սպասելով այն բոպեին, երբ կմեխեն դագաղի կափարիչը, ուր պառկած ես դու և հողը կլցնեն նրա վրա: Սարսափելի է այն, որ դու այլևս հնարավորություն չես ունենա քո ողջ լինելը արտահայտել ո՛չ հայացքով, ո՛չ ձայնով, ո՛չ շարժումով:

Ես զգում էի, որ այսօր իմ ուժերը երեկվա համեմատությամբ ավելի են պակասել: Հույս չկար: Սարսափելի հուսահատությունը տիրեց ինձ, արյունը գլխիս խփեց, ինձ թվաց, թե ներքին օրգաններս սեղմվում ու ցավում են, սրտիս միջից դուրս

են գալիս չարության, անեծքի հոսանքներ... Բայց երկի իմ Պահապան Հրեշտակը պահպանեց ինձ. ինչ-որ ներքին զգացում ինձ ստիպում էր աղոթել այն աղոթքի բառերով, որոնք լսել էի դադաղի մեջ պառկած:

«Տեր իմ, ողորմիր ինձ, գթա ինձ, ևս կործանվում եմ... Վատն եմ ես, անմաքուր, շատ ու անհաշիվ են իմ մեղքերը, բայց անչափ է ողորմությունը Քո: Ողորմիր ինձ, Տեր, քանզի խռովեցին ոսկերք իմ, ինձ խիզճս մաքրելու ժամանակ տուր, անցած կյանքս քննելու հնարավորություն: Քոնն եմ, փրկի՛ր ինձ»:

Ես այսպես կանչեցի Հոգուս խորքից՝ ալեկոծվելով մահվան նախաշեմին գտնվողի թախիծով:

Անցան մի քանի տառապալից ժամեր, և ես արդեն չէի աղոթում կյանք վերադառնալու համար: Ես հանգիստ մահ էի խնդրում՝ որպես առաջիկա տառապանքներից ազատվելու ամենալավ միջոց:

Աղոթքի մեջ կամաց-կամաց հանգստացավ Հոգիս, և գերեզմանում դանդաղ մահվան հեռանկարն ինձ երևում էր որպես արդյունք իմ վաստակած մեղքերի: Ես ինձ ամբողջովին հանձնեցի Աստծո կամքին և միայն մի բան էի ցանկանում՝ մեղքերի թողություն:

Ես այդպիսի զգացում ունեի երեկոյան Հոգեհանգստի ժամանակ, երբ սկսեցին ինձ վրա երգել. «Քո անձառելի փառքի պատկերն եմ և մեղքի խոցերն եմ կրում: Ողորմիր Քո արարածին, Տե՛ր, և մաքրիր Քո ողորմածությամբ և փափագելի հայրենիքին արժանացրու ինձ, ինձ դրախտի բնակիչ դարձրու:»

Հոգեհանգստն ավարտվեց, և ինչ-որ մարդիկ վերցրին իմ դադաղը: Նրանք շարժեցին ինձ և հանկարծ իմ կրծքից անսպասելի մի հառաջ պոկվեց: Նրանցից մեկն ասաց մյուսին.

-Կարծես թե հանգուցյալը հառաչեց:

-Զէ՛, քեզ թվաց,- պատասխանեց մյուսը:

Բայց իմ կուրծքն ազատվեց այն սեղմող հեղձուկից, և ես բարձր տնքացի: Բոլորը նետվեցին իմ կողմը: Բժիշկն արձակեց համազգեստը, ձեռքը դրեց սրտիս վրա և զարմացած ասաց.

-Սիրտն աշխատում է, նա շնչում է, նա ողջ է: Զարմանալի դեպք է սա:

Ինձ արագ տեղափոխեցին ննջասենյակ և անկողին դնելով՝ սկսեցին մարմինս շփել ինչ-որ սպիրտով: Շուտով ես աչքերս բացեցի և հայացքս առաջինը ընկապ Փրկչի պատկերին, այն նույն պատկերին, որը (ինչպես հետագայում իմացա) դրված էր իմ դագաղի գլխավերեռում՝ գրակալի վրա:

Արցունքի վտակներ էին հոսում իմ աչքերից՝ թեթևացնելով սիրտս: Մահճակալի մոտ կանգնել էր Ստեփանը և լալիս էր ուրախությունից: Իմ կողքին նատել էր բժիշկը և համոզում էր հանգիստ մնալ: Նա չէր հասկանում իմ վիճակը:

Ինձ բժշկի օգնությունը պետք չէր. երիտասարդիս ուժերն արագ վերականգնվում էին: Ասենք, ես նրան շնորհակալ եմ այն բանի համար, որ նա, իմ խնդրանքի համաձայն, կողմնակի անձանց մուտքն արգելեց, որպեսզի «չանհանգստացնեն հիվանդին»:

Ես մի քանի օր անցկացրի կատարյալ մենության մեջ՝ չտեսնելով ոչ մի օտար դեմք: Ինձ համար ուրախություն և հոգու սնունդ էին Դավթի աստվածային երգերը: Նրանցից սովորեցի ճանաչել Աստծուն, սիրել նրան և ծառայել նրան:

Հետաքրքրությունից դրդված՝ շատ ծանոթներ էին հավաքվում գոների մոտ՝ փորձելով տեսնել ողջացած մեռյալին: Ամեն օր այցելում էր աներս: Նա երեխ աշխատում էր ձեռքից բաց չթողնել ձեռնտու գործարքը: Բայց ես ոչ ոքի չէի ընդունում:

Առողջանալուն պես իմ առաջին գործը եղավ Փրիստոսի Մարմնով և Արյամբ Հաղորդվելու խորհրդին նախապատրաստ-

վելը: Հոգևոր կանքում փորձառու հայր Մ.-ն էր իմ հոգևորականը: Նա իմ մեջ ամրապնդեց հոգևորական դառնալու վճռականությունը: Բայց ես այդքան շուտ չկարողացա ազատվել աշխարհիկ գործերից: Ամենից առաջ հրաժարվեցի նշանավոր իշխանի փեսան և գեղեցիկ իշխանուհու ամուսինը դառնալու պատվից: Հետո հրաժարվեցի զինվորական ծառայությունից, ազատ արձակեցի իմ գյուղացիներին՝ նրանց դարձնելով ազատ հողագործներ: Իմ ամբողջ ունեցվածքը վաճառեցի և փողը ծախսեցի բարի նպատակներով: Մնացած ունեցվածքը տվեցի օրինական ժառանգներին: Այդպիսի հոգսերի մեջ անցավ մի ամբողջ տարի: Վերջապես աշխարհիկ հոգսերից ազատվելով՝ ես կարող էի խաղաղ հանգրվան փնտրել և ինձ համար բարի բաժին ընտրեցի:

Եղա մի քանի վանքերում և հաստատվեցի այն անապատում, ուր այժմ անց եմ կացնում կյանքս: Իմ հավատարիմ Ստեփանին ես ազատություն տվեցի և նրան դրամ առաջարկեցի, որը կապահովեր նրա ծերությունը, բայց նա դրամը չընդունեց և արցունքներով խնդրեց ազատ չարձակել իրեն: Նա ցանկանում էր մահանալ ինձ մոտ: Իր մնացած կյանքն անց կացրեց մեր մենաստանում և մեռավ՝ հրաժարվելով ձեռնադրությունից:

-Մի՞թե ես՝ մեղավորս և անարժանս, կարող եմ վանական լինել, ասում էր նա:- Ինձ համար բավական է և այն, որ արժանացա Աստծո ծառաների հետ ապրելու բախտին:

Հարգարժան հայր Գ.-ն իր պատմությունն ավարտեց հետեյալ խոսքերով.

-Իմ օրինակով Դուք տեսնում եք Աստծո ողորմածությունը: Որպեսզի իմ հոգին փրկի մեղավոր քնի ճիրաններից, բարի Մարդասերն ինձ թողեց, որ անցնեմ մահվան հոգտով և դագաղի մեջ լուսավորեց իմ աչքերը, որպեսզի չքնեմ հավերժական քնով:

Որուսերենից թարգմանեց Հրաչ Բեզլարյանը

ՎԵՐՋԱԲԱՆԻ ՓՈԽԱՐԵՆ

Հավատացյալ մարդու համար հրաշքը իրերի սովորական ընթացք է: Հրաշքով է շաղախված մեր կյանքի ցանկացած դրվագ: Մի՞քև հրաշք չէ, երբ առավոտյան արթնանում ես քնից և նորից տեսնում ես արևը, հրաշք չէ՝ միթե, երբ տեսնում ես աշխարհը՝ լուսով ողողված և կամ գիշերային լիալուսինը, որ իր արծաթե փայլով քեզ մտածել է տալիս իրեն Ստեղծողի մեծության և ուժի, նրա իմաստնության ու ողորմածության մասին: Այո, աշխարհը հրաշալի է, կյանքը հրաշալի է, սակայն մենք այստեղ այդ կարգի հրաշքների մասին չենք խսում, այլ այն դեպքերի, երբ խախտելով իրերի սովորական կարգն ու բոլոր տեսակի օրենքները՝ Աստված անմիջականորեն միջամտում է իր արարածների կյանքին:

Այդ պահին հաճախ իրերի նման ընթացքը հրաշք չի թվում, բայց անցնում է ժամանակ, մարդն ասես սթափվում է և հասկանում, որ իր հետ կատարվածը սովորական բան չեղ: «Դոգլոր գիտակցությունը շատ իրատեսական է,- ասում է Անդրել Կուլակը,- այն «ֆանտազիաներ» չի սիրում: Ուղղակի նրա իրականության մեջ մտնում է նաև հրաշքը, պարզապես նրա իրականությունը չի սահմանափակվում մերած իրերի աշխարհով» (Дьякон Аンドрей Курайев, Школьное богословие, издание третье, исправленное и дополненное, <Светояр>, С-Пб, 2000, с. 13.):

Հրաշքն անձեռագործ է, մարդու ուժերից վեր նի բան, որի առաջ հաճախ ափիբերան ենք մնում: Այն նաև անսպասելի է և ծկի, և ժամանակի, և տարածության տեսակետից: Հարկ է փաստել մի կարևոր հանգամանք. հրաշքը տեղի է ունենում ոչ թե մարդու ցանկությամբ կամ նրա ուզած ձևով, այլ՝ Աստծո: Արարիչն ինքն է հարմար գտնում իր ուզած ձևով և իր ցանկացած ժամանակ խառնվելու մարդու կյանքին, այն հրաշալի կերպով ուղղելու համար, բարելավելու համար իրերի այն դրությունը, որը խախտվել է մարդու մեղքի պատճառով:

«Հրաշք ասելով հասկանում ենք Աստծո այնպիսի արտակարգ ազդեցությունը մարդու կամ բնության վրա, որը որպես կամոն դուրս է գալիս բնական հայտնի օրինաչափությունների շրջանակից և մարդուն ակնհայտորեն, առանց կասկածանքի կանգնեցնում է աշխարհում Աստծո ռեալ գոյության փաստի առաջ», -գրում է Ա. Օսիպով (Ա. Ի. Օսիպով, ՊուТЬ րազմա ա ուսկական համակարգությունները հրաշքները բաժանում են երկու տեսակի՝ արտաքին (օրինակ՝ մեռածի հարությունը, փոթորիկի խաղաղեցումը և այլն) և ներքին (օրինակ՝ ավագակի բարոյական անսպասելի վերածնունդը կամ մաքսավորի ու անառակ կնոջ վերածնունդը կամ ասենք վշտի կամ ցավի մեջ գտնվող մարդու ուրախության զգացումը աղոթքի ժամանակ):

Սակայն թե՝ մեկի, թե՝ մյուսի համար ընդհանուրն այն է, որ մարդն զգում է Աստծո ազդեցությունն իր վրա և դրական կամ բացասական արձագանք է տալիս դրան: Իսկական հրաշքը միշտ ուղեկցվում է.

ա. Այն մարդու սրբությամբ, որի միջոցով կատարվում է դա

բ. Մարդու հոգևոր-բարոյական փոփոխությամբ (զղոյում, դարձ դեպի Աստված կամ ընդհակառակը՝ խստանալ և աստվածամարտ դառնալ):

Հենց սրանով է հրաշքը տարբերվում աճպարարությունից, հայուցինացիայից, հիպնոսից, եքստրասենսորիկայից, ինչպես նաև այն «հրաշքներից», որոնք հնարավոր են մարդու երևակայության շնորհիվ (Ը. Լ. ԿրՌտՏԶ, նշվ. էջ 196):

Անհրաժեշտ է նշել, որ իսկական հրաշքի կարևոր հատկանիշներից մեկն էլ այն մարդու անբասիր ու մաքուր կյանքի առկայությունն է, որի միջոցով Աստված կատարում է այն: Եթե այդպիսի կյանք չկա, այլ ընդհակառակը, փաստեր կամ, որոնք հակառակն են ապացուցում, ապա, սուրբ հայրերի վկայությամբ, նման դեպքը պետք չէ հրաշք համարել կամ այն հրաշքի տեղ ընդունել: Չի ժխտվում նաև այն, որ հրաշքը կարող է կատարվել մեղավոր մար-

դու կամ նույնիսկ՝ կենդանու միջոցով (ինչպես, օրինակ Բաղաամի ավանակի խոսելն է) (Թվեր 22:28), սակայն դա այն դեպքում, եթե պահպանվում է այն մարդու զղացու ընդունակությունը, որի հետ կամ որի ներկայությանք կատարվել է հրաշքը:Դրա համար էլ հրաշքներ են կատարվում նաև Եկեղեցուց դուրս և մինչև օրս, քանզի: «Նա կամենում է, որ բոլոր մարդիկ փրկվեն և հասնեն ճշմարտության գիտությանը» (1 Տիմ., 2:4):

Դարձ է շեշտել, որ քրիստոնեական հավատի հիմքում ընկած են ոչ թե դատողությունները կամ ապացույցները, այլ ամենից առաջ Աստծո գորությունն ու ուժը: Թե որտեղ և ինչ ձևով ի հայտ կգան դրանք, մարդու գիտակցությունից դուրս են: Եվ հենց այդ պատճառով էլ զարմանալի ոչինչ չկա, երբ քրիստոնյայի մեջ գործում է Քրիստոսի ուժը, և տեղի է ունենում հրաշք:

Զմռանանք նշել նաև այն կարծիքը, որ կա աստվածաբանների որոշ խմբի մոտ: Դրաշքները մեզ հրաշք են թվում, քանի որ մենք ծանոթ չենք այս կամ այն օրենքին, որ Աստված սահմանել է գործելու բնության կամ հասարակության մեջ: Ասենք ինչպիսի՞ հրաշք կարող էր թվալ մեզմից երկու դար առաջ ապրած մարդու համար հասարակ հեռախոսը, կամ ռադիոն, հեռատեսիլը... Կզա ժամանակ և այսօր հրաշք համարվող շատ երևույթներ կդաշնան սովորական բան: Սակայն չպետք է մոռանանք, որ հրաշքները միշտ կամ գրեթե միշտ, տեղի են ունենում առանց հաշվի առնելու բնության օրենքները:

Ինչ խոսք, անհավատ մարդուն հնարավոր չէ հավատի կոչել և ոչ մի հրաշքով: Մի՞թե Քրիստոսը քիչ հրաշքներ գործեց, իսկ Նրա կատարած ամենամեծ հրաշքը մեր մեղքերի համար խաչվելն էր և հարություն առնելը, սակայն դա չվերացրեց անհավատ-կասկածամիտների բազմությունը: Մինչև այսօր էլ սերունդների միջով ձգվում է նրանց շարանը:

Պրագմատիկը գործնական ապացույց է ուզում: Մենք նրան պարզում ենք Աստծո գորությանք տեղի ունեցած հրաշքները:

Դրանք տեղի են ունեցել ոչ վաղ անցյալում, ականատեսների հիմնական մասը դեռ ապրում են և զարմացած պատմում են իրենց հետ կատարվածը:

-Փչո՞ց է,- փնչացնում են արհամարհանքով:

-Ականեր կան,- ասում ենք:

-Նեքիա՞թ է,- թերահավատությամբ ուսերն են թորվում:

Դրա համար էլ կրկին ու նորից գալիս ենք Յիսուսի հարցին.

-Իսկ դու հավատու՞մ ես, որ Ես այդ կարող եմ անել քեզ:

Յասկանալի է՝ հրաշքը հավատի արդյունք է, սակայն չի կարելի ժխտել և այն հանգամանքը, որ հրաշքները տեղի են ունենալուն նաև անհավատ մարդկանց հետ, որպեսզի նրանց հավատի բերեն:

Մենք՝ մարդիկս, սովոր ենք հաճախ դատողություն անել մի բանի մասին, որից գաղափար անգամ չունենք: Նույնը նաև այս ասպարեզն է: Յոգևոր բնագավառը որքան պարզ, նույնքան էլ բարդ է շատերիս համար: Մարդը կարող է կրթված լինել, բայց հոգևոր առումնով՝ անգրագետ: Այսինքն՝ լինել խավարի մեջ և այդ մասին չիմանալով՝ արհամարհանքով փնչացնել՝ ուրիշի մոմ վառելու, լույս վառելու, ճրագ վառելու փորձը ծաղրելով: Սակայն միշտ պետք է հիշել, որ մարդու փրկագործությունը տեղի է ունենալ ոչ այլ կերպ, քան մարդու և Աստծոն համագործակցությամբ: Առաջինի տեսանելի և երկրորդի անտեսանելի ուժերի համադրությամբ: Իսկ Աստծոն անտեսանելի ուժը մեզ չի հարցնում, թե որտեղ կամ ինչ ձևով միջամտի մեր կյանքին: Դրա համար էլ հրաշքները հաճախ անտեսանելի աշխարհի տեսանելի գործունեության արդյունքն են: Անտեսանելի աշխարհը մեզ օգնում կամ խանգարում է (չարի ծեռքով): Իսկ հրաշքների դեպքում նրանց գործունեությունն աստվածային ուժով և կամեցողությամբ բացահայտվում է:

«Իրական հրաշքներին չհավատալու պատճառը,- ասում է Պատկալը,- սիրո պակասն է»,,- և ավելացնում է, որ սուս հրաշքներին հավատալու պատճառը նույնպես սիրո պակասն է (Պ. Փլո-

ренцкий, Христианство и культура, издательство фолио, М. 2001, с. 354):

Հասկանալի է, որ «հրաշքներ» կարող է գործել նաև սատանան, սակայն դրանք սուստ հրաշքներ են: Պողոս առաքյալը խոսում է սատանայի սուստ հրաշքների մասին: «Նրա՝ անօրենի գալուստը Սատանայի ներգործությամբ է,- ասում է Առաքյալը սուստքիստոսի գալստյան մասին,- ամենայն զորությամբ, նշաններով, խարեւայության զորավոր գործերով և անիրավության բոլոր պատրանքներով կորստյան մատնվածների վրա. և այդ ամենը այն բանի փոխարեն, որ չընդունեցին ճշմարտության սերը, որպեսզի փրկվեն» (2 Թեսաղոնիկ. 2, 9-10): Դա այն է, երբ մեղքի որդու գործողությունները ներկայացվում են որպես Աստծո գործողություններ և դրանցով կորստյան մատնում մարդկանց հոգիները: Կարծում ենք նույն նպատակին են ծառայում նաև օկուլտային տարրեր գիտելիքները և նրանց հետևորդների կողմից ներկայացված «հրաշքները»:

Քիչ չեն դեպքերը, երբ որպես հրաշք ընդունվում է հմայքը: Սակայն ասենք, որ հրաշքը և հմայքը տարբերակել հնարավոր է միայն Սուրբ Յոգու զորությամբ:

Դրա համար էլ անհրաժեշտ է շատ ուշադիր լինել դրանց նկատմամբ և չձգտել հրաշքներ տեսնել կամ ամեն ինչ հրաշքով բացատրել: Քանզի այնկողմնային աշխարհի հետ շփումը շատ հաճախ կարող է ավարտվել ոչ մեր ուզածի նման: «Պատահական չէ, որ սուրբ հայրերը միշտ էլ մեծ զգուշությամբ են վերաբերվել հրաշքներին: Օրինակ, Գրիգոր Սիմայեցին (14-րդ դար) հիշեցնում է. «Երբեք մի ընդունիր, եթե զգայական կամ հոգևոր որևէ բան տեսնես, լինի շրջապատում, թե քո ներսում, թեկուզ և դա լինի թրիստոսի, Յոթշտակի կամ որևէ սրբի կերպար... Այդ ընդունողը հեշտությամբ հմայքի մեջ է ընկնում: Աստված չի զայրանում նրա վրա, ով խիստ ուշադիր է սեփական անձի նկատմամբ, և եթե հմայքի մեջ ընկնելու վախից չի ընդունում այն, ինչը որ Նրանից է, այլ ավելի շատ գովում է նրան, որպես իմաստունի» (Պրեպ. Սимեօն հօվան)

Богослов, О трех образах молитвы, добротолюбие. Т. 5, М. 1900, с. 463-464): իսկ Ոռու Ուղղափառ Եկեղեցու 19-րդ դարի սուրբերից մեկը՝ Իգնատի Բյանչանինովը այդ առթիվ գրում է. «Քրիստոնեական ճգնակեցության ուսուցիչները խորհուրդ են տալիս մեծ ուշադրության չարժանացմել հոգևոր և մարմնական զգացողություն առաջացնող երևույթները: Խորհուրդ են տալիս բոլոր նման կարգի երևույթների նկատմամբ դրսերել ողջախոհ սահմություն և փրկարար գգուշություն պահպանել» (Ել. Իշեատի Երանեանուն. Ըստ Ա. Ա. Օսիպով, 1905, ս. 17): Այսօր ողջ աշխարհը կարծես թե «ականատեսն» է դառնում զարմանալի դեպքերի ու «հրաշքների»: Էլ այլնոլորակայիններ, էլ թռչող ափսեներ, էլ չհայտնաբերված թռչող օրյեկտներ... ԱՄՆ-ի բնակչության 70 տոկոսն, օրինակ, հավաստում է, որ ունեցել է էքստրասենսոր ընկալման փորձ, իսկ 42 տոկոսը նշում է, որ հաղորդակցվել է մահացածների հետ (Ա. Ա. Օսիպով, նշվ. աշխ., էջ 199):

Ուրեմն ո՞րն է մեր խնդիրը: Ինչու՞ ենք ձեռնամուխ եղել այս գործին: Պարզապես այն պատճառով, որ մեր կյանքուն շատ են պատահում այնպիսի դեպքեր, որոնք դուրս են սովորականի ծիրից: Դրանք կատարվել և կատարվում են Յայ Առաքելական սուրբ Եկեղեցու ծոցում:

Այն հրաշքները կամ զարմանալի պատմությունները, որոնք մենք ներկայացնում ենք, առաջին հերթին հավաստի են: Նշված են տեղը, ժամանակը, հանգամանքները, որոնց մեջ կատարվել են դրանք: Նաև նշված են ականատեսները, հնարավորին չափ տեղեկություններ են տրված դրանք ներկայացնողների բնակավայրի մասին: Նրանք տարբեր մասնագիտությանունների տեր մարդիկ են, պատկանում են հասարակության այս կամ այն շերտին, սակայն նրանց հետ պատահած դեպքերի ընդհանրությունն այն է, որ դրանք բոլորն ել կատարվել են հրաշալի կամ զարմանալի կերպով: Այս կամ այն լարված իրադրության մեջ Աստվածային գորությունն

օգնել է նրանց: Այդ ընթացքում մարդիկ ապրել են բառերով անբացատրելի զգացողություն:

Մենք մեր պարտքն ենք համարել ամենայն ճշտությամբ գրի առնել դրանք, այս կամ այն չափով ենթարկել գրական մշակման և ներկայացնել ընթերցողին: Ցանկանում ենք մի անգամ էլ շեշտել, որ իսկական հրաշք է նրանց կյանքը, ովքեր ընթանում են Ավետարանի նշած ուղիով: Նրանց գերագույն նպատակը երբեք էլ չի եղել հրաշք տեսնելը կամ գործելը: Երանելիները, մարտիրոսները, արդարները ոչ թե սառը բանականությամբ կամ մերկ դատողություններով, այլ իրենց կյանքով և ճգնակեցությամբ ապացուցել են, որ քրիստոնեությունը ոչ թե ինչ-որ մեկի երևակայության պտուղն է կամ յուրատեսակ փիլիսոփայություն, այլ մարդու իրական ճանապարհ է դեպի ժամանակավոր ու հավերժական բարիք, դեպի նշնարտության ճանաչողություն:

ՀԵՂԻՆԱԿ

ԲՈՎԱՆԴԱԿՈՒԹՅՈՒՆ

ՕՐՅԱՆԻԹՅԱՆ ԽՈՍՔ	3
ՆԱԽԱԲԱՆ	6
ԻՄ ԿՅԱՆՔԻ ԱՄԵԼԱՄԵԾ ՀՐԱԺՔԸ	14
ԱՎԵՏԱՐԱՆԻ ԲՈԼՈՐ ԽՈՍՔԵՐՆ ԷԼ ՍՈՒՐԲ ԵՆ	16
ԻՆՉՊԵՍ ԿԱՆԱՉԵՑ ՉՈՐԱՑԱԾ ԾԱՌԸ	17
«ՆԱՐԵԿԻ» ԲԺԾԿՈՂ ՈՒԺԸ	18
ՀՐԱԺՔ ԱՃԽԱՐՅ	19
ՀՐԱՋԻ ԹՈՒՂՔԸ	21
ԵՎ ԴԵՎԸ ԵՇՈԱՑԱԿ	22
ԱՐՅՈՒՆՔ՝ ԱՎԵՏԱՐԱՆԻ ՎՐԱ	24
ԽՈՒՏԿԻ ԲՈՒՅՈՐԸ	25
ԻՆՉՈՒ ԱՌԱՋ ԶԵՐ ԾՎՐԺԿՈՒՄ ՎԿՏՈՒՄԵԵՆԱՆ	26
ԱՐՈԹՔԸ ՎԱՐԱՆ Է ՄԱՐԴՈՒ ՀԱՄԱՐ	27
ԻՆՉ ՓՐԿՈՂ ՁԵՐՔԸ	28
ՅԱՅԱՅԻՆ «ՍԱՐԸ»	29
ԵՎ ՊԱՏԻԺ, ԵՎ ՕԳՆՈՒԹՅՈՒՆ	31
ԵԿԵՂԵՑՈՒ ՀՐԱԺԱԳՈՐԾ ԲԱՍԱԼԻՆ	32
ՏԻՐԱՄՈՐ ՀՐԱԺԱԼԻ ԵՐԵՎՈՒՄԸ ԶԻՆԿՈՐՆԵՐԻՆ	33
ՕՐՅԱՆԻԹՅԱՄԲ ԱՍԾՈ ՎԵՐԱԴԱՐՁԱԿ ԵՐԿՐԱՅԻՆ ԿՅԱՆՔ ...	34
ԻՆՉՊԵՏ ԲԺԾԿՎԵՑ ԿՈՒՐԱՑԱԾ ԿԻՆԸ	37
ԽԵՆԹԻ ՀՐԱԺԱԼԻ ԲԺԾԿՈՒԹՅՈՒՆԸ	39
ԻՆՉՊԵՏ ԲԺԾԿՎԵՑ ԱՆԴԱՍԱԼՈՒՅՅԾ ԵՐԵԿԱՆ	39
ԲՈՒԺԵՑ ՄՅՈՒՈՒՆԻ ԿԱԹԱՍԱՆ	42
ՏԻՐԱՄՈՐ ԵՐԵՎՈՒՄ՝ ՎՈՒՆՔԻ ԳԵՏԱՐԳԵԼԻ «ՍՈՒՐԲ ՆԾԱՆ» ԵԿԵՂԵՑՈՒՄ	43
ԱՍՏՎԱԾԱԾՆԻ ԱՆՁԵՌԱՎԿԵՐԸ ՊԱՏԿԵՐ՝ ԵԿԵՂԵՑՈՒ ՄՅՈՒՆԻ ՎՐԱ	43
ՀԱՅ ԶԱՅԱՆԱՅԻ ԱՐՈԹՔԻ ՉՈՐՈՒԹՅՈՒՆԸ	45

ՈՏՆԱԼՎԱՅԻ ՀՐԱԺՔԸ	46
ՉՈՐՎԿՈՐ Ե ՀԱՎԱՏԹՈՎ ԱՐՎԱԾ ՎԴՈԹՔԸ	47
ՀԻՍՈՒՄԻ ԱԼՈՒՄ ԶՍՊԵՑ ԿԱՏԱԿԱԾ ԸՆԵՐԻՆ	48
ԲԺՇԿՈՒԹՅԱՆ ՎԴՈԹՔ՝ ՇՈՒՐՅԱՌԻ ՏԱԿ	49
ՄԿՐՏՈՒԹՅԱՆ ՄԱԶՐԱԳՈՐԾՈՂ ԵՎ ԱՊՐԵՑՆՈՂ ՉՈՐՈՒԹՅՈՒՆԸ	49
ԹԵ ԻՆՉՊԵՍ ԲՈՒԺՎԵՑ ԿԱՐՃԱՏԵՍՈՒԹՅՈՒՆԸ	50
ՀԱՅ ԱՌԱՋԵԼԱԿԱՎԱՆ ԵԿԵՂԵՑՈՒ ՔԱՐԱՍԱՅԻ ՎԴՈԹՔԸ	51
ՀԱՐՈՒԹՅՈՒՆ՝ ՎԴՈԹՔԻ ԾՆՈՐՅԻՎ	52
ԱՅՆ ՄԱՍԻՆ, ԹԵ ԻՆՉՊԵՏ ԱԱՏՎԱԾ ՄԻ ԿՆՈԶ ԿՅԱՆՔԸ	
ԵՐԿԱՐԱՑՐԵՑ ՏԱՍՆՉՈՐՄ ՏԱՐՈՎ	54
ՄԿՐՏՈՒԹՅԱՆ ԿԱՐԵՎՈՐՈՒԹՅՈՒՆԸ	55
ՄԿՐՏՈՒԹՅՈՒՆԸ ԲՈՒԺԵՑ ՔԱՂՑԿԵՂԸ	55
ԱՅՆ ՄԱՍԻՆ, ԹԵ ԻՆՉՊԵՏ ՓՈՔՐԻԿ ԱՂՖԻԿԸ ՓՐԿԿԵՑ	
ՎՆԱԱՎԵԼՈՒՑ	56
ՄԻ ԱՆԳԱՄ, ՀԻՎԱՆԴԱՎՈՒՄ	57
ՍՐԲԱՊԱՏԿԵՐԻ ՉՈՐՈՒԹՅՈՒՆԸ	58
ԱՆԴԱՍԱԽԻ ԿՐԱՌՈՌՈՒԹՅՈՒՆԸ	59
ԳՏՆՎԱԾ ԽԱՉՔԱՐԸ	60
ՄԿՐՏՈՒԹՅՈՒՆԸ ՓՐԿԵՑ ՄԱՍԿԱՆԸ	61
ՀԱՇՄԱՆԴԱՍ ՏՂԱՅԻ ԲԺՇԿՈՒԹՅՈՒՆԸ	62
ՍԵՂԱ ՏԱՄԻ ԽԱՉՔԸ	63
ՀԱՎԱՏՈՎ ՎԴՈԹՔԸ ԲՈՒԺՈՒՄ Ե, ԱՆՐԱՎԱՏՈՒԹՅՈՒՆԸ՝ ՍՊԱՆՈՒ	63
ՀՐԱՋՔ ԶԵՐ, Ի՞ՆՉ ԵՐ	65
ԱՆՑՈՒՄ ՀՐԴԵՅ	65
ԻՆՉՊԵՏ ԲԺՇԿԿԵՑ ՈՏՔԸ	66
ՀՐԱՅՐ ԲԱՇԵՒ ՈՒԽՏԸ	67
ՀԻՍՈՒՄԻ ՎԴՈԹՔԻ ՉՈՐՈՒԹՅՈՒՆԸ	68
ԱԱՏՎԱԾ ԲՈՒԺԵՑ ԵՐԿԱՆԵՐԻՆ ԽԹԱՆՈՒՄԸ	72

ՓՐԿԵՑ ԱՍՏԾՈ ԱՆՈՒՆԸ	73
ՔԱՐԱՎԱՅԻ ՆԵՐԿԱՅՈՒԹՅՈՒՆԸ	75
ԻՄ ԱՌՈԹԹԸ ՓՐԿԵՑ ԻՆՉ	76
ԻՄ ԱՌԱՋԻՆ ԲԱՌԸ՝ «ԽԱՉ»	77
ԱԼՏԵԱԱՆԵԼԻ ՊԱՏԱՐԱԳ	78
ԲԱՑՎԵՑ ՃԱՄՐԻ ԼԵՇՈՒՆ	79
Ո՞Վ ՍԹԱՓԵՑՐԵՑ ԹՄՐՎՄՈՒԼԻՆ	80
Ս ԿՈՒՅՑԸ ԲՈՒԺԵՑ ՅՈՒՓՍԻՄԵ ԱՂՋԱՆԿԻՆ	82
ՏԱՐՈՐԻՆԱԿ ՄԱՏԱԴԸ	82
«ՄԱՀԾՈՑՆԵՐԻ» ԲՈՒԺԵՑ ԶՈՒՐԸ	84
ՓՈՅՐԻԿ ԹԱԹՈՒԼԻ ԹՈՒՉՔԸ	85
ՅԻՍՈՒՄԻՆ ԱՐՑՈՒՆՔԸ	86
ՅՐԴԵՑԻՑ ՅԵՏՈ	87
ԻՆՉՈՒ ԵՐ «ԼԱԼԻՍ» ՄՐԲԱՊԱՏԿԵՐԸ	87
ԱՇՈՒՄՆԴԻ ԵՇՐԻՆ	88
ԻՆՉՊԵՍ ԲԺԾԿԵՑ ՅԱՂՑԿԵՐԸ	89
ՔԱՂՑԵՂԸ ԲՈՒԺԵՑ ՄԱՍՆԱՏՈՒՓԸ	90
«ՍՈՒՐԲ ՍԱՐԱԿ» ԵԿԵՂԵՑՈՒ ՅՐԱԾՔԸ	93
ԴԻՎԱՐԱՐ ԵՂԱԾ ՍԻՐԱՐԱԸ	94
ԱՐԱՆԴԱՎՈՐ ԴԻՎԱՐԱՐԻ ԲԺԾԿՈՒԹՅՈՒՆԸ	97
ԻՄ ՈՂԶ ՄՏԱԼԸ ՅՐԱԾՔ Ե	98
ՍԵՎ ԽԱԶԵՐ՝ ՍՊԻՏԱԿ ՎԵՐՆԱՇԱՊԻԿԻ ՎՐԱ	102
ԻՆՉՈՒ ԵՐ ԾԵՐՈՒՄԻՆ ՊԱՏՎԻՐՈՒՄ ՄԱՏԱՐ ԱՆԵԼ	103
ԻՆՉՊԵՍ ՅՐԱԺԱՐՎԵՑԻ ՍԵՎ ՄՈԳՈՒԹՅԱՆ	
ՄԱՍԻՆ ԳՐքԵՐԻՑ	104
ԻՆՉՊԵՍ ՏԵՍԱ ՔՐԻՍՏՈՍԻՆ	105
Ո՞ՒՐ ԿՈՐԱՆ ՈՒՈՈՒՑՔՆԵՐԸ	105
Ո՞Վ ԵՐ ԻՆՉ ՏԱՆՈՂԸ	106
ՄԱՐՄԵԴԱԿԱՆԻ ՍԿՐՏՈՒԹՅՈՒՆԸ	107
ՄԱՐԴՈՒ ՅԱՐՈՒԹՅՈՒՆԸ	108

ՏԻՐԱԾՈՐ ՆԿԱՐԸ	108
ԱՂՋՎԱ ԲՈՒԺՈՒՄԸ	109
ՀԱՎԱՏԱ ԵՎ ԿՓՐԿՎԵՍ	109
ԻՄ ՀՐԱՃՔԸ	110
ՏԻՐԱԾՈՐ ՅՐԱՃԱԼԻ ԵՐԵՎՈՒՄՄԵՐԸ ԽՈՐ ՎԻՐԱՊՈՒՄ	112
ՍՈՒՐԲ ՆԵԿՏԱՐԻՈՒՄ ՅՐԱՃԱԳՈՐԾ ՊԱՏԿԵՐԸ	116
ԻՆՉՊԵՏ ԱՍՏՎԱԾ ՕԳՆԵՑ ԻՆՉ	118
ԱՅՆ ՄԱՍԻՆ, ԹԵ ԻՆՉՊԵՏ ԴԱՐՁԻ ԵԿԱ ԵՍ	121
ՅՈԹԱՆԱՍՈՒՄԵՐԵՔ ՏԱՐԵԿԱՆ ՄԱՅՐՄ՝ ՆՈՐԱԴԱՐՁ	123
ԻՆՉ ՓՐԿԵՑ ԱՌԱՋԵԼԱԿԱՆ ՍՈՒՐԲ ԵԿԵՂԵՑԻՆ	125
ԱՐՈԹՔԻ ՉՈՐԱԿՈՐ ՈՒԺԸ	127
ՄՈՐՄ ՏԵՍԱԾ ԶԱՐՄԱՆԱԼԻ ԵՐԱՀԸ	128
ՏԻՐՈՉ ԵՎ ՏԻՐԱԾՈՐ ԱՆՎԱՆ ՉՈՐՈՒԹՅՈՒՆԸ	129
ԻՆՉՊԵՏ ԴԻՎԱՅԱՐ ԵՂԱՎ ՏՂԱՆ ԵՎ ԻՆՉՊԵՏ ԲԺԵԿՎԵՑ	129
ԻՆՉՊԵՏ ԲԱՐԵԼԱՎԿՎԵՑ ՄՈՐՄ ՏԵՍՈՂՈՒԹՅՈՒՆԸ	132
«ԶԵՂԱԾ ԲԱԼԸ»	132
ԾԱՆՈԹԻՆ ՊԱՏՄՈՒԹՅՈՒՆՆԵՐԸ	134
ՍԿԻՅԻ ՉՈՐՈՒԹՅՈՒՆԸ	137
ՍՈՒՐԲ ՏԻՐԱԾՈՐ ՏԵՍԻԼՔԸ	138
ՕՂԻՑ ԿԱԽՎԱԾ	139
ԵՐԿԱՐ ճԱՍԱՊԱՐՅԸ	139
ԴԱՐՁԻ ԵԿԱԾ ՄԱՅՐԵԴԱԿԱՆԸ, ՈՐԻՆ ՓՐԿԵԼ ԷՐ ԱՍՏՎԱԾԱՇՈՒԶԸ	140
ԻՄ ՊԱՐԱՊԱՆ ԱՍՏՎԱԾ Է	142
ՄԻՒԱՅԻԼ ՏՈԼՈՏՈՅ ԿԵՆԴԱՆԻ ՄԵՌԱԾ (պատմվածք)	143
ՎԵՐՁԱԲԱՆԻ ՓՈԽԱՐԵՆ	154

Խմբագիր՝ Ժիրայր քահանա Խաչատրյան
Շապիկը՝ Ժիրայր քահանա Խաչատրյանի